

傅青主男科 重编考释

傅山

文硕阁

wenshuoge.com

目录

关于我们	3
序	5
序	6
明生员傅先生山传	7
正文	9
附录 傅青主男科卷上	75
附录 傅青主男科卷下	108

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

序

世传先生字不如诗，诗不如画，画不如医，医不如人。先生之高远，固不可以区区之医见也。而先生有所着《性史》、《十三经字区》、《周易偶释》、《周礼音辨条》、《春秋人名韵、地名韵》、《两汉人名韵》等书，不概见于世，虽欲言先生之高，莫之由也。今读先生之传，想先生之为人，岂非所谓天子不得臣，诸侯不得友者欤？先生有《女科》传于世，平尝遵治家人妇女，无一不效。尝语人曰：“先生《女科》，神乎神矣。惜未有《男科》传焉。”或谓：“子不闻谚乎？能治十男子，不治一女人，女科难，男科易，故有传有不传耳。”似也，而心疑之。癸亥（同治二年、公元1863年）秋，有邦定罗公，持先生《男科》、《小儿科》以相示，平见而奇之，究其所从来。罗曰：“道光初年，余家刻印先生《女科》，是时平定州孙毓芝先生，为余家西席，由平定州携至舍下，余抄之，藏笥已四十余年矣。今有乡人生产，胞衣不下，求方于余。余搜《女科》而得此，因子好《女科》，而特为相示。”平受而读之，读而抄之，且欲板之。奈心余力欠，迟迟者久之。是冬十月，有宝翰罗公、正南王公、书铭安公、敦友罗公，亦善此书，于是各捐板资于亲友，以共成其事。愿仁人君子，勿视此为易易。

先生此书，只言病之形，不论病之脉，明白显易，使人一望，而即知其病是寒是热，属实属虚，真深入而显出，似易而实难也，非深精脉理，不能为此。先生盖精于岐黄，而通以儒义，不囿于叔和、丹溪之言，而独有所见。探古人未探之本，传古人未传之妙，实大有益于人世，能救死于呼吸间也。

平本才疏学浅，见小识寡，不足为先生序，且不敢为先生序。而今竟序之者，盖十一月二十三日，已诣平邑古陶书院求序于松龛徐大人，而徐大人赴省公干。梓人索序，而待观者又欲亟成其书，无奈序之，亦不过序其稿之所由来，板之所由成耳。世有能文之士，弃此而重为之序，是所至禱。

同治二年十二月康衢王道平识

序

序

天倪子慨，夫子輿氏之言曰：穷则独善其身，达则兼善天下。古今有志之士，穷者千万，达者十百，其有兼善天下之志，而无兼善天下之柄者，不知凡几矣。若夫无兼善天下之柄，而行兼善天下之志者，莫医若也。

医之中，有良医，有庸医。良医者，绍先圣之心源，即为民命之主宰也，其培养元气，是犹良相之治国也。庸医者，究义理而未精，向市廛而鬻术，其贻害众生，亦犹庸臣之误国也。呜呼！治国者寥寥，误国者滔滔，此有心人所以痛心疾首者耳。傅青主先生，具悲天悯人之怀抱，仁民爱物之念，生当丧乱，笃志隐沦，徒以医传于世。先生之遇亦可悲矣，然先生兼善天下之志更可见矣。《女科》一书，久已流传，同治间湖北崇文书局刊行。杂证二卷，因《女科》之行，别曰《男科》，向闻之而未见也。今年春，枝江张正甫明经以旧刊本见示，天倪子受而读之，觉条分缕晰，意简言赅；不以脉理之深奥而晦目，不以证治之微茫而侈口；病立一案，案列一方，持此可以救世，可以传世，诚良相之典型，治国之模范也，因校而刊之。愿乡国市里，户藏一编，不为庸医所误，使吾民共登仁寿之域。为先生广其传，为先生行其志，是穷者而有达者之权也，不亦深快幸哉！

光绪七年岁在重光大荒落阳月江都郭钟岳序

明生员傅先生山传

明生员傅先生山传

傅先生名山，字青主，一字公他，阳曲人。祖霖，官山东、辽海参议。父之谟，明经授徒，号离垢先生。

山生而颖异，读书十行并下，过目辄能成诵。年十四，督学文太清拔入庠。继文者，袁临候先生继咸也，一见深器之，准食饩。檄取读书三立书院时，时以道学相期许，山益发愤下帷。袁每云：“山，文诚佳，恨未脱山林气耳。”崇祯丙子，继咸为直指张孙振诬诋下狱。山徒步走千里外，伏阙讼冤。孙振怒，大索山，山敝衣褴褛，转徙自匿，百折不回，继咸冤得白。当是时，山义声闻天下。后继咸官南方，数召山，山终不往。

国朝定鼎，自九江执继咸北上，山乃潜入都，密候继咸起居。继咸见杀，山收其遗而归。山性至孝，父之谟病笃，朝夕稽顙于神，愿以身代。旬日父愈，人谓孝通神明不异。黔娄云：执亲丧，哀毁特甚，苦块水饮，不茹蔬果。友爱诸季，先人遗产，弟荡费强半，终身无怨色。弟歿，抚遗孤过于己子。失偶时年二十七，子眉甫五龄，旁无外家媵，”誓不复娶。于里党姻戚，竭力其缓急，为人分别有让，恭俭下人。与人言：根据于忠孝，谋事要于诚实。盖其敦浓彝伦，根本自然，非有强也。自李自成犯京师，明庄烈皇帝殉国，山遂绝意进取，弃青衿为黄冠，号石道人。衣草履，时遨游于平定、祁汾间，所至有墨痕笔迹。工诗赋，善古文词，临池得二王神理，该博古今典籍，百家诸子，靡不淹贯。大叩大鸣，小叩小鸣，复自托绘事写意，曲尽其妙。精岐黄术，邃于脉理，而时通以儒义，不拘拘于叔和、丹溪之言。踵门求医者户常满，贵贱一视之。家故饶，至是渐益窳，安贫乐道泊如也。屋舍田园，多为细人窃据，概置不问。康熙戊午，诏举博学宏词，廷臣交章荐山，山坚以老病辞。当事者立迫就道，道称股病不能行，肩舆舁入都，卧旅邸不赴试。满汉王公九卿、贤士大夫，下逮马医夏畦、市井细民，莫不重山行义，就见者罗溢其门，子眉送迎常不及。山但欹倚榻上言：“衰老不可为礼”。

诸贵人益以此重山，弗之怪也。明年三月，吏部验病入告，奉旨，傅山文学素着，念其年迈，特授内阁中书，着地方官存问，遂得放归。归愈澹泊，自甘僻居远村，不入城府。然钦其名者益众，率纡道往见，冀得一面为荣。又六年卒，远近会葬者，数千百人。山所着有《性史》、《十三经字区》、《周易偶释》、《周礼音辨条》、《春秋人名韵、地名韵》、《两汉人名韵》等书。

嵇礼斋曰：昔者尝怪先生值尧舜之世，笃志高尚，悬辞征辟，何其果也。及读汉史，见周党、王霸之为人，初不辱于新莽，建武复辟，连征不起，乃知士各有志。先生盖有道而隐者也，彼诚见夫有明末季，上下交征利，卒灭亡于寇盗之手，固已心

寄夫长林丰草矣，宁复以青紫为荣耶？至若义白知己之冤，其贤于世之平居师友相亲慕，临难背负，不一引手救，漠然若不相识者，亦远矣。古云：民生于三，事之如一，惟其所在则致死焉。

先生真无愧哉！赞曰：于惟先生，得圣之清；讼冤奔讐，蒙难不惊。辞荣却聘，先民是程，功在名教，百世景行。

[明生员傅先生山传]铁城寄傅青主

（附礼二首附录《霜红龕集》）独子同忧患，于今乃别离，乾坤留古道，生死见心知。贯械还余草，传灯不以诗，悠悠千载业，努力慰相思。

江州求死不得，至今只得为其从容者。闻黄冠入山养母，甚善，甚善！此时不可一步出山也。有诗一册付曲沃锡，属致门下藏之山中矣。可到未？（乙酉冬季）前诗到未？若未到门下，不可往取，可属西河曹孝廉硕公缓颊取之，必藏之门下。所目今着《经观》、《史观》二书，《经观》薄就矣，《史观》尚未竟，不知能终竟此业否？晋士惟门下知我甚深，不远盖棺，断不敢负门下之知，使异日羞称袁继咸为友生也。

丙寅初秋宜春袁继咸袁山

[明生员傅先生山传]傅山父子

（原载《池北偶谈》）傅山，字青主，一字公之他，太原人。母梦老比丘而生，生复不啼。一瞽僧至门云：“既来，何必不啼？”乃啼。六岁食黄精，不乐谷食，强之，乃复食。读十三经、诸子史，如宿通者。崇祯十年，袁临候继咸，督学山西，为巡按御史张孙振诬劾被逮。山橐左右，伏阙上书，白其冤。谕德马君常世奇，作山右二义士传（谓山与汾阳薛宗周），比之裴瑜、魏劭。乱后，梦天帝赐黄冠衲衣，遂为道士装。医术入神，有司以医见则见，不然不见也。康熙戊午，征聘至京师，以老病辞。己未，与范阳杜樾，俱授内阁中书舍人归里。山工八分隶及金石篆刻，画入逸品。子眉，字寿髦，亦工画，作古赋数十篇。常鬻药四方，儿子共车，暮抵逆旅，辄篝灯课读经史骚赋选诸书，诘旦成诵，乃行；否即与杖。

正文

初病治法門

（初治者，首先宜以此治之也。初病伤风，即以伤风治之；初病伤寒，即以伤寒治之；初病伤食，即以伤食治之也。）凡病初起之时，用药原易奏功。无如世人看不清症，用药错乱，往往变症蜂起。苟看病清，用药当，何变症之有？

[初病治法門]外感

人病外感发热，必先散其邪气，邪退而后补正，则正气、不为邪所伤，方用外感发热方：柴胡（一钱）荆芥（一钱）半夏（一钱）黄芩（一钱）甘草（一钱）水煎服，则邪散而身凉。盖四时不正之气，来犯人身，必然由皮毛而入营卫，故用柴胡、荆芥先散皮毛之邪，邪既先散，安得入内？又有半夏以祛痰，使邪不得挟痰以作祟；又有黄芩以清火，使邪不得挟火以作殃；又有甘草调和诸药，是以邪散而无伤于正气也。若内伤之发热，则不可用此方。

[初病治法門]伤风

伤风之症，必然头痛身疼，咳嗽痰多，鼻流清水，切其脉必浮，方用：柴胡（一钱）荆芥（一钱）防风（一钱）黄芩（一钱）半夏（一钱）甘草（一钱）水煎服，一剂即止，不必再剂也。

[初病治法門]伤寒

伤寒初起，鼻塞目痛，项强头痛，切其脉必浮紧。此伤寒也，方用：桂枝（一钱）甘草（一钱）陈皮（一钱）干葛（一钱）水煎服，一剂而愈。

[初病治法門]发汗

邪居腠理之间，必须用汗药以泄之，方用：荆芥（一钱）防风（一钱）甘草（一钱）桔梗（一钱）苏叶（一钱）白术（五钱）茯苓（三钱）陈皮（五钱）水煎服。此方妙在以白术为君。盖人之脾胃健，而后皮毛、腠理，始得开阖自如。白术健脾去湿，而邪已难存，况有荆、防、苏、桔以表散之乎？

[初病治法門]扶正散邪

此专治正气虚，而邪气入之者，如头痛发热、凡脉右寸口大于左寸口者，急以此方投之，无不痊愈。方用扶正散邪汤：人参（一钱）柴胡（三钱）半夏（一钱）甘草

（一钱）茯苓（三钱）白术（三钱）水煎服。

[初病治法門]伤食

如伤食，必心中饱闷，见食必恶，食之转痛也。方用：白术（一钱）茯苓（一钱）枳壳（一钱）山楂（二十粒）谷芽（二钱）麦芽（二钱）神曲（五钱）半夏（一钱）砂仁（三粒）甘草（五分）水煎服，一剂快，二剂愈。

[初病治法門]伤暑

如伤暑，必然头晕、口渴、恶热，甚者痰多、身热、气喘，方用：青蒿（一两）香薷（三钱）白术（五钱）陈皮（一钱）茯苓（三钱）甘草（一钱）水煎服。有人参加一钱，无亦可，一剂愈。

[初病治法門]燥症

燥病初起，咽干口燥，不吐痰，干咳嗽不已，面目红色，不畏风吹是也。方用：麦冬（五钱）元参（五钱）桔梗（三钱）甘草（一钱）花粉（一钱）百部（八分）水煎服。

[伤寒門]结胸

此乃伤寒之变症也。伤寒火邪正炽，不可急与饮食。饮食而成此症者，方用：栝蒌（一枚捶碎）甘草（一钱）水煎服。

夫栝蒌乃结胸之圣药，平常人服之，必至心如遗落，令病患服之，不畏其虚乎？不知结胸之症，是食在胸中，非大黄、枳壳、槟榔、浓朴所能祛逐，必得栝蒌始得推荡开脾，少加甘草以和之，不至十分猛烈也。

[伤寒門]大满

此邪在上焦壅塞而不得散也。方用：栝蒌（一个捣碎）枳壳（三钱）半夏（一钱）栀子（三钱）天花粉（三钱）陈皮（三钱）浓朴（一钱五分）甘草（一钱）水煎服。

此方之妙，全在用栝蒌能祛胸膈之食，而消上焦之痰，况又佐以枳壳、天粉，同是消痰之圣药；又有浓朴、半夏，以清胃口之痰；尤妙在甘草，使群药留中而不速下，则邪不能久存，自然散矣。

[伤寒门]循衣撮空

此症非大实，则大虚，当审其因，察其脉，参其症，而分黑白矣。

实而便秘者，大承气汤。虚而便滑者，独参汤。厥逆者，加附子。

[寒热真假辨门]真热症

真热症：口干极而呼水，舌燥极而开裂生刺，喉痛日夜不已，大热烙手而无汗也。方用：麻黄（三钱）当归（五钱）黄连（三钱）黄芩（三钱）生石膏（三钱）知母（三钱）半夏（三钱）枳壳（二钱）甘草（一钱）水煎服，一剂轻，二剂愈。

[寒热真假辨门]真寒症

真寒症：手足寒，久而不回。色变青紫，身战不已，口噤出声而不可禁也。方用：附子（三钱）肉桂（一钱）干姜（一钱）白术（五钱）人参（一两）水煎服，急救之。此乃真中寒邪，肾火避出躯壳之外，而阴邪之气直犯心宫，心君不守，肝气无根据，乃发战发噤，手足现青色。然则用桂、附、干姜逐其寒邪足矣，何用参、术，即用何至多加？盖元阳飞越，只一线之气未绝，纯用桂附、干姜一派辛辣之药，邪虽外逐而正气垂绝，若不多加参、术，何以反正气于若存若亡之际哉？

[寒热真假辨门]假热症

假热症：口虽渴而不甚，舌虽干而不燥，即燥而无芒刺纹裂也。方用：黄连（三钱）当归（三钱）白芍（三钱）半夏（三钱）茯苓（三钱）柴胡（二钱）栀子（二钱）枳壳（一钱）菖蒲（三分）水煎服。此方妙在用黄连入心宫，佐以栀子，提刀直入，无邪不散；柴胡、白芍，又塞敌运粮之道；半夏、枳壳，斩杀党余。中原既定，四隅不战而归。然火势居中，非用之得法，则贼势弥张，依然复入，又如菖蒲之辛热，乘热饮之，则热喜热，不致相反而更相济也。

[寒热真假辨门]假寒症

假寒症：手足冰冷，而有时温和；厥逆身战，亦未太甚；有时而安，有时而搐是也。方用：附子（一钱）肉桂（一钱）人参（三钱）白术（五钱）猪胆汁（半个）苦菜汁（三匙）先将水二碗煎药，熟后以药并器，放冷水中激凉，再入胆汁，菜汁调匀，一气服之。方中全是热药，倘服不如法，必然虚火上冲，将药吐出。必热药凉服，已足顺其性，况下行又有二汁之苦，以骗其假道之防也哉。

[寒热真假辨门]真热假寒

如人身外冰冷，身内火炽，发寒发热，战栗不已，此真热反现假寒之象以欺人也。法当用三黄汤加石膏、生姜，趁热饮之。再用井水以扑其心，至二、三十次，内热自止，而外之战亦若失矣。后用元参、麦冬、白芍各二两，煎汤与服，任其恣饮，后不再甚矣。

[寒热真假辨门]真寒假热

如人下部冰冷，上部大热，渴欲饮水，下喉即吐，乃真寒反现假热之象以欺人也。法当用八味汤大剂，探凉与服。再令一强有力者，以手擦其足心，如火之热，不热不已，以大热为度。后用吴茱萸一两、附子一钱，共为末，麝香三分，以少许白面入之，打糊作膏，贴在足心之中。少顷，必熟睡，醒来，下部身热，而上部之火息矣。

[寒热真假辨门]上热下寒

此症上焦火盛，吐痰如涌泉，面赤喉痛，上身不欲盖衣，而下体冰凉，此上假热而下真寒也。方用：熟地（半斤）山萸（四两）丹皮（三两）茯苓（三两）泽泻（三两）附子（一个）肉桂（一两）麦冬（一两）五味子（一两）水十碗，煎至三碗，探冷与服。二渣再用水三碗，煎一碗，一气服之，立刻安静，此上病下治法也。

[寒热真假辨门]乍热乍寒

病有洒淅恶寒，而后发热者，盖阴脉不足，阳往从之；阳脉不足，阴往乘之。何谓阳不足？寸脉微，名曰阳不足。阴气上入于阳中，则恶寒也。何谓阴不足？尺脉弱，名曰阴不足。阳气下陷阴中，则发热也。

凡治寒热，用柴胡升阳气，使不陷于阴中，则不热也。用黄芩降阴气，使不升入阳中，则不寒也。

[火症门]火症

火症初起，必大渴引渴，身有斑点，或身热如焚，或发狂乱语，方用：生石膏（三钱）元参（一两）麦冬（一两）甘草（三钱）升麻（三钱）知母（三钱）半夏（三钱）竹叶（百片）水煎服，一、二剂可止可安，三剂愈，不必四剂也。（以下据《石室秘录》初治法“发明”补）：〔若初起之时，火势少衰，减半与之。乘其火势初起，胃气未衰，急用此方以止遏之，则火自然骤减而不为害矣。方即竹叶石膏汤，妙在加入元参、麦冬数两，使石膏不为主帅，而反为裨将，听麦冬、元参之差遣，则止去火而不损胃中之阴。又妙加入升麻引其外出而不能入，止祛火而不损肾水，所以奏功如神也。倘疑升麻太多而少减之，转不能奏功之捷，予所以又戒世人之

不知用升麻者〕。（按：《石室秘录》中麦冬为三两，元参为一两。此方论在《男科》及《方论》中均无，疑系傅氏晚年所改）。

[火症门]泻火

泻火汤总方：栀子（三钱）白芍（五钱）丹皮（三钱）元参（三钱）甘草（一钱）水煎服。心火加黄连一钱；胃火加生石膏三钱；肾火加黄柏、知母各一钱；肺火加黄芩一钱；大肠火加地榆一钱；小肠火加天冬、麦冬各一钱；膀胱火加泽泻三钱。治火何独治肝经？盖肝属木，最易生火。肝火散，则诸经之火俱散。但散火必须有下泄之药，而使火之有出路也，则得矣。

按：白芍、丹皮、栀子、甘草，不但有清火作用，且有利尿作用，使火从小便利之。

[火症门]火越

此乃胃火与肝火，共腾而外越，不为丹毒，即为痧疹，非他火也。方用：元参（一两）干葛（三两）升麻（三钱）青蒿（三钱）黄（三钱）水煎服。此方妙在用青蒿，肝、胃之火俱平。又佐以群药重剂，而火安有不灭者乎？治小儿亦效。

[火症门]火丹

治火丹神方：丝瓜子（一两）柴胡（一钱）元参（一两）升麻（一钱）当归（五钱）水煎服。小儿服之亦效。

[火症门]消食病

火盛之症，火渴引饮，呼水自救，朝食即饥，或夜食不止，方用：元参（一两）麦冬（五钱）生地（三钱）竹叶（三十片）菊花（二钱）白芥子（二钱）丹皮（二钱）陈皮（五分）水煎服。

[火症门]痿症

不能起床，已成废人者，此乃火盛内炽，肾水熬干矣。治法宜降胃火而补肾水，方用降补汤：熟地（一两）元参（一两）麦冬（一两）甘菊花（五钱）生地（五钱）车前子（二钱）人参（三钱）沙参（五钱）地骨皮（五钱）水煎服。

[火症门]又痿症

人有两足无力，不能立起，而口又健饭，少饥即头面皆热，咳嗽不已，此亦痿症，方用起痿至神汤：熟地（一两）元参（一两）山药（一两）甘菊花（一两）当归（五钱）白芍（五钱）人参（五钱）神曲（二钱）白芥子（三钱）水煎服，三十剂愈。

[湿症门]伤湿

如伤湿，必然恶湿，小便短赤，方用：泽泻（三钱）猪苓（三钱）肉桂（五分）茯苓（五钱）白术（五钱）车前子（一钱）柴胡（一钱）半夏（一钱）水煎服，一剂愈。

[湿症门]黄胆病

此症外感之湿易治，内伤之湿难疗。外感者，利水则愈。若内伤之湿，泻水则气消，发汗则精泄，必健脾行气而后可也。方用：白术（一两）茯苓（一两）薏仁（一两）茵陈（三钱）黑栀（三钱）陈皮（五分）水煎服。

此方治内伤之湿，不治外感之湿。若欲多服，去栀子。

[湿症门]痺症

此症虽因风寒湿而来，亦因身中元气之虚，邪始得乘虚而入。倘攻邪而不补正，则难愈矣。今于补正之中，佐以祛风寒湿之品，而痺症失，方用：白术（五钱）人参（三钱）茯苓（一两）柴胡（一钱）附子（一钱）半夏（一钱）陈皮（一钱）水煎服。

[湿症门]香港脚

今人以五苓散去湿，亦是正理，然不能上升其气而尽去其湿也。必须提其气，而水乃散也。方用：黄（一两）人参（三钱）白术（三钱）茯苓（三钱）薏仁（五钱）芡实（五钱）肉桂（一钱）白芍（五钱）半夏（二钱）防风（一钱）柴胡（一钱）陈皮（五分）水煎服。

此方乃去湿之圣药。防风用于黄之中，足以提气而去湿。又助之柴胡舒气，气升则水散。且有白术、茯苓、薏仁、芡实，俱是去湿之品，有不神效者乎？凡有湿者，均可以此方治之。

[郁结门]开郁

如人头痛身热，伤风咳嗽，或心不爽，而郁气蕴于中怀；或气不舒，而怒气留于胁下；断不可用补药，方用：当归（三钱）白芍（五钱）柴胡（一钱）白术（二钱）甘草（一钱）丹皮（一钱）薄荷（一钱）半夏（二钱）枳壳（一钱）水煎服。

头痛，加川芎一钱；目痛，加蒺藜一钱、甘菊花一钱；鼻塞，加苏叶一钱；喉痛，加桔梗二钱；肩背痛，加枳壳一钱、羌活二钱；两手痛，加姜黄或桂枝一钱；两胁痛，倍柴胡、白芍；胸痛，加枳壳一钱；腹痛不可按者，加大黄二钱；按之而不痛者，加肉桂一钱。

[郁结门]舒肝

治肝气方：当归（二钱）白芍（钱二分酒炒）焦白术（钱五分）茯苓（钱五分）柴胡（八分醋炒）生甘草（五分）丹皮（一钱）黑山栀（一钱）炮姜（三分）水煎服。

[郁结门]关格

怒气伤肝，而肝气冲于胃口之间，肾气不得上行，肺气不得下达，而成此症，以开郁为主，方用：白芍（三钱）柴胡（一钱）郁金（一钱）荆芥（一钱）苏子（一钱）白芥子（一钱）甘草（五分）茯苓（一钱）花粉（一钱）水煎服。

此方妙在平常，而有至理。盖肝气之郁，必用柴、芍以舒之。然过多则必阻而不纳，方中以此二味为君，而佐以郁金之寒散，芥子之去痰，天花粉之散结，甘草之和，茯苓之去湿，气味和平，委婉易入，不争不战、相爱相亲，自能到门而疑关，不致扣关而坚壁也。

又方：

用阴阳水各一碗，加盐一撮，打百余下起泡，饮之即吐而愈。凡上焦有痰，欲吐而不能吐者，饮之立吐。

又方：

用生半夏为末，水丸，绿豆大，入鼻孔中，则必嚏喷不已，用水饮之立止。通治中风不语，及中恶、中鬼等症俱妙。

[脾胃病门]辨脾胃症

凡人能食而不能化者，乃胃不病而脾病也，当宜补脾。而补脾尤宜补肾中之火，盖

肾火能生脾土也。

凡人不能食，食之而安然者，乃胃病而非脾病也，不可补肾中之火，当补心中之火，盖心火能生胃土也。

世人一见不饮食，动曰脾胃病，殊不知胃之虚寒责之心，脾之虚寒责之肾，不可不辨也。

[脾胃病门]气虚胃虚

凡人病气虚者，乃身体羸弱，饮食不进，或大便溏泄，小便艰涩。方用：人参（一两）白术（五钱）茯苓（三钱）甘草（一钱）陈皮（一钱）泽泻（三钱）车前子（一钱）水煎服。

此方用人参为君者，开其胃气也。盖胃为肾之关，关门不开，则上之饮食不能进，下之糟粕不能化，必用人参以养胃土，茯苓、车前以分消水气也。〔且胃之性最喜温和而不喜湿，湿者必上壅而呕、下积而泄矣。今顺土之性而温补之，则饮食自进、而大小便安其位矣。〕或服此方而未愈，兼服八味丸，最能实大肠而利膀胱也。

[脾胃病门]气虚饮食不消

饮食入胃，必须胃气充足，始能化糟粕而生津液。今饮食不消，气虚故也。方用：人参（二钱）白术（三钱）茯苓（三钱）甘草（三钱）陈皮（五分）神曲（五分）黄（三钱）麦芽（五分）山楂（五粒）炮姜（一钱）水煎服。

伤面食，加萝卜子。有痰，加半夏、白芥子各一钱。咳嗽，加苏子一钱、桔梗二钱。伤风，加柴胡二钱。夜卧不安，加炒枣仁二钱。胸中微痛，加枳壳五分。

方内纯是开胃之品，又恐消食难消，更加消导之味，则饮食化而津液生矣。

[脾胃病门]倒饱中满

气虚不能食，食则倒满。

人参（一钱）白术（二钱）茯苓（三钱）甘草（一钱）陈皮（三分）山药（三钱）萝卜子（一钱）薏仁（五钱）芡实（五钱）水煎服。

下喉虽则微胀，入腹渐觉爽快。

[脾胃病门]胃气虚寒

心肾兼补，治脾胃两虚者固效矣。若单是胃之虚寒，自宜独治心之为妙。方用：人参（一两）白术（三两）茯神（三两）山药（四两）半夏（三两）菖蒲（五钱）远志（一两）白芍（二两）枣仁（五钱）莲子（三两）白芥子（四钱）良姜（五钱）附子（三钱）蜜丸，每日滚水送下三钱。

〔此方补心火并疏肝气，内加附子、良姜，以助火热之气，心火足，自然生胃土；胃土足，饮食自然能进而无害矣。〕

[脾胃病门]健脾丸

炒白术（二两半）莲子（二两半）炒山药（二两半）山楂（二两半）芡实（一两）茯苓（一两）以上六味，俱饭上蒸晒两次，加神曲五钱，白芍五钱，白色大米虫五钱，陈皮二钱，泽泻二钱，蜜丸，空心米饮送下二、三钱，宜常服。

如瘦极成疳，加芦荟三钱、杜仲二钱。如泄泻，加白果煨三钱。如内热口干，大便结，加黄连二钱姜炒。如潮热，加柴胡三钱。如骨蒸，加地骨皮五钱。如有虫，加使君子三钱。如肚腹胀大。大便闭塞，肠鸣作响，加槟榔五分、木香一钱。

[脾胃病门]大健脾丸方

焦白术（三两）人参（一两）扁豆（一两）莲子（一两半）茯苓（一两半）山药（一两）芡实（二两半）陈皮（二两）神曲（二两）山楂（二两）薏苡仁（三两）麦芽（一两半）黄连（三两半）泽泻（四钱）藿香（五钱）桔梗（五钱）炙甘草（五钱）白蔻（四钱）蜜丸，每日早晚米饮送下。

脏治法門

脏治者，五脏中有病而治之者也。脏有五，治法惟三：脾肺同一治，肾肝同一治，心肾同一治也。

[脏治法門]肺脾双亏

（肺气之伤，必补脾气；脾气既伤，肺气亦困；故补肺必须补脾，补脾必须补肺也。）如人咳嗽不已，吐泻不已，此肺脾之伤也。人以为咳嗽宜治肺，吐泻宜治脾。殊不知咳嗽由于脾气之衰，斡旋之令不行，则上为咳嗽矣。吐泻由于肺气之弱，整肃之令不行，则上吐而下泻矣。方用：人参（一钱）麦冬（三钱）茯苓（三钱）柴胡（一钱）神曲（五分）车前子（一钱）薏苡仁（一钱）甘草（一钱）水煎服。

此方乃治肺、治脾之药，合而用之，咳嗽、喘病之尽除，呕吐、泻症之各去，所谓一方而两用之也。

[脏治法]肾肝两虚

肾肝同治者，肾水亏不能滋肝木，则肝木抑郁而不舒，必有两胁饱满之症。肝木郁不能生肾中之火，则肾水日寒，必有腰背难于俯仰之症。〔故补肝必须补肾中之水；补肾中之水又不可不补肝木。倘补肝而不补肾，则胁痛何以顿除？补肾而不补肝，则腰脊何以立愈？〕方用：熟地（一两）山萸（五钱）当归（五钱）白芍（五钱）柴胡（二钱）肉桂（一钱）水煎服。

此方熟地、山萸，补肾之药；当归、白芍、柴胡、肉桂，补肝之品。既云平肝补肾，似乎用药不宜有轻重，今补肝之品多于补肾者何也？盖肾为肝之母，肝又为命门之母也，岂有肝木旺而不生命门之火者哉？〔命门是一身主宰，当生五脏之气，不宜为五脏所生。然而五脏叠为生克，肝既是木，岂有木不能生命门之火乎？此有至理存焉，愿世人勿惊为创说奇闻，而疑为不可执之以治病也。〕

[脏治法]心肾不交

肾，水脏也。心，火脏也。是心、肾二经为仇敌，似乎不宜牵连而一治之。不知心，肾虽相克而实相须，无心之火则成死灰，无肾之水则成冰炭。心必得肾气以滋养，肾必得心火而温暖。如人惊惕不安，梦遗精泄，岂非心肾不交乎？人以惊惕不安为心之病，我以为肾之病；人以梦遗精泄为肾之病，我以为心之病。非颠倒也，实有至理焉。方用：熟地（五两）山萸（三两）山药（三两）人参（三两）白术（五两）芡实（五两）茯神（三两）菖蒲（一两）炒枣仁（三两）远志（一两）五味子（一两）麦冬（三两）柏子仁（三两）蜜丸，早晚温水送下五钱。

此方之妙，治肾之药少于治心之味。盖心君宁静，肾气自安，肾气既安，何至心动？此治心正所以治肾，而治肾正所以治心也，所谓心肾相根据。

[两病同治]便血又尿血

血分前后，便血出于后阴，尿血出于前阴，最难调治，然总之出血于下也。方用：生地黄（一两）地榆（五钱）水煎服，二症俱愈。

盖大小便虽各有经络，而其源同，因膀胱之热而来也。生地、地榆俱能清膀胱之热，一方而两用之，盖分之中又有合也。

[两病同治]腰痛又头痛

腰痛又头痛，上下相殊也，如何治之？治腰乎、治头乎？谁知是肾气不通乎？盖肾气上通于脑，而脑气下达于肾，上下虽殊，而气实相通。法当用温补之药，以大益其肾中之阴，则上下之气通矣。方用：熟地（一两）杜仲（五钱）麦冬（五钱）北五味（二钱）水煎服，一剂即愈。

方内熟地、杜仲，肾中之药也，腰痛是其专功。今并头痛而亦愈者，何也？盖头痛乃肾气不上达之故，用熟地补肾之味，则肾气旺而上通于脑，故腰不痛而头亦不痛矣。〔合中有分，分中又有合也〕。

[两病同治门]遗精又健忘

遗精，下病也。健忘，上病也。何以分治之而咸当乎？方用：人参（三两）莲须（二两）芡实（三两）熟地（五两）山药（四两）麦冬（三两）五味子（一两）生枣仁（三两）远志（一两）石菖蒲（一两）当归（三两）山萸（三两）柏子仁（一两）蜜丸，每日服五钱，白水下。

〔此方乃治健忘之方，何以治遗精而亦效耶？盖遗精本是肾水之虚，而实本于心头之痛。今补其心君，则玉关不必闭而自闭矣，所谓“一举而两得”。此合中之分，实有殊功也〕。

[两病同治门]泄泻又吞酸

泄泻者，寒也。吞酸者，火也。似乎寒热殊而治法宜异矣。不知吞酸虽热，由于肝气之郁结；泄泻虽寒，由于肝木之克脾。苟一方以治木郁，又一方以培脾土，土必大崩，木必大雕矣。不若一方而两治之为愈也。方用：柴胡（一钱）白芍（五钱）茯苓（三钱）陈皮（五分）车前子（一钱）神曲（五分）甘草（五分）水煎服。

〔此方之奇绝，在白芍之妙。盖白芍乃肝经之药，最善〕舒肝木之郁，木郁一舒，上不克胃，而下不克脾。方中又有茯苓、车前子以分消水湿之气，则水尽从小便出，何有余水以吞酸，剩汁以泄泻哉？〔况又有半夏、神曲之消痰化粕，此一（合也）治而有分治之功，世人未尽知也。〕

[两病同治门]中气又中痰

中气、中痰，虽然中之异，而实皆中于气之虚也。气虚自然多痰，痰多必然耗气，虽分而实合耳。方用：人参（一两）半夏（三钱）南星（三钱）茯苓（三钱）附子（一钱）甘草（一钱）水煎服。

盖人参原是气分之神剂，而亦消痰之妙药；半夏、南星虽是逐痰之神品，而亦扶气

之正药；附子、甘草，一仁一勇，相济而成，〔用之于三味之中，扶正必致祛邪，荡痰必然益气，分合而无分合之形，奇绝而有神化之妙，又不可不知也〕。

[上病下治、下病上治门]病在上而求诸下

头痛、目痛、耳红、腮肿，一切上焦等症，除清凉发散正治外，人即束手无策，而不知更有三法：如大便结，脉沉实者，用酒蒸大黄三钱，微下之，此名斧底抽薪之法。

如大便泄，脉沉，足冷者，宜六味地黄汤加牛膝、车前、肉桂；足冷甚者，加熟附子。是冷极于下，迫其浮火上升也。此名导龙入海之法。

大便如常，脉无力者，用车前子、牛膝行之下行，此名引火归源之法也。

[上病下治、下病上治门]病在下而求诸上

凡治下焦病，用药不效者，须从上治之：如足痛、足肿，无力软弱，膝疮红肿，用木瓜、薏仁、牛膝、防己、黄柏、苍术之品不效者，定是中气下陷，湿热下流，用补中益气汤升提之。

如足软不能行而能食，名曰痿症，宜清肺热。

如治泄泻，用实脾利水之剂不效者，亦用补中益气汤去当归，加炮姜、苍术；脉迟，加肉蔻、故纸。

如尿血，用凉血利水药不效，用清心莲子饮。若清心不止，再加升麻。

如治便血，用止涩之药不效，或兼泄泻，须察其脉，如右关微、或数大无力，是脾虚不摄血，宜六君子汤加炮姜。若右关沉紧，是饮食伤脾，不能摄血，加沉香二分。右寸洪数，是实热在肺，宜清肺，用麦冬、花粉、元参、桔芩、桔梗、五味子、枳壳等味。

[虚劳门]劳症虚损辨

二症外相似，而治法实不同。虚损者，阴阳两虚也。劳症者，阴虚阳亢也。故虚损可用温补；若劳症则忌温补而用清补也。

两症辨法，不必凭脉，但看人着复衣，此着单衣者，为劳症。人着单衣，此着复衣者，为虚损。劳症，骨蒸而热；虚损，荣卫虚而热也。

[虚劳门]过劳

凡人过劳，脉必浮大不伦，〔按之无力〕，若不安闲作息，必有吐血之症。法当滋补，方用：人参（三两）白术（五两）茯苓（三两）熟地（五两）山萸（四两）当归（八两）白芍（五两）黄（五两）麦冬（三两）五味子（三两）砂仁（五钱）陈皮（五钱）神曲（一两）共为末，炼蜜为丸，每日早晚各服五钱。

〔此方乃补气、补血、补精之妙品也。有斡旋之力，可以久服滋人，不致有偏胜之祸也。〕

[虚劳门]未成劳而将成劳

〔人有虚劳，未成劳瘵之症，〕而将成劳者，方用：熟地（一两）地骨皮（五钱）人参（五钱）麦冬（五钱）白术（一钱）山药（三钱）白芥子（三钱）五味子（三分）水煎服。

凡人右寸脉大于左寸脉，即内伤之症。不论左右关尺脉如何，以此方投之效验。

[虚劳门]劳病

劳病既成，最难治者，盖必有劳虫生之，以食人之气血也。若徒补其气血，而不入杀虫之品，则饮食入胃，只荫虫而不生气血也。若但只杀虫而不补气血，则五脏尽伤，又何有生理哉？惟于大补之中，加入杀虫之药，则元气既全，真阳未散，虫死而身安矣。方用：人参（三两）熟地（八两）何首乌（八两）地栗粉（八两）鳖甲（一斤）神曲（五两）麦冬（五两）桑叶（八两）白薇（三两）山药（一斤）为末，将山药末打成糊，为丸，每日白滚水送下五钱，半年，虫俱从大便中出矣。

[虚劳门]久虚缓补

久虚之人，气息奄奄，无不曰宜急治矣。不知气血大虚，骤加大补之剂，力量难任，必致胃口转膨胀，不如缓缓清补之也。方用：当归（一钱）白芍（二钱）茯苓（一钱）白术（五分）人参（三分）山药（一钱）陈皮（三分）麦芽（三分）炮姜（三分）枣仁（五分）甘草（三分）水煎服。

此方妙在以白芍为君，引参术入肝为佐，小小使令，徐徐奏功，使脾气渐实，胃口渐开，然后再用纯补之剂，先宜缓补之也。

[虚劳门]补气

右手脉大，气分之伤也。用补气丸：人参（三两）黄（三两）茯苓（四两）白术（八两）白芍（三两）陈皮（一两）炙草（八钱）麦冬（三两）五味子（一两）远志（一两）白芥子（一两）蜜丸，早服五钱，白水下。

[虚劳门]补血

左手脉大，血分之劳也。方用补血丸：熟地（八两）白芍（八两）当归（四两）山萸（四两）麦冬（三两）五味子（一两）砂仁（五钱）生枣仁（一两）白芥子（一两）肉桂（五钱）蜜丸，晚服一两，白水下。

如血热者，去肉桂加地骨皮五钱。

[虚劳门]血虚面色黄瘦

出汗盗汗，夜卧常醒，不能润色以养筋是也。血虚自当补血，舍四物汤又何求耶？今不用四物汤，用：熟地（一两）麦冬（三钱）当归（五钱）桑叶（十片）枸杞（三钱）茜草（一钱）水煎服。

此方妙在用桑叶补阴而生血，又妙在加茜草血得活而益生，况又济之归、地、麦、杞大剂以共生之，〔则血足而色润筋舒也。〕

[虚劳门]气血两虚

饮食不进，形容枯槁，补其气而血益燥；补其血而气益馁；助胃气而盗汗难止，补血脉而胸膈阻滞。法当气血同治，方用：人参（一钱）白术（一钱）茯苓（二钱）甘草（八分）陈皮（五分）当归（二钱）熟地（三钱）川芎（一钱）白芍（三钱）神曲（五分）麦冬（五钱）谷芽（一钱）水煎服。

此方气血双补，与八珍汤同功，而胜于八珍汤者，妙在补中有调和之法耳。

[虚劳门]阳虚下陷

凡人因饥饱劳役，内伤正气，以致气乃下行，脾胃不能克化，饮食不能运化，往往变成劳瘵。

若疑饮食不进，为脾胃之火，肉黍之积，轻则砂仁，枳壳、山楂、麦芽之类，重则大黄、芒硝、牵牛、巴豆之品，纷然杂进，必致膨闷而渐成劳矣。倘先以提升之药治之，何至于成劳？方用：人参（一钱）柴胡（一钱）陈皮（一钱）甘草（一钱）黄（三钱）当归（三钱）白术（三钱）升麻（五分）水煎服。

凡人右手寸脉，大于左手寸脉，即内伤之症，不论左、右关、尺脉如何，以此方投之，无不神效。

〔此方即补中益气汤，而增定其轻重也。此方之妙，妙在用柴胡、升麻二味，杂于参、归、术之中，以提升其至阳之气，不使下陷阴分之间。尤妙在加甘草、陈皮于补中解纷，则补者不致另补，而升者不致偏随，所以下口安然，奏功如响耳。〕

[虚劳门]阴虚下陷

凡人阴虚脾泄，岁久不止，或食而不化，或化而溏泄，方用：熟地（五钱）山萸（五钱）白术（一两）山药（三钱）茯苓（三钱）五味子（一钱）车前子（一钱）肉桂（一钱）升麻（三分）水煎晚服。

此方纯是补阴之药，且有升麻以提阴中之气，〔阴气升而泄自止。〕乃又有温湿之品，以暖命门而健脾土，何致再溏泄哉？〔此乃补升阴气之汤也。〕

[虚劳门]阴虚火动夜热昼寒

此肾水虚兼感寒，或肾水亏竭，夜热昼寒，若认作阳症治之，则口渴而热益炽，必致消尽阴水，吐痰如絮，咳嗽不已，声哑声嘶，变成劳瘵。法当峻补其阴，则阴水足而火自消，骨髓泰然矣。方用：熟地（一两）地骨皮（三钱）山萸（五钱）元参（三钱）沙参（五钱）麦冬（五钱）五味子（三钱）白芥子（一钱）芡实（五钱）桑叶（七片）丹皮（一钱）车前子（一钱）水煎服。

此方阴虚火动者神效。〔妙在全国纯阴之品，直进肾宫，滋其匮乏，则焦急之形，不上焰于口舌、皮毛之际。〕

又加元参、地骨皮、沙参、丹皮之品，少清其骨髓中之内热，自然阴长阳消，不治阳而自安也。〕

[虚劳门]阴寒无火

若阴寒无火者，方用：肉桂（一钱）附子（一钱）熟地（一两）山萸（四钱）白术（三钱）人参（三钱）柴胡（五分）水煎服。

〔此方之妙，用桂、附祛寒之药，加之于熟地补阴之内，使阳得阴而有制，不至奔越沸腾。少加柴胡数分，则阴邪自散矣。况肾中之火，必得水而后生，以此水非邪水，乃真水也。邪水可以犯心而立死，真水可以救心而长延。盖阳根于阴，而真阴肾水，实为君、相二火之母也。此方中加熟地、山萸，正是此意。恐人未知，故又

表而出之。〕〔以上〕二方，治阴之中即有以治阳，而治阳之中即藏于补阴也。

[虚劳门]亡阳

如人汗出不已，此亡阳，气欲散也，故必以补为敛之为得也。方用：人参（一两）黄（一两）当归（一两）麦冬（三钱）五味子（一钱）桑叶（五片）炒枣仁（一钱）水煎服。

〔此方之妙，全在用参、归以补气，用山、萸五味以敛气，则补足以济敛之功，而敛足以滋补之益。况又有桑叶收汗之妙品，调停于补敛之中，不偏于敛，亦不偏于补也。〕

[虚劳门]内伤发热

人病发热，有外感，有内伤。外感必先散其邪气，邪气退而后补正气，正不为邪所伤也。若内伤之发热，方用：柴胡（一钱）当归（一钱）白芍（二钱）梔子（一钱）花粉（二钱）陈皮（一钱）甘草（一钱）水煎服。

此方凡肝木郁者，用一剂即快，〔治内伤初起者神效。〕

[虚劳门]日重夜轻

病重于日间，而发寒发热，较夜尤重，此症必须从天未明而先截之。方用：人参（一钱）白术（五钱）陈皮（一钱）青皮（一钱）柴胡（三钱）当归（三钱）黄（五钱）甘草（一钱）枳壳（一钱）干姜（五分）半夏（一钱）水煎服。

又方：

人参（一钱）陈皮（一钱）甘草（一钱）白术（五钱）柴胡（二钱）熟地（一两）白芥子（一钱）水煎服。

[虚劳门]夜重日轻

病重于夜间，而发寒发热，或寒少热多，或热多寒少，一到天明便觉清爽，一到黄昏即觉沉重，此阴气虚甚也。方用：熟地（一两）山萸（四钱）当归（三钱）白芍（三钱）柴胡（三钱）陈皮（一钱）鳖甲（五钱）茯苓（五钱）麦冬（三钱）五味子（一钱）白芥子（三钱）生何首乌（三钱）水煎服。

此方妙在用鳖甲，乃至阴之物，逢阴则入，遇阳则转；生何首乌直入阴经，且亦攻

邪；白芥子去痰又不耗真阴之气，有不奏功者乎？但必须黄昏时服，则阴气固而邪气不敢入也。

[虚劳门]阴邪兼阳邪

此症亦发于夜间，发寒发热，无异纯阴邪气之症，但少少烦躁耳，不若阴症之常静也。法当于补阴之中，少加阳药一、二味，使阳长阴消，自然奏功如响矣。方用：熟地（一两）山萸（四钱）当归（三钱）鳖甲（五钱）人参（二钱）白术（三钱）茯苓（五钱）麦冬（三钱）五味子（一钱）柴胡（二钱）陈皮（一钱）白芥子（三钱）生何首乌（三钱）水煎服。

[虚劳门]精滑梦遗

此病患以为肾虚也，不独肾病也，而亦心病也，宜心肾兼治。方用：熟地（五两）山萸（四两）山药（四两）人参（三两）茯苓（三两）白术（四两）麦冬（三两）五味子（一两）肉桂（一两）附子（二钱）远志（一两）炒枣仁（一两）肉苁蓉（三两）补骨脂（一两）巴戟天（三两）柏子仁（一两）杜仲（一两）砂仁（五钱）鹿茸（一两）紫河车（一副）白芍（二两）蜜丸，早晚白水送下五钱。

此方用熟地、山药、山萸之类，补肾也。巴戟、苁蓉、附子、鹿茸，补肾中之火也，可以已矣。而又必加入人参、茯苓、柏子仁、麦冬、远志、枣仁者，何也？盖肾中之火虚，由于心中之火虚也。徒补肾火而不补心火，则反增上焦枯渴。故欲补肾火，乃必须补心火，则水火相济也。

[虚劳门]夜梦遗精

此症由于肾水耗竭，上不能通于心，中不能润于肝，下不能生于脾，以致玉关不闭，无梦且遗。法当补肾，而少佐以益心、益肝、益脾之品，方用：熟地（一两）山萸（四钱）白术（五钱）茯苓（三钱）茯神（二钱）当归（三钱）白芍（三钱）薏仁（三钱）五味子（一钱）生枣仁（三钱）白芥子（一钱）肉桂（五分）黄连（五分）水煎服，一剂止，十剂不犯。

此方妙在五脏兼补，而使心肾两交，自然魂魄宁而精窍闭矣。

[虚劳门]滋阴补水

方用大滋阴补水丸：大熟地（六两）炒山药（三两）沙参（三两）茯神（三两）炒枣仁（三两）蒺藜（三两）麦冬（三两）莲须（二两）阿胶（三两）牡蛎（四两）丹参（二两）败龟板（四两）菟丝子（二两）远志肉（钱半）甘草（六钱）桂元肉

（一百二十个）焙干为末，炼蜜为丸，梧子大，〔每日服三十丸，米饮送下〕。

又方

鱼膘一两，捣碎，蛤粉炒，沙苑蒺藜酒洗炒，全当归各四两，牛膝三两，枸杞子三两，为末，蜜丸，〔每服黄酒送二、三钱〕。

[厥症门]寒、热厥辨

寒厥者，手足必青，饮水必吐，腹必痛，喜火熨之。

若热厥，手足虽寒而不青紫，饮水不吐，熨则腹必痛。不可不辨也。

[厥症门]热厥

一时手足厥逆，痛不可忍，人以为四肢、手足之风症也，不知乃心中热蒸，外不能泄，故四肢手足则寒，而胸腹皮热如火。方用：柴胡（三钱）当归（二钱）荆芥（一钱）黄连（二钱）炒梔子（二钱）半夏（一钱）枳壳（一钱）水煎服，二剂愈。

〔盖厥症多是火病，厥之甚则热之甚也。故舒其内热，而四肢手足自温矣。方中妙在用柴胡为君，诸寒凉之药，直入心、肝之内，又不凝滞于胸膈之间。盖柴胡能散半表半里之邪，又善浅祛郁闷之气，故不治四肢手足，而专治其心胸也。〕

又方：

白芍（一两）炒梔子（三钱）陈皮（一钱）柴胡（一钱）天花粉（二钱）水煎服。

此方以白芍为君，取其入肝而平木也。

[厥症门]寒厥

〔厥症虽多是火，然亦有非火厥者，乃直中阴经也。阴寒直入于肾宫，则必挟肾水上犯心君之火，若不急用大热之药，急救心君，则危亡顷刻。〕方用：人参（三钱）白术（一两）附子（一钱）肉桂（一钱）吴茱萸（一钱）水煎服。

[厥症门]尸厥

〔如人死厥，不省人事，中风不语，或中邪卒倒，此等之病，乃邪气中之，痰迷心窍也。怪病多起于痰，不必惊惶，治其痰而病自愈。然而“邪之所凑，其气必虚”

，用祛痰之药加入于补正之中，则病去如扫，死者重生。虽同是中邪，乃有阳邪、阴邪之分。〕

[厥症门]阳邪尸厥

此症乃痰厥，方用：人参（三钱）白术（五钱）茯苓（三钱）半夏（三钱）南星（三钱）白芥子（一钱）附子（五分）生姜（一块，捣汁）水、酒各一半，煎服。

尸厥又方：苍术三两，水煎灌之必吐，吐后即愈。盖苍术阳药，善能祛风，故有奇效。凡见鬼神用之更效。

[厥症门]阴邪尸厥

此症乃气虚也，方用：人参（一两）白术（五钱）茯苓（五钱）半夏（五钱）陈皮（五分）菖蒲（一钱）水煎服。

按：《方论》、《男科》中均无，据《石室秘录》“死治法”补。此方乃六君子汤去甘草、加菖蒲之变方也。

[厥症门]厥症

人有忽然发厥，闭目撒手，喉中有声，有一日死者，有二、三日死者。此厥多犯神明，然亦素有痰气而发也。

治宜攻痰而开心窍，方用起迷汤：人参（五钱）半夏（五钱）菖蒲（二钱）菟丝子（一两）茯神（三钱）皂夹（一钱）生姜（一钱）甘草（三分）水煎服。

[厥症门]气虚猝倒

凡人猝然昏倒，迷而不悟，喉中有痰，人以为风也，谁知是气虚乎？若作风治，未有不死者。盖因平日不慎女色，精亏以致气虚，又加不慎起居，而有似乎风者，其实非风也。方用：人参（一两）黄（一两）白术（一两）茯苓（五钱）半夏（三钱）白芥子（三钱）菖蒲（二钱）附子（一钱）水煎服。

此方补气而不治风，消痰而不耗气，一剂神定，二剂痰清，三剂痊愈。

[厥症门]阴虚猝倒

此症有肾中之水虚，而不上交于心者；又有肝气燥，不能生心之火者；此皆阴虚，

而能令人猝倒者也。方用再苏丹：熟地（二两）山萸（一两）元参（一两）柴胡（一钱）麦冬（一两）五味子（一两）茯苓（一两）菖蒲（一钱）白芥子（三钱）水煎服。

此方补肾水，滋肺气，安心通窍，泻火散痰，实有神功。一方茯苓为五钱，十剂可愈。

[厥症门]阳虚猝倒

人有心中火虚，不能下交于肾而猝倒者，阳虚也。方用全生汤：人参（一两）白术（一两）茯神（五钱）甘草（一钱）生半夏（三钱）生枣仁（一两）附子（三钱）水煎服。

药下喉则痰静而气出矣。连服数剂，则安然如故。

[厥症门]胃热猝倒

又有胃热，不能安心之火而猝倒者，亦阳虚也。方用：人参（一两）元参（一两）生石膏（五钱）天花粉（五钱）麦冬（三钱）菖蒲（一钱）水煎服。

一剂心定，二剂火清，三剂痊愈。

[厥症门]肾虚猝倒

人有口渴索饮，眼红气喘，心脉洪大，舌不能言，不可作气虚治，此乃肾虚之极，不能上滋于心，心火亢极，自焚闷乱，遂致身倒，有如中风也。法当补肾，而佐以清火之药，方用水火两治汤：熟地（一两）山萸（五钱）当归（一两）生地（五钱）元参（一两）麦冬（五钱）五味子（三钱）茯神（五钱）黄连（三钱）白芥子（三钱）水煎服，连服数剂而愈。

[厥症门]大怒猝倒

人大怒跳跃，忽然卧地，两臂抽掣，口眼歪邪，左目紧闭，此乃肝火血虚，内热生风之症，当用八珍汤加丹皮、钩藤、山梔。

若小便自遗，左关脉弦、洪而数，此肝火血燥，用六味（地黄）汤加钩藤、麦冬、五味子、川芎、当归。愈后须改用补中益气汤，加丹皮、山梔、钩藤，多服。

如妇人得此症，服逍遥散加钩藤及六味地黄丸，最效。

[厥症门]中风不语

凡人跌倒昏迷，或自卧而跌在床下，〔或中风不语者，〕，此皆正气虚而痰邪犯之也，〔似宜治邪为是。然而“邪之所凑，其气必虚”，急宜固其正气，而少佐以祛痰之药，〕方用三生饮：人参（一两）生半夏（三钱）生南星（三钱）生附子（一个）水煎，急灌之。

此症又有因肾虚而得之者。夫肾主藏精，立下焦地道之生育，冲、任二脉系焉。二脉与肾之大络，同出于肾之下，起于胞胎之中，其冲脉因称胞络，为经脉之海，遂名海焉。冲脉之上行者，渗诸阳，灌诸经；下行者，渗诸阴，灌诸络，而温肌肉，别经络，结于跗。

因肾虚，而肾络与胞内绝，不通于上则，肾脉不上循喉咙挟舌本，则不能言。二络不通于下，则痲厥矣。

六用地黄引子：熟地（一两）巴捷（一两）山萸（一两）茯苓（一两）麦冬（一两）五味子（五钱）石斛（六钱）肉苁蓉（一两）菖蒲（五钱）附子（五钱）肉桂（三钱）加薄荷、姜、枣。

水煎服。

[厥症门]口眼歪邪

此症人多治木、治金固是，而不知胃土之为尤切。当治胃土，且有经、脉之分。

经云：“足阳明之经，急则口目为僻，急不能视”，此胃土之经为歪邪也。又云：“足阳明之脉，挟口环唇，口歪唇邪”，此胃土之脉为歪邪也。

二者治法，皆当用：黄当归人参白芍甘草桂枝升麻葛根秦艽白芷防风黄柏苏木红花水、酒各半煎，微热服。如初起有外感者，加葱白三茎同煎，取微汗自愈。

[厥症门]又口眼歪斜

〔人病口眼歪斜，人以为胃中之痰，不知非也。〕乃心中虚极，不能运于口目之间，轻则歪斜，重则不语。方用：人参（三钱）白术（五钱）茯苓（三钱）甘草（一钱）当归（一两）白芍（三钱）菖蒲（三钱）肉桂（二钱）水煎服。

一剂少愈，二剂痊愈。〔此方之妙，全不去祛风祛邪，一味补正，而歪斜自愈矣。〕

[厥症门]半身不遂

此症宜于心、胃而调理之。盖心为天真。神机开发之本；胃是后腑，充大真气之标。标本相得，则心膈开之，膻中、气海，所留宗气盈溢，分布五脏、三焦，上下中外，无不周遍。

若标本相失，则不能致其气于气海，而宗气散矣。故分布不周于经脉则偏枯；不周于五脏则。即此言之，未有不因真气不周而病者也。

法宜用黄为君，参归、白芍为臣，防风、桂枝、钩藤、竹沥、姜汁、韭汁、葛汁、梨汁、乳汁为佐使，治之而愈。

若杂投乌附、羌活之类，以涸荣而耗卫，如此死者，是医杀之也。

[厥症门]半身不遂口眼歪邪

方用：人参（五钱）白术（五钱）当归（五钱）黄（一两）半夏（三钱）干葛（三钱）桂枝（钱半）红花（二钱）甘草（一钱）水（二樽）姜（三片）枣（二枚）煎服。

此症人多以风药治之，殊不见功。此药调理气血、故无不效。

[厥症门]痫症

〔羊癫之症〕，忽然卧倒，作羊马之声，口中吐痰如涌者，乃痰迷心窍也。盖因寒而成，感寒则发也。方用：人参（三钱）白术（一两）茯神（五钱）山药（三钱）薏仁（五钱）肉桂（一钱）附子（一钱）半夏（三钱）水煎服。

（此方助其正气以生心血，又加桂附以祛寒邪；加半夏以消痰，逐去其水，自然气回而癫止也。一剂痊愈，永不再发，幸珍视之。）

又方：

人参（一两）茯神（一两）白术（五钱）半夏（一钱）南星（一钱）附子（一钱）柴胡（一钱）菖蒲（三分）水煎服。

此本治寒狂之方，治痫亦佳。

又方：

人参（三两）白术（五两）甘草（一两）陈皮（三钱）生南星（一两）半夏（一两）附子（一钱）蜜丸，须病发前服之，则永不再发矣。〔盖健其胃气，自不生痰。况又佐之祛痰斩关之将，以此方治之自愈。〕

[癫狂门]癫狂

此症多生于脾胃之虚寒，饮食入胃，不变精而变痰，痰迷心窍，遂成癫狂。苟徒治痰而不补气，未有不速之死者也。方用：人参（五钱）白芥子（五钱）白术（一两）半夏（三钱）陈皮（二钱）肉桂（一钱）干姜（一钱）甘草（五分）菖蒲（五分）水煎服。

如女人得此症，去肉桂，加白芍一两、柴胡二钱、黑栀子一钱，治之最神效。

[癫狂门]发狂见鬼

〔凡人有病发狂见鬼，此正气虚而邪气犯之也，似宜正治邪气为是。然而“邪之所凑，其气心虚”，不治其虚，安问其余？此所以急宜因其正气，而少佐以祛寒祛邪之药为妙。〕方用：人参（一两）白术（一两）半夏（三钱）天南星（三钱）附子（一钱）水煎服。

〔发狂见鬼，明是虚而痰中之，用半夏、南星、附子以祛痰，不用人参、白术之多，何以并驾齐驱而成功载？此方之妙，不特发狂见鬼，而治中风不语，卒倒不知人，亦神妙之极。盖气虚而后始中痰也。〕

[癫狂门]发狂不见鬼

此症是内热之症，方用：人参（三钱）白芍（三钱）半夏（三钱）南星（二钱）白芥子（一钱）陈皮（一钱）黄连（二钱）甘草（一钱）水煎服。

〔此方妙在用黄连，盖厥深热益深，去其热则厥自定。黄连入心，引诸补心之味，同群共济，或补或泻，中正之意也。〕

[癫狂门]热狂

此症有因伤寒得之者，一时之狂也，可用白虎汤以泻其火。更有终年狂而不愈者，或拿刀杀人，或詈骂人，不认儿女，见水大喜，见食大恶，此心气之虚，而热邪乘之，痰气侵之也，方用化狂汤：人参（一两）白术（一两）茯神（一两）附子（一分）半夏（三钱）菟丝子（三钱）菖蒲（三钱）甘草（一钱）水煎服。

一剂狂定。此方妙在补心、脾、胃三经，化其痰而不去泻火。盖泻火则心气益伤，而痰涎益盛，狂何以止乎？尤妙微用附子，引补心消痰之品，直入心中，则气易补而痰易消，又何用泻火之多事哉？

[癫狂门]寒狂

凡发狂骂人，不口渴，索引与水不饮者，寒症之狂也。此必气郁不舒，怒气未泄，其人平日定懦弱不振耳。

〔治之法，宜祛痰为主，而佐以补气之药，〕方用：人参（一两）白术（五钱）茯神（一两）半夏（一钱）南星（一钱）附子（一两）柴胡（一钱）菖蒲（三分）水煎服。

（此方之妙，全在补气，而不十分祛痰，寒症发寒，与痫症同治，加入附子以消其寒气，菖蒲引药入心经，自然下喉熟睡，病如失矣。方中再加柴胡，以舒其木旺之郁气，尤易奏功耳。）

[怔忡惊悸门]怔忡不寐

〔心经之病，怔忡不寐，乃心血少也。〕方用：人参（三钱）丹皮（二钱）茯神（三钱）麦冬（三钱）五味子（一钱）当归（三钱）生枣仁（五钱）熟枣仁（五钱）菖蒲（一钱）甘草（一钱）水煎服。

此方妙在用生、熟枣仁〔各五钱〕，生使其日间不卧，熟使其夜间不醒；又以补心之药为佐，而怔忡安矣。

[怔忡惊悸门]心惊不安夜卧不睡

〔人非心不能宁静致远，非肾不能作强生育。故补心即当补肾，补肾即当补心，是二经乃一身之主宰，脏腑之根本也。故人病心惊不安，或夜卧不睡者，人以为心病也，谁知非心病，乃肾病也。然则欲安心者先治肾，欲治肾者当治心。〕方用：人参（三两）茯苓（三两）茯神（三两）远志（二两）生枣仁（一两）熟地（三两）山萸（三两）当归（三两）菖蒲（三钱）黄连（五钱）肉桂（五钱）白芥子（一两）麦冬（三两）砂仁（五钱）蜜丸，每日送下五钱，汤，酒俱可。

此方治心惊不安与不寐耳，用人参、茯神、当归、麦冬足矣。即为火起不寐，亦不过加黄连足矣。何以反用熟地、山萸补肾之药，又加肉桂以助火？不知人之惊恐者，乃肾气不入于心也；不寐者，乃心气不归于肾也。今用熟地，山萸补肾，则肾气可上通于心矣。肉桂以补命门之火，则肾气既温，相火有权，〔则心气下行〕，君

火相得，自然上下同心，君臣合德矣。

然补肾固是，而亦不可徒补其肾也。亦有肝气不上于心易成此症者，如果有之，宜再加白芍二两，以兼补肝木，斯心泰然矣。

[怔忡惊悸门]恐怕症

夫人夜卧交睫，则梦争斗，负败恐怕之状难以形容〔者〕，人以为心病也，谁知是肝病乎？盖肝藏魂，肝血虚则魂失养，故交睫则若魇，乃肝胆虚怯，故负恐维多，此非峻补，不克奏功。而草木之品，不堪任重，乃以酒化鹿角胶，空心服之可痊。盖鹿角胶峻补精血，血旺则神自安矣。

[怔忡惊悸门]神气不宁

人有神气不宁，每卧则魂飞扬，觉身在床而魂离体也，惊悸多魇，通夕无寐，人以为心病也，谁知是肝经受邪乎？盖肝气一虚，邪气袭之，肝藏魂则魂无根据，是以魂飞扬而若离体也。

此症当用珍珠母为君，龙齿佐之。珍珠母入肝为第一，龙齿与肝同类也。龙齿、虎睛，令人例以为镇心之药，不知龙齿安魂，虎睛定魄也。东方苍龙，木也，属肝而藏魂，西方白虎，金也，属肺而藏魄。龙能变化，故魂游而不定；虎能专静，故魄止而有守。

是以治魄不宁，宜虎睛；治魂飞扬。宜龙齿；药各有当也。

[痰嗽门]治痰之法

古人所立治痰之法，皆是治痰之标，而不能治痰之本也。如二陈汤上中下久暂之痰皆治之，而其实无实效也。

今立三方，痰病总不出其范围也。

[痰嗽门]初病之痰

伤风、咳嗽、吐痰是也。方用：半夏（一钱）陈皮（一钱）天花粉（一钱）茯苓（一钱）苏子（一钱）甘草（一钱）水煎服。

二剂而痰可消矣。此方去上焦之痰，上焦之痰，原在胃中而不在肺，去其胃中之痰，而肺金自然清肃，又何至火之上升哉？

[痰嗽门]已病之痰

必观其色之白与黄而辨之：黄者，火将退也。白者，火正炽也。正炽者，用寒凉之品，将退者，用祛逐之味。

今一方而俱治，方用：白术（三钱）茯苓（五钱）陈皮（一钱）甘草（一钱）白芥子（三钱）枳壳（五分）水煎服。

有火加栀子，无火不必加也。此方健脾去湿，治痰在中焦者也。

又方：

白术（五钱）茯苓（五钱）薏仁（五钱）陈皮（一钱）天花粉（二钱）益智仁（三分）人参（三分）水煎服。

有火加黄芩一钱，无火加干姜耶、甘草二分。此方健脾去湿而不耗气，二剂而痰自消也。

[痰嗽门]久病之痰

久病之痰，切不可作脾湿生痰论之。盖久病不愈，未有不因肾水亏损者也。非肾水泛上为痰，即肾火沸腾为痰。当补肾以祛逐之，方用：熟地（一两）山萸（五钱）薏仁（一两）山药（五钱）芡实（五钱）麦冬（五钱）五味子（三钱）茯苓（三钱）车前子（一钱）益智仁（二钱）水煎服。

此治水泛为痰之圣药也。若火沸为痰者，加肉桂一钱。此方补肾去湿而化痰，水入肾宫，自变为真精而不化痰矣。此治下焦有痰之法也。

又方：

久病之痰，方用六味地黄汤加麦冬、五味子，实有奇功。无火加附子、肉桂可耳。

[痰嗽门]滞痰

夫痰之滞，乃气之滞也。苟不补气而惟去其痰，未见痰去而病消也。方用：人参（一钱）白术（二钱）茯苓（三钱）陈皮（一钱）白芥子（一钱）花粉（一钱）苏子（八分）豆蔻（三粒）水煎服。

〔此方之妙，在于治痰之中而理其气。气顺则痰活，气顺则湿流而痰不生矣。此气

治之宜知。〕

[痰嗽门]湿痰

〔气虚痰多之症，本是湿也。而〕治痰之法，不可徒去其湿，必以补气为先，而佐以化痰之品，乃克有效。方用：人参（三钱）茯苓（三钱）薏仁（五钱）半夏（三钱）陈皮（一钱）神曲（一钱）甘草（一钱）水煎服。

此方之中用神曲，人多不识其意，谓神曲乃消食之圣药，非化痰之神品也。殊不知痰之积聚稠粘，甚不易化，惟用神曲以发之，则积聚稠粘开矣。继之以半夏、陈皮，可以奏功。虽然有半夏、陈皮消痰。不多用人参，则痰何从消？有人参以助气，又有薏仁，茯苓能健脾去湿，湿去而痰亦去矣。

[痰嗽门]寒痰

人有气虚而痰寒者，即用前方加肉桂三钱、干姜五分足矣。

[痰嗽门]热痰

人有气虚痰热者，方用：麦冬（二钱）白芍（二钱）花粉（一钱）甘草（一钱）陈皮（一钱）白芥子（一钱）茯苓（二钱）神曲（三分）当归（三钱）水煎服。

〔此方之妙，妙在不燥而又是补气之剂，润以化痰，痰去而气自足矣。〕。

[痰嗽门]火痰

此症方用痰火神丸：大黄（五两）陈皮（一两）焦白术（二两）前胡（二两）枳壳（二两）山楂（二两）甘草（四钱）半夏（二两）天花粉（二两）制半夏法：生姜自然汁泡之，三次用姜三两取汁，滚水半碗入半夏内，一次泡七天，取出焙干。共为细末，老米煮粥，捣烂为丸，每服二、三钱。

[痰嗽门]老痰

凡疾在胸膈不化者，为老疾也。方用：白芥子（五钱）白芍（三钱）薏仁（五钱）柴胡（一钱）茯苓（三钱）陈皮（三分）丹皮（二钱）甘草（一钱）花粉（八分）水煎服。

此方妙在白芥子为君，薏仁、白芍为臣，柴胡、花粉为佐，使老痰无处可藏，（自然渐渐消化，十剂而老痰无不消矣）

[痰嗽门]顽痰

痰成块而塞咽喉者，为顽痰也。方用：贝母（三钱）半夏（三钱）茯苓（三钱）白术（三钱）神曲（三钱）甘草（一钱）桔梗（三钱）白矾（一钱）紫菀（二钱）水煎服。

此方妙在贝母、半夏同用，一燥一湿，使痰无处藏避。又有白矾以消块，梗、菀去邪，甘草调中，有不奏功〔如响〕者乎？

[痰嗽门]水泛为痰

肾中之水，有火则安，无火则泛。倘人过于入房，则水去而火亦去，久之则水虚而火亦虚；水无可藏之地，则上泛而为痰矣。治之法，欲抑水之下降，必先使火之下温，当于补肾水之中，加火热之药，使水足以制火，而火足以暖水，则水火有既济之道，自不上泛为痰矣。方用：熟地（一两）山萸（五钱）肉桂（二钱）五味子（一钱）牛膝（三钱）水煎服。

一剂而痰下行，二剂而痰无不消矣。

又方：

凡人久有痰而不愈，用猪肺一个，萝卜子五钱，研碎，白芥子一两，五味调和，饭锅蒸熟，饭后顿服一个即愈。此乃治上焦之痰，汤药不愈者，最神效。

[痰嗽门]湿嗽

秋伤于湿，若用乌梅、米壳，断乎不效。方用：白术（三钱）陈皮（一钱）当归（一钱）甘草（一钱）枳壳（一钱）桔梗（一钱）水煎服。

三剂安然矣。冬咳皆秋伤于湿也，岂可拘于受寒乎？

[痰嗽门]久嗽

〔久嗽者，人无不以为邪之聚也。日日用发散之剂而不效者，乃气散故耳。气散矣而仍用散药，无怪乎经年累月而不效也。法当用收敛之药一、二味以见功也。方用：〕人参（五钱）白芍（三钱）生枣仁（一钱）五味子（一钱）白芥子（一钱）苏子（一钱）麦冬（五钱）益智仁（五分）水煎服。

二剂后，服六味地黄丸加麦冬三两、五味子一两，服之不再发，否则不能保其不发

也。

[痰嗽门]久嗽

治久嗽，不论老少，神效。方用：乌梅（五钱）栝蒌仁（五钱）杏仁（一钱）硼砂（一钱）人参（一钱）（童便浸）五味子（一钱）寒水石（一钱）胡桃仁（一钱）薄荷（五分）甘草（五分）贝母（三两）蜜丸，樱桃大，净绵包之，口中噙化。虚劳未曾失血，脉未数者，均可用之，不过十粒即见效，二十粒愈。

[痰嗽门]又久嗽

人参、当归、细茶各一钱，水煎，连渣嚼尽，一、二服即愈。

[痰嗽门]肺嗽兼补肾

肺嗽之症，本是肺虚，其补肺也明矣，奈何兼亦肾乎？盖肺经之气，夜必归于肾。若肺金为心火所伤，必求救于其子，子若力量不足，将何以救其母哉？方用：熟地（一两）麦冬（一两）山萸（四钱）元参（五钱）苏子（一钱）牛膝（一钱）沙参（三钱）天冬（一钱）紫菀（五分）水煎服。

〔此方之妙，全在竣补肾水，而少清肺金，则子盛于母，而母仇可报也。况又有祛邪之品，用之得宜，全不耗散肺金，外邪退舍，不敢重犯，此肺肾同治之法也。〕

[喘症门]气治法

气虚、气实，不可不平之也。气实者，非气实乃正气虚而邪气实也。法当用补气之药，而加祛逐之品，则正气足而邪气消矣。方用：人参（一钱）白术（一钱）甘草（一钱）麻黄（一钱）半夏（一钱）柴胡（三钱）白芍（三钱）水煎服。

推而广之，治气非一条也。气陷：补中益气汤可用；气衰：六君子汤可采；气寒：人参白术附子汤可施；气虚：则用四君汤；气郁：则用归脾汤；气热：则用生脉散；气喘：则用独参汤；气动：则用二陈汤加人参，气塞：则用射干汤；气逆：则用逍遥散。

气虚则羸弱，气实则壮盛。气虚用前方，气实用另一方：枳壳（五分）白术（一钱）陈皮（五分）茯苓（三钱）甘草（一钱）柴胡（一钱）白芍（二钱）梔子（一钱）山楂（十个）水煎服。

[喘症门]气喘

凡人气喘而上者，人以为气有余也，殊不知气盛当作气虚看，有余认作不足看。若认作肺气之盛，而错用苏叶、桔梗、百部、山豆根之类，则去生远矣。方用：人参（一两）牛膝（三钱）熟地（五钱）山萸（四钱）枸杞（一钱）麦冬（五钱）五味子（一钱）胡桃肉（三个）生姜（五片）水煎服。

此方不治肺，而正所以治肺也。或疑人参乃健脾之药，既宜补肾，则不宜多用人参。不知肾水大虚，一时不能遽生，非急补其气，则元阳一钱，必且断绝。况人参少用则泛上，多用即下行。妙在用人参两许，使下达病源，补气以生肾水。方中熟地、山萸之类，同气相求，直入命门，又何患其多哉？若病重之人，尤宜多加，一两尚欠少也。

但喘有初起之喘，有久病之喘。初起之喘多实邪，久病之喘多气虚。实邪喘者必抬肩，气虚喘者微微气急耳。

此方治久病之喘方也。若初病之喘，四磨，四七汤，一剂即止。盖喘不独肺气虚，而肾水〔亦〕竭也。

[喘症门]气短

此症似喘而实非喘也，若作实喘治之，则立死矣。盖气短乃肾气虚耗，气冲于上焦，壅塞于肺经，症似有余而实为不足也。方用：人参（二两）麦冬（五钱）五味子（二钱）牛膝（三钱）熟地（一两）山萸（三钱）破故纸（三钱）枸杞（三钱）胡桃肉（三个）水煎服。

三剂气平而喘定矣。此方妙在用人参之多，能下达气原，挽回于无何有之乡。其余纯是补肺、补肾之品，子母相求，水气自旺，则火气自安于故宅，不上冲于咽门，此治气短之妙法也。

[喘症门]实喘

凡实喘之症，气大急，喉中必作声，肩必抬起，此症若重而实轻也。方用：黄芩（二钱）麦冬（三钱）柴胡（一钱）苏叶（一钱）乌药（一钱）半夏（一钱）山豆根（一钱）甘草（五分）水煎服。

一剂喘定，不必再剂也。

[喘症门]虚喘

此症气少息而喉无声，肩不抬也。此乃肾气大虚，脾气又复将绝，故奔冲而上，欲

绝未绝也。方用救绝止喘汤：人参（一两）熟地（一两）山萸（三钱）牛膝（一钱）麦冬（五钱）五味子（一钱）白芥子（一钱）水煎服。

[喘症门]抬肩大喘

人忽感风邪，寒入于肺，以致喘急、肩抬气逆，痰吐不出，身不能卧，方用：柴胡（二钱）茯苓（二钱）麦冬（二钱）桔梗（二钱）当归（二钱）黄芩（一钱）射干（一钱）半夏（一钱）甘草（一钱）水煎服。

此方妙在用柴胡、射干、桔梗，以发舒肺金之气，用半夏以去痰，用黄芩以去火。但外感寒邪，内必变为热症，故用黄芩以清解之。然徒用黄芩，虽曰清火，转足以抑遏其火气，而火未必伏也。有柴胡、射干、桔梗一派辛散之品，则足以消火灭邪矣。

[喘症门]肾寒气喘

凡人气喘〔而〕不能卧，吐痰如涌泉者，舌不燥而喘不止，一卧即喘，此非外感之寒邪，乃肾中之寒气也。盖肾中无火，则水无所养，乃泛上而为痰，方用六味地黄汤加肉桂、附子、大剂饮之。盖人之卧，必肺气与肾气相安，而居河车之路，平安而无奔越也。

[喘症门]肾火扶肝上冲

凡人肾火之逆，扶肝气而上冲，以致作喘，甚有吐红粉痰者，此〔乃〕肾火炎上以烧肺金，肺热不能克肝，而龙雷之火升腾矣。龙雷火，相火也。方用：地骨皮（一两）沙参（一两）丹参（三钱）麦冬（五钱）白芍（五钱）白芥子（二钱）桔梗（五分）甘草（三分）水煎服。

此方妙在地骨皮清骨髓中之火，沙参、丹皮以养阴，白芍平肝，麦冬清肺，甘草、桔梗引入肺经，则痰喘除而气喘定矣。

[喘症门]喘嗽

人有喘而嗽者，人以为气虚而有风痰也，谁知是气虚不能归源于肾，而肝木挟之作，崇乎？法当峻补其肾，少助以引火之品，则气自归源于肾，而喘嗽自止矣。方用：人参（一两）熟地（二两）麦冬（五钱）五味子（一钱）牛膝（一钱）枸杞（一钱）菟丝子（一钱）茯苓（三钱）白术（一钱）水煎服。

连服几剂，必有奇功。倘以四磨、四七汤治之，必不效矣。

[喘症门]假热气喘吐痰

人有假热气喘吐痰者，人以为热，而非热也，乃下元寒极，逼其火而上喘也。此最危急之症，苟不急补其肾与命门之火，则一线之微，必然断绝。方用：熟地（四两）山药（三两）麦冬（三两）五味子（一两）牛膝（一两）附子（一钱）肉桂（一钱）水煎冷服，一剂而愈。

[喘症门]贞元饮

喘而脉微涩者：熟地（三两）当归（七钱）甘草（一钱）水煎服。

妇人多有此症。

[吐血及血门]论治血宜顺性

凡人出血，乃血病不肯归经，或上或下，或四肢皮毛，各处出血者是也。血循经络，外行于皮毛，中行于脏腑，内行于筋骨，上行于头月、两手，下行于二便、两足、一脐，固身无非血路，一不归经，自然各处妄行，有孔则钻，有洞则泄，甚者呕吐，或见于皮毛，或出于齿缝，或渗于脐腹，或露于二便，皆宜顺其性而引之归经。方用：熟地（五钱）生地（五钱）当归（三钱）白芍（三钱）川芎（一钱）黑荆芥（一钱）茜草（一钱）甘草（一钱）水煎服。

此方即加味四物汤，妙在用茜草、〔荆芥〕，引血归经，〔不拂乱其性，则血自归经，各不相犯矣。〕。

[吐血及血门]阳症吐血

凡人感伤暑气，忽然吐血盈盆，人以为阴虚也，不知阴虚吐血与阳虚不同。

阴虚吐血者，人安静，不似阳虚之燥动不宁也。

阳虚必大热作渴，欲饮凉水，舌必有刺，不似阴虚之口不渴而舌滑也。法当清胃火，不必止血也。方用：生石膏（三钱）青蒿（五钱）香薷（三钱）荆芥（一钱）当归（三钱）人参（三钱）水煎服。

此方乃阳症吐血之神剂也。方中虽有解暑之味，然而补正多于解暑，去香薷一味，实可通治〔诸阳症之吐血也。〕但此方止可用一、二剂，即宜改用六味地黄汤，〔以滋其阴水，水足则阳火自消耳。〕

[吐血及血门]血不归经吐血

此症吐血，人以为火盛，用凉药以泻火，乃火愈盛而血愈多；或用止血之品仍不效〔者〕，谁知是血不归经乎？治法当用补气之药，而佐以引血归经之味，不止血而自止矣。方用：人参（五钱）当归（一两）炒丹皮（三钱）炒荆芥（三钱）水煎服。

一剂而血无不止者。此方妙在不专补血，而反去补气以补血；尤妙在不去止血，而去行血以止血。盖血逢寒则凝结而不行，逢散则归经而不逆，救死于呼吸之际，实大有奇功。

[吐血及血门]大怒吐血

有大怒后吐血，或倾盆而出，或冲口而来，一时昏晕，死在顷刻也。以止血治之，则气闷而不安；以补血治之，则胸满而不受；有变症蜂起而死者，不可不治之得法也。方用解血平气汤，白芍（二两）当归（二两）炒荆芥（三钱）黑栀子（三钱）柴胡（八分）红花（二钱）甘草（一钱）水煎服。

一剂而气平舒，二剂而血止息，三剂而病大愈。盖怒伤肝，不能平其气，以致吐血。若不先舒气而遽止血，则愈激动肝木之气，必气愈旺而血愈吐矣。方中芍药为多用之品，平肝而又舒气；荆芥、柴胡，皆引血归经之品；当归，红花，生新去旧；安有不愈者哉？

[吐血及血门]肺经吐血

六味地黄汤加麦冬、五味子，最能补肾滋肝，木得其养，则有可藏之经而不外泄，血症最宜服之。

据《石室秘录》“血治法”录如下：〔血病最忌寒凉之品，寒则凝滞而不行，难以归经。六味地黄丸、汤，妙在不寒不热，补肾水以滋肝木，肝木得养，则血有可藏之经，自然不致外泄，何至上吐？方用六味地黄汤加麦冬、五味子：〕熟地（五钱）山萸（三钱）山药（二钱）丹皮（三钱）泽泻（二钱）茯苓（二钱）麦冬（三钱）五味子（一钱）水煎服。

六味地黄汤得麦、味二味，又能清补肺金，使毛皮得养，毛孔坚固，则血难外越。肺金不干，下且足以克肝，而肝木畏金之克，又何至上犯于肺耶？故血症最宜用此方，久服三年不吐，始庆重生，否则尚在生死之间也。

[吐血及血门]吐白血

血未有不红者，何以名“白血”？不知久病之人，吐痰皆白沫，乃白血也。白沫何以名白血？以其状似蟹涎，无败痰存其中，实血而非痰也。若将所吐沫，露于星光之下，一夜必变红矣。此沫出于肾，而肾火沸腾于咽喉，不得不吐之者也。虽是白沫，而实肾中之精，岂特血而已哉？苟不速治，则白沫变为绿痰，无可如何矣。方用：熟地（一两）山萸（五钱）山药（五钱）丹皮（二钱）茯苓（五钱）泽泻（二钱）麦冬（一两）五味子（一钱）水煎服，日日服之。

[吐血及血门]三黑神奇饮

丹皮（七分炒黑）梔子（五分炒黑）真蒲黄（一钱二分，炒黑）川芎（一钱，酒洗）生地（一钱，酒洗）贝母（一钱）陈皮（七分）水二樽，童便、藕汁各半樽，煎服。此方治吐血，神效无比，二剂止。

[吐血及血门]急救吐血

吐血不止，救急方用：青柏叶（一把）干姜（三片）阿胶（一挺）共三味，水二碗，煎一碗服。

又方：

就用吐出血块，炒黑为末，每服三人，以麦冬汤调服。

又方：

以古金墨磨汁，同萝卜汁饮之。

又方：

痰带血丝，童便、竹沥止之。（《男科》中无）

又方：

茜草根末二、三钱，童便煎服。

又方：

吐血不止，藕汁加童便良。

又方：

大苏叶根，捣汁温服。

[吐血及血门]衄血

鼻血欲死，乱发烧灰，水服方寸七，仍吹之。

又方：

刀削指甲末，吹之即止。

[呕吐门]反胃大吐

大吐之症，舌有芒刺，双目红肿，人以为热也，谁知是肾水之方乎？盖脾胃必借肾水而滋润之，肾水一亏，则胃之火沸腾而上，以致目红而舌芒刺也。但此症时燥时静，时欲饮水，及水到又不欲饮，即强饮之，亦不甚快，此乃上假热而下真寒也，宜六味地黄汤加桂、附，水煎，冷服。

〔此方可治上假热而下真寒者，无不神妙奏功，大吐之症宜之耳。〕外治法：先以手擦其足心，使极热时，然后用附子一个煎汤，用鹅翎扫之，随干随扫，少顷亦不吐矣。后以六味地黄汤大剂饮之，即安然也。或服逍遥散加黄连，亦立止也。

无如世医以杂药妄投而成噎膈矣，方用：熟地（二两）山萸（一两）当归（五钱）元参（一两）牛膝（三钱）白芥子（三钱）水煎服。

盖肾水不足，则大肠必干而细，饮食入胃，不能下行，故反而上吐矣。

[呕吐门]寒邪犯肾大吐

寒邪入肾宫，将脾胃之水，挟之尽出，手足厥逆，少腹痛不可忍，以热物熨之少快，否则寒冷欲死。不知者以为胃病，而乃肾病也。方用：附子（一个）白术（四两）肉桂（一钱）干姜（三钱）人参（三两）水煎服。

下喉便觉吐定，煎渣再服，则安然如故矣。〔盖肾水养人，何能克心以死人？惟阴寒邪气，直入肾宫，则肾火外避，而诸邪挟众，逆犯心君，则不宁矣。所以必用附子、肉桂、干姜，一派辛辣之热药，而不必多用人参以定变，使诸药遍列分部，无非春温之气，自然寒邪散而吐止矣。〕

[呕吐门]肾虚呕吐

呕吐之症，人以为胃虚也，谁知是由于肾虚乎？故治吐不效，未窥见病之根也。方用：人参（三钱）白术（五钱）薏仁（五钱）芡实（五钱）砂仁（五粒）吴茱萸（五分）水煎服。

〔此方似乎治脾胃之药，不知皆治肾之味。方中取人参救胃之外，其余药品，俱入肾经，而不止留在脾也。肾火生脾，脾土生胃，胃气一转，呕吐自平，此治胃而用治肾之法，人知之乎？〕

[呕吐门]脾虚胃吐

胃吐由于脾虚，脾气不下行，自必上反而呕，补脾则胃安。方用：人参（三钱）茯苓（三钱）白术（五钱）甘草（一钱）肉桂（一钱）神曲（一钱）半夏（一钱）砂仁（三粒）水煎服。

此方治胃病以补脾土者，何也？盖胃为肾之关，关门之沸腾，由于关中之溃乱，然则欲使关外之安静，必先使关中之安宁。

况用砂仁、半夏、神曲等味，全是止吐之品，有不奏功如神者乎？此脾胃双补法也。

[呕吐门]肾寒吐泻

肾寒吐泻，由于心寒胃弱，呕吐不已，食久而出是也。下利不已，五更时痛泻三、五次者是也。此症人以为脾胃之寒，服脾胃药而不效者，何也？盖胃为肾之关，脾为肾之海。胃气弱，不补命门之火，则心包甚寒，何以生胃土而消谷食？脾气弱，不补命门之火，则下焦虚寒，何以化糟粕而生精微？故补脾胃莫急于补肾也。方用：熟地（三两）山萸（二两）茯苓（三两）人参（三两）山药（四两）附子（一两）肉桂（一两）五味子（一两）吴茱萸（五钱）蜜丸，每日空心服五钱。

〔此方之妙，全在用肾药居多，而脾胃药居少。尤妙在用热温之药，于补肾、补土之中，则火足而土健，谁知水足而生火乎？此种议论，举世未闻，岂徒托空言以示奇乎？实有至理存焉。试之无不效奏顷刻，愿世人加意此妙法也。〕

[呕吐门]火吐

此症若降火，则由脾而入于大肠，必变为便血之症，方用清火止泻汤：茯苓（一两）人参（二钱）砂仁（三粒）黄连（三钱）水煎服。

[呕吐门]寒吐

此症若降寒，则又引入肾，而流于膀胱，必变为遗尿之症，法宜散寒止吐，方用止呕散寒汤：白术（二两）人参（五钱）附子（一钱）干姜（一钱）丁香（五分）水煎服。

此方散寒而用补脾之品，则寒不能上越，而亦不得下行，势不得不从脐出也。

[呕吐门]反胃

人有食入而即出者，乃肾水虚不能润喉，故喉燥而即出也。方用：熟地（二两）山萸（五钱）山药（一两）丹皮（三钱）茯苓（五钱）泽泻（三钱）麦冬（五钱）五味子（一钱）水煎服。

[呕吐门]反胃

又有食久而反出者，乃肾火虚不能温脾，故脾寒而反出也。方用：熟地（二两）山萸（一两）山药（六钱）丹皮（三钱）茯苓（三钱）泽泻（三钱）附子（三钱）肉桂（三钱）水煎服。

[臌症门]水臌

此症满身皆肿，按之如泥者是也。若不急救，水流四肢，不得从膀胱而出，则为死症矣。方用决流汤：黑丑（二钱）甘遂（二钱）肉桂（一两）车前子（一两）水煎服。

一剂而水流斗余，二剂而痊愈，断不可与三剂也，与三剂反杀之矣。盖牵牛、甘遂，最善利水，又加之肉桂、车前子，引水以入膀胱，利水而不走气，不使牛、遂之过猛也。二剂之后，须用五苓散调理二剂，再以六君子汤补脾可也。更须忌食盐三月，犯之则不救矣。

[臌症门]气臌

此症乃气虚作肿，似水而非水也，但按之不如泥耳。必先从脚面上肿起，后渐肿至身上，于是头面皆肿者有之，此之谓之气臌。宜于健脾行气之中，加利水之品。若以水臌治之，是速之死也。方用：白术（一两）茯苓（一两）人参（一钱）甘草（一分）山药（五钱）肉桂（一分）萝卜子（一钱）枳壳（五分）薏仁（一两）车前子（一钱）神曲（一钱）水煎服。

初服若觉有碍，久之自有大功，不过三十剂而痊愈矣。忌食盐三月，秋石亦忌。

[臌症门]虫臌

此症小腹作痛，四肢浮肿而未甚，面色红而有白点，如虫食之状，眼下无卧蚕微肿之形，是之谓之血臌，方用消虫神奇丹：雷丸（三钱）当归（一两）鳖甲（一两）地栗粉（一两）神曲（三钱）茯苓（三钱）车前子（五钱）白矾（三钱）水煎服。

一剂下虫无数，二剂虫尽出而臌消，不必三剂。但病好后必须用六君子汤去甘草调理。

[臌症门]血臌

此症或因跌闪而瘀血不散，或因忧郁而结血不行，或因风邪而蓄血不散，留在腹中，致成血臌。饮食入胃，不变精血，反去助邪，久则胀，胀则成臌矣。倘以治水法逐之，而症非水，徒伤元气。倘以治气法治之，而症非气，徒增饱满。方用逐瘀荡秽汤：水蛭（炒莖为末，三钱）当归（二两）雷丸（三钱）白芍（三钱）红花（三钱）枳壳（三钱）牛膝（三钱）桃仁（四十粒）水煎服。

一剂血尽而愈，切勿与二剂，当改用四物汤调理。于补血内加白术、茯苓、人参，补元气而利水，自然痊愈，否则恐成干枯之症。

辨血臌，惟腹胀如臌，而四肢手足并无胀意也。

[水症门]水肿

此症土不能克水也。方用：牵牛（三钱）甘遂（三钱）水煎服。

〔一服则大泻水斗余，肿胀消尽，此则直夺其水势，而土得其平成也。……第服此二味之后，切不可食盐，一食盐则前病重犯，不可救矣。〕此症治法虽多，独此方奇效。其次，鸡屎醴亦效，鸡屎醴治血臌尤效。〔然鸡屎醴终不若此二味之神。盖鸡屎醴有毒，而此无毒也。〕一说前方用牛、遂各三钱，过于峻猛，不如用一钱，病去不伤本，不消再进，不失中和之道。

[水症门]呃逆

此症乃水气凌心包也。心包为水气所凌，呃逆不止，号召五脏之气，救水气之犯心也。治法当利湿分水，而呃逆自除也。方用止呃汤：茯神（一两）薏仁（一两）芡实（五钱）丁香（五钱）苍术（三钱）白术（三钱）人参（三钱）法半夏（一钱）陈皮（一钱）吴茱萸（三分）水煎服，二剂愈。

[水症门]水结膀胱

此症目突口张，足肿气喘，人以为不治之症也。〔殊〕不知膀胱与肾为表里，膀胱之开合，肾司其权也。故通其肾气，而膀胱自通矣。方用通肾消水汤：熟地（一两）山萸（钱半）山药（一两）薏仁（一两）茯神（五钱）车前子（三钱）肉桂（一钱）牛膝（一钱）水煎服。

[泄泻门]火泻寒泻辨

〔大泄之症，有火泻，有寒泻，然则将何以辨之？热与痛耳。

火泻者，口必渴，舌必燥，甚则生刺也。胎必黄，或灰黑色，腹必痛而手不能按也。

若寒泻者，口不渴，即渴亦不喜饮水，舌胎必白滑而不燥，腹痛喜手按，不按则苦是也。〕

[泄泻门]火泻

火泻，完谷不化，饮食下喉即吐，日夜有泄数十次，甚至百次者，人皆知其热也。然而热之生也，何故？生于肾中之水衰，不能制火，使胃土关门不能守于上下，所以直进而直出也。论其势之急迫，似乎宜治其标。然治其标，而不能使火之骤降，必须急补肾中之水，使火有可居之地，而后不至于上腾，方用：熟地（三两）山萸（一两）白芍（三两）茯苓（一两）车前子（一两）甘草（一两）肉桂（三分）水煎服。

此方乃补肾之药，非止泻之品，然而止泻之妙，捷如桴鼓。〔盖肾水一生，肾火即降，顷刻应验，非好为奇谈，而乃据实理也。若正作胃虚有火治之，未尝无功，不若此方之捷也。〕

[泄泻门]泻甚

有一日泻五、六十行者，倾肠而出，完谷不化，粪门肿痛，如火之热，苟无以救之，必致立亡。方用截泻汤：薏仁（二两）白芍（二两）山药（一两）车前子（一两）茯苓（五钱）泽膝（二钱）黄连（五钱）人参（三钱）甘草（二钱）肉桂（三分）水煎服。

[泄泻门]水泻

水泻，〔乃脾气不温，〕方用：白术（一两）车前子（五钱）水煎服。

此方补肾健脾，利水去湿，治泻神效。〔白术、车前子，利腰脐而消水气。然而白术亦能健脾，脾健水湿自能分消，不必借重车前子。车前子能通窍而安脏气，亦不止分消水湿已也。脏安则水湿之气自消，各有专能，又能分助，所以奏功如神耳。〕

[泄泻门]水泻

此症乃纯是下清水，非言下痢也。痢无止法，岂泻水亦无止法乎？故人患水泻者，急宜止遏，方用：白术（五钱）茯苓（三钱）车前子（一钱）五味子（一钱）生枣仁（一钱）吴茱萸（五分）水煎服。

〔此方止药少于补药，健脾去湿，水性分消，不收而自收也。〕

[泄泻门]脾泻

治脾泻，方用：上党参（四钱）焦白术（二钱）茯苓（二钱）甘草（六分）陈皮（八分）砂仁（五分）白扁豆（二钱）薏仁（三钱）谷芽（三钱）莲子肉（七个）水煎服。

又方：

又治脾泄散，方用：焦白术（四两）茯苓（三两）甘草（一两）陈皮（一两）砂仁（七钱）白扁豆（三两）薏仁（四两）谷芽（三两）莲子肉（四两）共为细末，每早服四钱，米汤或开水下。每服一钱，加人参末半分。如不用人参，则原方加上党参四两。

[痢疾门]火邪内伤辨

此辨痢疾之血色也。火邪之血，色必鲜红，脉必洪缓，口必渴而饮冷水，小便必涩而赤浊。

内伤之血，色不鲜而暗紫，或微红淡白，脉必细而迟，或浮涩而空，口不渴，即渴而喜饮热汤；小便不赤不涩，即赤而不热不浊，此诀也。

[痢疾门]血痢

〔血痢者，乃肝经来克脾土也。虽因脾土之湿，又加暑热暗侵，瓜果内伤所致。然

终因肝木太旺无制，凌脾土而然也。滋肝而平木，肝木得养，不来下克脾土，则土亦得养，而血痢自痊矣。〕〔血痢有腹痛，不痛之分：痛者，乃火也；不痛者，乃寒也。〕。

[痢疾门]血痢腹痛

血痢腹痛者，火也。方用：归尾（一两）白芍（一两）黄连（三钱）枳壳（二钱）木香（二钱）萝卜子（二钱）甘草（一钱）水煎服。

[痢疾门]血痢腹不痛

血痢腹不痛者，寒也。方用：当归（三钱）白芍（三钱）槟榔（一钱）枳壳（一钱）萝卜子（一钱）甘草（一钱）水煎服。

前方治壮实之人，火邪挟湿者。此方治寒痢腹不痛者〔血痢虽有痛、不痛之分，其实火邪，而挟湿气也。

论理二方俱可通用，而分痛、不痛，乃慎之也。二方出入减，各为神效，正不必畏首畏尾，一用之于痛，一用之于不痛也。盖火邪滞湿气于肠脾之际，不得奔下，未有不里急而后重也。妙在用当归、白芍而利之，则火邪利于直下，不止平肝木而救脾土也。〕

[痢疾门]红白痢疾

此症感湿热而成，红白相见，如脓如血，至危至急者也。苟用凉药止血，热药攻邪，俱非善治之法。方用：当归（二两）白芍（二两）槟榔（二钱）枳壳（二钱）广木香（一钱）萝卜子（一钱）甘草（二钱）滑石（三钱）水煎服。

一、二剂收功。此方妙在用归、芍二两之多，则肝血有余，不去克脾土，自然大肠有传送之功。加之枳壳、槟榔、萝卜子，俱逐秽去积之品，尤能于补中用攻。而滑石、甘草、木香，调达于迟速之间，不疾不缓，使瘀滞尽下也。其余些小痢疾，只用减半治之，无不奏功。此方不论红白痢疾，痛与不痛，服之皆神效。

又方：

当归（一两）黄芩（七钱）苍术（一钱）浓朴（一钱）陈皮（一钱）大腹皮（一钱）水二樽，煎一樽，顿服。

[痢疾门]内伤血痢

更有内伤劳倦，与中气虚寒之人，脾不摄血而成血痢，当用理中汤加木香、肉桂；或用补中益利汤加熟地、炒黑干姜，治之而始愈也。

[痢疾门]久泻血痢

经验久泻血痢，小腹作痛，神效方：秋梨（四两）生姜（五钱）趋树根皮（一两）共捣烂，夏布拧汁水，空心服之，立愈。

[痢疾门]中暑痢疾

夏日中暑，红白痢疾，方用：焦山楂（五钱）红糖（五钱）白糖（五钱）白萝卜（一个）藿香（钱半）水煎服。

若为白痢，用红糖一两，若为红痢，用白糖一两。〔若为红白痢，即用上方〕。

[大小便门]大便不通

〔大便秘结者〕，人以为大肠燥甚也，谁知是肺气燥乎？盖肺燥则肃清之气，不能下行于大肠，而肾经之水，仅足以自顾，又何能旁流以润涸哉？方用：熟地（三两）元参（三两）升麻（三钱）牛乳（一碗）火麻仁（一钱）水二碗，煎六分，将牛乳同调服之，一、二剂必大便通矣。〔此方之妙，全不在润大肠而补肾，尤妙不止补肾，而且补肺；更妙不正补肺，而且升肺。〕盖大肠居于下流，最难独治，必须从肾〔经〕以润之，从肺〔经〕以清之，启其下窍，则上窍自然流动通利矣。此下病上治之法也。

[大小便门]实症大便不通

〔大便不通，亦多实症，上方乃治虚症之方耳。此方治实症，实有奇效。方用〕：大黄（五钱）归尾（一两）升麻（五分）蜜（半杯）水煎服。

此方大黄泄利，当归以润之，仍以为君，虽泄而不至十分猛烈，不致有亡阴之弊。况有升麻以提之，则泄中有留，又何必过虑哉？

[大小便门]虚症大便不通

〔凡久病之后，大便一月不通者，不必性急，止补其真阴，使精足自生血，血足以润肠，大便自出，不可视为根本之病，而速其愈也。〕方用：熟地（一两）元参（一两）当归（一两）川芎（五钱）桃仁（十粒）火麻仁（一钱）大黄（一钱）红花（三分）蜜（半杯）水煎服。

〔此方妙在用熟地、元参、当归以生阴血，少加麻仁、大黄以润肠下行，此正末治其闭结，而不急急以通之也。〕

[大小便门]小便不通

〔小便不通，乃膀胱之病〕，膀胱之气化不行，小便即不能出。小便闭塞，治膀胱之经而已矣，然而治法全不在治膀胱也。方用：人参（三钱）莲子（三钱）茯苓（三钱）甘草（一钱）肉桂（一钱）白果（二钱）车前子（一钱）王不留（一钱）水煎服。

此方妙在用人参、肉桂。盖膀胱必得气化而始出。气化者何？心胞络之气也。〔膀胱必得心包络之气下行，而水路始能出。〕既用参、桂，而气化行矣，尤妙在用白果，人多不识此意。白果通任、督之脉，又走膀胱，（引参、桂之气，直奔于膀胱之中），况车前子，王不留尽是下泄之药，服之而前阴有不利者乎？

[大小便门]肾虚小便不通

小便不通，方用：熟地（一两）山萸（四钱）丹皮（一钱）山药（一钱）肉桂（一钱）车前子（一钱）泽泻（一钱）茯苓（二钱）此方〔即七味地黄汤〕，妙在不去通小便，而专治肾水。肾中有水，而膀胱之气自行矣。盖膀胱之开合，肾司其权也。

[大小便门]大小便不通

方用：头发烧灰研末，用三指一捻，入热水半碗，饮之立通。

又方：

蜜一茶杯，皮硝一两，大黄一钱，黄酒一杯，煎一处，温服甚效。

按：上二方，《方论》、《男科》、《石室秘录》均同。皮硝用一两，慎之。

[大小便门]尿方

为风寒湿气伤者，用此方：小茴香二两，用上好真酒（即二锅头烧酒）一大碗，猪尿泡一个，将茴香（微炒）、真酒装入泡内，将口控（捆）好，砂锅内用水上火煮，以酒尽为度，取出晒干研末，每服三钱，红糖水冲服。

又方：因人事过多伤者，用此方：川军三钱研末，用鸡子一个，包入泥内，上火烧

之，以熟为度，去皮、黄，将川军末与鸡白共为一处和丸，梧子大，每服二钱，真酒送下。连造三次，服完痊愈矣。

又方：

川军三钱，牡蛎三钱，芡实三钱，共为细末，用鸡清和丸，梧子大，每服三钱，开水送下，分三日用，服完即愈。

又方：

用八味丸原方，加白果七个，水煎服，三、五服即愈。

[痛疼门]论诸痛治肝

〔凡人〕手痛，足痛，心腹痛，一身而众处皆痛，将何以治？治肝为主。盖肝气一舒，诸痛自愈。不可头痛救头，足痛救足也。方用：当归（二钱）白芍（五钱）柴胡（一钱）茯苓（五钱）苍术（二钱）甘草（一钱）薏仁（五钱）栀子（一钱）陈皮（一钱）水煎服。

此方逍遥散之变方也，舒肝而又去湿，去火，治一经而诸经无不愈也。

[痛疼门]肩背痛

两臂肩膊痛

〔臂与肩膊痛，〕乃手经之病，肝气之郁也。方用：当归（三两）白芍（三两）柴胡（五钱）陈皮（五钱）白芥子（三钱）羌活（三钱）半夏（三钱）秦艽（三钱）附子（一钱）水六碗，煎沸，取汁一碗，入黄酒服之，一醉而愈。

此方妙在用白芍为君以平肝〔舒〕木，不来侵克脾胃之气，而羌活、柴胡又善去风，直走手经之上；秦艽亦是风药，而兼附子攻邪，邪自退出；半夏、陈皮、白芥子祛痰圣药；风邪去而痰不留；更得附子无经不达，而其痛如失也，〔自然一醉而愈〕。

背骨痛

此症乃肾水虚耗，不能上润于脑，则河车之路，干涩而难行，故作痛也。方用：熟地（一两）山萸（四钱）黄（一两）白术（五钱）茯苓（三钱）麦冬（二钱）五味子（一钱）防风（五分）附子（一分）水煎服。

（二剂膀胱之水道通，而背脊之痛亦失矣。）此方补气补水，去湿去风，润筋滋骨，何痛之不愈哉？

胸背手足颈项腰膝痛

筋骨牵引，坐卧不得，时时走易不定，此是痰涎伏在心膈上下，或令人头痛，夜间喉中如锯声，口流涎唾，手足重，腿冷。但用控涎丹，不足十剂，其疾如失矣。

[痛疼门]胁痛

胁痛

此乃肝病也，故治胁痛者，必须平肝，平肝必须补肾，肾水足而肝气有养，不治胁痛而胁痛自平也。方用肝肾兼资汤：熟地（一两）山萸（五钱）当归（一两）白芍（二两）白芥子（三钱）黑栀子（一钱）甘草（三钱）水煎服。

左胁痛

左胁痛，肝经受邪也。方用：黄连（三钱，吴茱萸炒）柴胡（一钱）青皮（一钱）桃仁泥（一钱）枳壳（一钱）当归（一钱）川芎（八分）红花（五分）水煎食远服。

有痰加陈皮、半夏。

右胁痛

右胁痛，邪入肺经也。方用：片姜黄（二钱）枳壳（二钱）桂心（二分）陈皮（五分）半夏（五分）炙草（五分）水煎服。

左右胁俱痛

〔左右胁俱痛者〕，方用：柴胡青皮当归川芎白芍龙胆草枳壳香附砂仁甘草木香姜水煎服。（原缺分量）

两胁走注痛

两胁走注痛而有声者，痰也。二陈汤（陈皮、半夏、茯苓、甘草）去甘草，加：枳壳砂仁木香青皮苍术香附茴香水煎服。（原缺分量）

两胁有块痛

左肋有块作，是死血也。右肋有块作痛；是食积也。遍身作痛，筋骨尤甚，不能伸屈，口干目赤，头眩痰壅，胸膈不利，小便短赤，夜间殊甚。又遍身作痒如虫行，人以为风也，而不知肝、肾气虚而热也，用六味地黄汤（熟地、山萸、丹皮、山药、茯苓、泽泻）加梔子，柴胡，是乃正治也。三剂后见效。

胁痛身热

胁痛身热者，劳也。用补中益气汤（人参、白术、陈皮、柴胡、升麻、当归、黄、甘草）加川芎、白芍、青皮、砂仁、枳壳、茴香，去黄，水煎服。（原缺分量）

胁痛咳嗽

咳嗽气急，脉滑数者，痰结痛也。方用：栝蒌仁枳壳白芥子青皮茴香水煎服。（原缺分量）

[痛疼门]心腹痛

心痛辨

心痛之症有二，一则寒邪侵心而痛，一则火气焚心而痛。

寒气侵心者，手足反温；火气焚心者，手足反凉；以此辨之最得矣。心不可使痛，或寒、或火，皆冲心包耳。

寒痛

寒痛方用：

良姜（三钱）肉桂（一钱）白术（三钱）草乌（一钱）贯仲（三钱）甘草（一钱）水煎服。

热痛

热痛方用：

炒梔子（三钱）白芍（五钱）柴胡（一钱）半夏（一钱）甘草（一钱）水煎服。

心口痛

〔此症方用〕：大枣（一个，去皮核）胡椒（七个）共捣烂和匀，米汤送下即愈。

又方：

一个乌枚两个枣，七个杏仁一块捣，男酒女醋送下去，不害心痛直到老。

久病心痛

〔心痛，人以为病在心也。不知〕心乃神明之君，一毫邪不可干犯，犯则立死。〔人病心痛〕，终年累月而不愈者，〔非心痛也〕，乃邪犯心包络也。但邪有寒热之辨：〔寒邪之犯〕必恶寒，见水如仇讎，火慰之则快。方用：苍术（二钱）白术（五钱）当归（一两）肉桂（一钱）良姜（一钱）水煎服。

〔此寒邪犯包络之方也。〕〔更有热邪来犯包络者，热邪之犯〕，见水喜悦，手按之而转痛也。方用：白芍（一两）炒梔子（三钱）当归（三钱）生地（五钱）陈皮（八分）甘草（一钱）水煎服。

寒热二症，皆责之于肝也。肝属木，心属火，木衰不能生火，则包络寒矣，是宜补肝而邪自退。若包络之热，亦由于肝经之热也，泻其肝木，而火自消矣。

火结腹痛

人有腹中痛不可忍，按之愈痛，口渴，饮以凉水，则痛少止，少顷，依然大痛，此火结在大小肠也。若不急治，一时气绝，方用定痛如神汤：梔子（三钱）白芍（五钱）茯苓（一两）苍术（三钱）大黄（一钱）浓朴（一钱）甘草（一钱）水煎服。

此方舒肝经之气，利膀胱之水，泻火逐瘀。

冷气腹痛

冷气心腹痛，方用火龙丹：硫黄（一两，醋制）胡椒（一钱）白矾（四钱）醋打荞麦面为丸，桐子大，每日服二十五丸，米汤下。

痞块腹痛

腹中有痞块，一时发作而痛，不可手按者，方用：枳实（一两）白术（二两）马粪（五钱）炒焦酒煎服。

〔盖马粪最能安痛，又不伤气，且能逐邪而化物，况又与枳实同用，则积块日消，然而徒消其积，未免恐伤脾阴，又佐以白术二两，大健其脾气，则马粪与枳实，可以施其祛荡之功，此堕治之妙法也。〕

胃气痛

人病不能饮食；或能饮食而不消化，作痛作满，或兼上吐下泻，此肝木来克脾土也。〔平其肝木，则脾胃之土得养，而前症俱愈矣。〕方用：当归（二钱）白芍（三钱）柴胡（二钱）茯苓（三钱）白术（三钱）甘草（一钱）白芥子（一钱）水煎服。

有火加栀子二钱，无火加肉桂二钱，有食加山楂三钱；伤米食加枳壳一钱、麦芽一钱；有痰加半夏一钱。（方中虽有白术、茯苓，乃脾胃之品，然其性亦能入肝。白芍、当归、柴胡，则纯是肝经之正药，有此三味直入肝经，则各药无不尽入肝以平木，木平则脾胃之土安然，遂有食则化食，有痰则祛痰，有火则散火，有寒则去寒，有不功效立奏者乎？此右病而左治之一法也。）

食生冷心脾痛

治食生冷心脾痛，方用：用陈吴茱萸五、六十粒，水一大盏，煎取汁去滓，入平胃散三钱，再煎热服。

[痛疼门]腰腿痛

湿气腰痛

腰痛而不能俯者，湿气也。方用：柴胡（一钱）泽泻（一钱）猪苓（一钱）防己（二钱）白术（五钱）肉桂（三分）白芥子（一钱）山药（三钱）甘草（五分）水煎服。

此方妙在入肾而去湿，不是入肾而补水，初痛者，一二剂可以奏功。日久者，必多服为妙。

风寒腰痛

腰痛而不直者，风寒也。方用逍遥散加防己二钱，一剂可愈。若日久者，当加杜仲一两，改用白术二钱，酒煎服，十剂即愈。

肾虚腰痛

肾经之病，如腰之痛，方用：熟地（三两）白术（三两）胡桃仁（二钱）杜仲（一两，盐水炒）破故纸（一两，盐水炒）蜜丸，每日空心白水送下一两，服完自愈。如未痊愈，再服一料可愈。

又方

肾虚腰痛，方用：杜仲酒浸透，炙干为末，无灰酒调下。每服一、二钱。

脾湿腰痛

凡痛不止者，肾经之病，乃脾湿之故。方用：白术（四两）薏仁（三两）芡实（二两）水六碗，煎一碗，一气饮之。

此方治梦遗之症，亦神效。

〔此方之妙，在用白术以去腰脐之湿气，而薏仁，芡实又为去湿之味，湿去而腰脐自利，自无痛楚矣。〕

腰腿筋骨痛

此症方用养血汤：当归（一钱）生地（一钱）肉桂（一钱）牛膝（一钱）杜仲（一钱）破故纸（一钱）茯苓（一钱）防风（一钱）山萸（二钱）土茯苓（二钱）核桃仁（二个）川芎（五分）甘草（三分）水酒煎服。

腰痛足亦痛

腰痛，足亦痛，方用：黄（半斤）防风（五钱）茯苓（五钱）薏仁（五钱）杜仲（一两）车前子（三钱）肉桂（一钱）水十碗，煎二碗，入黄酒内，〔一醉而愈。以上皆风入四肢、头上、背间、腰以下也。借黄酒一味，无经不达，弘其药味，而直入病中也。此所谓完全治法也。〕腰足痛，明系是肾虚而气衰，〔不能运动〕，更加之湿，自必作楚。〔此方〕妙在不补肾而单益气，盖气足则血生，血生则邪退。又助之茯苓、薏仁、车前之类去湿，去湿而血活矣。况又有杜仲之健肾，肉桂之温肾，防风之荡风乎？〔相畏而相使，相佐而相成，必然之理也。〕

寒湿腿痛

此症身不离床褥，伛偻之状可掬，乃寒湿之气侵也。方用：白术（五钱）芡实（三钱）茯苓（一两）萆（一两）肉桂（一钱）杜仲（三钱）薏仁（二两）水煎服。

日日服之，不必改方，久之自奏大功。

〔此方之妙，妙在薏仁能入骨而去水，加芡实健脾以去湿，不使湿以增湿，而牛膝、萆苢又是最利双足之品；且加肉桂引经，直入骨中，湿有不去，痛有不止者乎？〕

伤风腿痛

〔此症〕方用：蒜瓣（三钱）荆芥（三钱）防风（三钱）红花（三钱）地骨皮（三钱）川乌（三钱）草乌（三钱）乳香（三钱）没药（三钱）透骨草钱半煎汤洗毕，火干，覆被见汗即愈。如未效，再洗二、三次。

腰腿痛

〔此症〕方用木耳丸：萆苢子（四两）枸杞子（四两）白木耳（半斤）蜜丸（每服二钱）。

此方《方论》有，《男科》无。

[痛疼门]手足痛

〔手足之痛者，人以为脾经之热，不知非脾热也，乃肝木之郁结也。散其郁气，则手足之痛自去矣。〕方用逍遥散加：梔子（三钱）半夏（二钱）白芥子（二钱）水煎服。

二剂其痛如失。盖肝木作祟，脾气不敢当其锋，气散于四肢，结而不伸，所以作楚。今一旦平其肝气，则脾气自舒矣。〔脾气舒而痛在手足，有不尽除者乎？〕

足弱

此病不能步履，人以为肾水之虚，谁知由于气虚而不能运动乎？方用补中益气汤加：牛膝（三钱）石斛（五钱）黄（一两）人参（三钱）水煎服。

〔三剂即足生力，四剂可以步履矣。盖人参、术，皆补气之圣药，而牛膝、石斛，亦健足之神剂，所以用之而历成也。〕

筋缩

凡人一身之筋脉，不可有病，病则筋缩而身痛，脉涩而体重矣。然筋之舒在于血和，而脉之平则于气足。故治筋必须先治血，而治脉必须先补气。人若筋急拳缩，伛

倮而不能立，俯仰而不能直者，皆筋病也。方用：当归（一两）白芍（五钱）薏仁（五钱）生地（五钱）元参（五钱）柴胡（一钱）水煎服。

此方奇在用柴胡一味，入于补血药中，盖血亏则筋病，用补血药以治筋宜矣，何以又用柴胡以散之？不知肝为筋之主，筋乃肝之余，肝气不顺，筋自缩急，〔甚而伛倮〕，今用柴胡以舒散之，郁气既除，而又济之大剂补血之品，则筋自得其养〔而宽，筋宽则诸症悉愈矣。〕

[麻木门]麻木

凡麻木是湿痰死血也，用四物汤加陈皮、半夏、茯苓、白芥子、桃仁、红花、甘草，水煎服，入竹沥、姜汁服。

[麻木门]手麻木

此乃气虚而寒湿中之，如其不治，三年后必中大风。方用：人参（二钱）白术（五钱）黄（五钱）防风（五分）陈皮（五分）桂枝（五分）甘草（一钱）水煎服。

〔方中黄、人参、白术，俱补气去湿之药；防风乃去风之品，必得桂枝始能入于手经也。经络既清，自能奏功也。〕

[麻木门]十指麻木

十指皆麻，面目失色，此亦气虚也。治以补中益气汤加木香、麦冬、香附、羌活、乌药，防风，水煎服，三剂可愈。

[麻木门]手足麻木

〔双足麻木，不能履地；双手麻木，不能执物是也。〕方用四物汤加：人参、白术、茯苓、陈皮、半夏、桂枝、柴胡、羌活、防风、秦艽、牛膝、炙草、姜枣引，水煎服，四剂愈。

[麻木门]腿麻木

凡腿麻木沉重，方用导气汤：黄（二钱）甘草（钱半）青皮（一钱）升麻（五分）柴胡（五分）归尾（五分）泽泻（五分）陈皮（八分）红花（少许）五味子（三十粒）水煎温服，甚效。

[麻木门]两手麻木困倦嗜卧

两手麻木，四肢困倦，怠惰嗜卧，此乃热作元气也。方用人参益气汤：人参（一钱）黄（二钱）甘草（一钱）炙草（五分）柴胡（七分）白芍（七分）升麻（五分）五味子（卅粒）生姜（三片）大枣（二枚）水煎温服。

[麻木门]浑身麻木

凡人浑身麻木不仁，两目羞明怕日，眼涩难开，视物昏花，睛痛亦治，方用神效黄汤：黄（一钱）陈皮（五分）人参（八分）白芍（一钱）蔓荆子（二分）炙甘草（四分）水煎服，如有热，加黄柏三分。

[麻木门]麻木痛

风寒湿三气合而成病，客于皮肤肌肉之间，或痛、或麻木，方用：牛皮胶（二两）南星（五钱）姜汁（半碗）共熬膏，摊贴，再用热鞋底熨之。加羌活、乳香、没药更妙。

[浊淋门]二浊五淋辨

浊、淋二症，俱小便赤也。浊多虚，淋多实，淋痛、浊不痛为异耳。浊、淋俱属热症，大约属湿痰下陷及脱精所致。

惟其有痛，大约纵淫欲火动，强留败精而然，不可混治。

[浊淋门]淋症

〔此症〕方用五淋散：淡竹叶（二钱）赤茯苓（一钱）芥穗（一钱）车前子（五钱）灯心（一钱）水煎服。

[浊淋门]浊症

〔此症〕方用清心莲子饮：石莲子（二钱半）人参（二钱半）黄（一钱半）地骨皮（一钱半）车前子（一钱半）赤茯苓（二钱）黄芩（一钱半）麦冬（一钱半）甘草（五分）水煎服。

[肾病门]阳强不倒

此虚火炎上，而肺金之气不能下行故耳。若用黄柏、知母，煎汤饮之，立时消散。然自倒之后，终年不能重振、是亦苦也。方用：元参（三两）麦冬（三两）肉桂（三分）水煎服。

此方妙在元参以泻肾中之火，肉桂入其宅，麦冬助肺金之气，清肃下行，以生肾水，水足则火自息矣，不求倒而自倒也。

[肾病门]阳痿不举

阳痿而不振者，乃平日过于琢削，日泄其肾中之水，而肾中之火，亦日消也。盖水去而火亦去，必然之理。

如一家人口，厨下无水，何以为炊？必有水而后取柴炭以煮饭，不则空铛也。方用：熟地（一两）山萸（四钱）远志（一钱）巴戟（一钱）肉苁蓉（一钱）杜仲（一钱）肉桂（二钱）茯神（二钱）人参（三钱）枸杞（三钱）白术（五钱）水煎服。

〔一剂起，二剂强，三剂妙。此方用熟地于补水之中则火起，而不愁炎烧之祸，自然煮汤可饮，煮米可食，断不致焦釜沸干，或虞爆碎也。〕

[肾病门]疝气

此症方用去铃丸：生姜一斤，将姜汁入茴香内浸一宿，入青盐二两，和匀，同炒研为米，酒糊为丸，每服三十丸，温酒或米饮送下。

[肾病门]肾子痛

肾子大痛，方用：泽泻（一钱）陈皮（一钱）赤茯苓（一钱）丹皮（五分）小茴香（五分）枳壳（五分）苍术（五分）山楂（四分）苏梗（四分）姜、水煎服。

又方

酒炒大茴香、酒炒小茴香、赤石脂（）、广木香，各等分，研末和匀，乌梅肉捣烂为丸，如梧子大，空心每服十五丸，葱、酒汤送下，立效。

[肾病门]偏坠

此症方用：小茴香、猪苓等分，微炒为末，空心盐水冲服（原缺分量）。

又热盐熨，甚神效。

[杂方]统治诸疮

方用：天花粉（五钱）生甘草（二两）金银花（四两）蒲公英（二两）当归（二两）

）水煎服。

二剂痊愈。此方消毒，大有奇功，诸痈诸疽，不论部位，皆治之。〔金银花能内消疮毒，然非多用，则力轻难以成功。生甘草一味，已足解毒，况又用之于金银花内，益足以散邪而益正，蒲公英阳明经药也，且能散结逐邪；天花粉消痰圣药；当归活血，是其专功，今血活而痈自愈。此方之所以奇而肆也。〕

[杂方]疮毒

〔治小疮毒，如神，方用：〕金银花（一两）当归（一两）蒲公英（一两）荆芥（一钱）连翘（一钱）甘草（三钱）水煎服。

〔一剂轻，二剂消，三剂愈。此明治之妙法，人亦宜知之，不可忽也。头上疮最不可用升药，切忌切忌！下病宜升，而上病不宜升也。头上疮最宜用降火之药。〕

[杂方]头面上疮

治头面上疮，方用：金银花（二两）当归（一两）川芎（五钱）桔梗（三钱）蒲公英（三钱）黄芩（一钱）甘草（五钱）水煎服。

二剂全消。治头面上疮，不可用升提之药，最宜用降火之药，切记之。

[杂方]黄水疮

〔凡毒水流入何处，即生大水泡疮，名为黄水疮，手少动之即破，此热毒郁于皮毛也，当以汤洗之即愈。方用：〕雄黄（五钱）防风（五钱）〔二味用水十碗，煎数沸，去滓取汁，洗疮上即愈。〕

[杂方]身上手足疮疽

身上手足之疮疽，方用：金银花（三钱）当归（一两）蒲公英（三钱）天花粉（五钱）甘草（三钱）芙蓉叶（七片，如无叶，用根三钱）水煎服。

[杂方]腿上湿疮

治腿上湿疮方：榆条（一两）椿条（一两）桑条（一两）槐条（一两）荆芥（一两）当归（一两）葱胡（一撮）蒜瓣（一撮）川椒（一撮）水十碗，煎五碗洗。洗后，敷以银杏散：银朱（一两）杏仁（五钱）京粉（五钱）研细末。

[杂方]疥疮

〔皮毛治法者，感轻之症，病未深入营卫，从皮毛上治之也。如疥疮、黄水疮、痒疮，此等之症，不必用汤药。疥疮用：〕大枫子（三钱）人言（一钱）核桃仁（三钱）水银（一钱）研为细末，捣为六丸，晚间于心窝上，用一丸以手旋转之，一夜一丸。病轻者用三、四丸即愈，病重者再配一料可愈。

[杂方]阴虚双蛾

阴虚双蛾，方用：附子（一钱），盐水炒，每用一片，含口中，后以六味地黄汤，大剂饮之。

外治法：引火下行，用附子一个为末，醋调，贴涌泉穴。或吴茱萸一两、白面五钱，水调，贴涌泉穴。急针刺少高，则咽喉有一线之路矣。

[杂方]洗眼仙方

防风（五分）硼砂（一厘）胆矾（二厘半）同煎水洗之立愈。

[杂方]洗眼奇方

方出《道藏》，不论瞽目、犯土、云雾、风眼、火眼、昏花，久洗自明。〔方〕用：皮硝（六钱）桑白皮（一两）水煎。

每遇日期，热洗数十次。正月初五、二月初二、三月初三、四月初九、五月初五、六月初四、七月初三、八月初十、九月十二、十月十二，十一月初四、十二月初四。

以上吉星日子，乃通光明也。其方千金不易，屡用屡效。

[杂方]明目补肾方

小红枣（十二枚，冷水洗净去核）甘枸杞（三钱）马料豆（四钱）水二碗，煎一碗，早晨空心连汤共食之。

[杂方]饮砒毒

用生甘草三两，（水煎汤），加羊血半碗，和匀饮之，立吐而愈。若饮之不吐，速用：大黄（二两）甘草（五钱）白矾（一两）当归（三两）水煎汤数碗饮之，立时

大吐即生。

[杂方]破伤风

破伤风，方用：蝉退（蜕）去净头足，为末五钱，用好酒一碗，煎滚，入末调匀，服之立效。

[杂方]喉闭

治喉闭方：用梧桐子一、二十粒，研细，少加醋，服下痰去自愈。

[杂方]疯狗咬伤

方用：手指甲焙黄为末，黄酒冲服，发汗即愈。忌房事百日。

[杂方]时行瘟病

急治时行瘟病，方用：藿香（二钱）紫苏（钱半）苍术（钱半）赤茯苓（三钱）白芷（一钱）陈皮（钱半）姜川朴（一钱）姜半夏（钱半）碎乌梅（四个）槟榔（一钱）桔梗（一钱）引加生姜（三片）大枣三枚，水三杯，煎一杯，温服。

[杂方]人马平安散

明雄黄（一钱）朱砂（一钱）冰片（一分三厘）麝香（一分五厘）共为细末，瓷瓶收贮。

治男女大小心口臌闷，水泻痢疾，心腹痛疼等症。用骨簪，男点左眼，女点右眼，点之即愈。兼治牛马猪羊等畜。

[杂方]五子衍宗丸

男服此药，添精补髓，疏利肾气，不问下焦虚实寒热，服之自能和平：旧称古今第一种子方。有能世世服此药，子孙蕃衍。

枸杞子（八两）菟丝子（八两）车前子（二两）五味子（二两）覆盆子（四两）上药俱选地道精新者，焙晒干，共为细末，炼蜜为丸，梧桐子大，每空心服九十丸，上床时服五十丸，白汤或盐汤送下；冬月用温酒送下。

[杂方]百子附归丸

女服此药，调经养血，安胎顺气。不问胎前产后，经事参差，有余不足诸症，悉皆治之，殊益胎嗣。此本太仆吏鲍璧，台州人，其妻三十年不育，忽经事不至者十月，腹臃大无病，皆谓妊娠，一日忽产恶物盈桮，视之皆败痰积血。后服此方，不期年生一子。张云：彼尝以此二方（即上方及此方）与人，服无不应者。

阿胶（二两）蕲艾（二两）当归（二两）川芎（二两）白芍（二两）熟地（二两）香附（二两）杵成米粒样，水、醋各浸一宿，晒，焙干为十二两，研为细末。用大陈石榴一枚，连皮捣碎，东流水（即河水）三升熬，去滓，面糊为丸，梧子大，每服百丸，空心陈醋点汤下。

[杂方]手汗

〔人有手汗出者〕，洗法用：黄（一两）葛根（一两）荆芥（三钱）防风（三钱）水煎汤一盆，热熏而温洗，三次即无汗，〔神方也〕。

[杂方]疟疾

疟疾方用遇仙丹：生大黄（六两）槟榔（三两）三棱（三两）莪术（三两）黑丑（三两）白丑（三两）木香（二两）甘草（一两）共为细末，水丸，樱桃大。

如遇发日，清晨温水化下三、四丸，药行后以温米饭补之。忌腥冷、荞面等物。孕妇勿服。

女科杂方

先生本有《女科》传世，此数条《女科》未载，故存之。为保持《方论》、《男科》原貌，故应保留之。

[女科杂方]白带

产前无带也，有则难产之兆。即幸而顺生，产后必有血晕之事，方用：黑豆三合，水三碗，煎汤二碗，入白果十个，红枣十个，再煎一碗，入：熟地（一两）山萸（四钱）山药（四钱）丹皮（二钱）茯苓（三钱）泽泻（二钱）薏仁（四钱）再加水二碗煎服。

一剂止，二剂永不白矣。亦通治妇人白带无不神效。

[女科杂方]血崩

归身（一钱）生地钱（二分）蒲黄（三分）地榆（三分）丹皮（五分）木通（五分）焦白术（一钱）桔红（七分）香附（五分）三七根（五分）生姜（三片）黄酒（一樽）水（一樽）煎九分，空心服。

[女科杂方]子悬

此乃胎热，子身不安，欲立起于胞中，故若悬起之象。若作气盛治之，立死矣。方用：人参（二钱）白术（五钱）茯苓（二钱）黄芩（三钱）白芍（五钱）当归（二钱）熟地（一两）生地（二钱）杜仲（一钱）水煎服。

此皆利腰脐之圣药，少加黄芩，则胎寒而自定矣。

[女科杂方]胎漏胎动

此两症俱气血不足之故，方用：人参（二钱）白术（五钱）茯苓（一钱）甘草（一钱）熟地（五钱）山萸（二钱）山药（二钱）当归（一钱）杜仲（一钱）枸杞子（一钱）麦冬（二钱）五味子（五分）水煎服。

此方不寒不热，安胎之圣药也。胎动为热，不动为寒。

[女科杂方]产门疮，

方用：炒黄柏（三钱）蚯蚓粪（三钱）白薇（三钱）乳香（三钱）铅粉（三钱）潮脑（三钱）轻粉（五分）冰片（五分）儿茶（二钱）麝香（三分）共为细末调匀擦疮此方通治诸疮亦可，治产门疮最效。

[女科杂方]产门痛痒

产门非痛即痒，下方可以兼治：当归（一两）白芍（五钱）柴胡（一钱）茯苓（五钱）栀子（三钱）楝树根（五分）水煎服。

[女科杂方]横生倒养

气血之亏也，气血既亏，子亦无力，不能转身而出，遂先出手足，必以针刺之，痛而缩入，急用：人参（一两）当归（三两）川芎（二两）红花（三钱）煎汤灌之。

[女科杂方]产后治法

产后以补气血为主，方用：人参（三钱）当归（一两）川芎（五钱）黑荆芥（一钱

）益母草（一钱）水煎服。

有风，加柴胡五分；有寒，加肉桂五分；血不净，加山楂十粒；血晕，加炮姜五分；衄血，加麦冬二钱；夜热，加地骨皮五分；有食，加谷芽、山楂；有痰，少加白芥子。余不必胡加。

[女科杂方]产妇气喘腹痛

此症少阴受其寒邪，而在内之真阳，必逼越于上焦，上假热而下真寒也，方用平喘祛寒汤：人参（三钱）麦冬（三钱）白术（五钱）肉桂（二钱）吴茱萸（一钱）水煎服。

一剂喘定，二剂痛止，必微凉顿服。

[女科杂方]产后大喘大汗

此乃邪入于阳明，寒变为热，故大喘大汗。平人得此病，当用白虎汤，而产妇气血大虚，何可乎？方用补虚降火汤：麦冬（一两）人参（五钱）元参（五钱）桑叶（十四片）苏子（五分）水煎服。

此方以麦冬、人参补气，元参降火，桑叶止汗，苏子定喘，助正而不攻邪，邪退而不损正，实有奇功也。

[女科杂方]产妇呕吐下痢

此肾水泛溢，因肾水之衰也。急用补阳之药入于补阴之中，引火归源，水自下行矣。方用：熟地（一两）山萸（五钱）人参（五钱）白术（一两）茯苓（一两）车前子（一钱）附子（一钱）肉桂（三分）水煎服。

[女科杂方]产后亡阳发狂

大抵亡阳之症，用药汗止，便有生机，宜先止汗，而后定狂，方用收汗汤：人参（三两）桑叶（三十片）麦冬（二两）元参（一两）青蒿（五钱）水煎服。

一剂汗止，二剂狂定。后改用人参，麦冬、五味子、当归、川芎调理。此方可救亡阳之急症，一时权宜之计，二剂后，必须改用他方。

[女科杂方]乳痛

治乳痛，方用：生半夏一个研末，葱白一寸，捣为泥，用绢包之，左乳痛，塞入右鼻孔内；右乳痛，塞入左鼻孔内。（《方论》中有，《男科》中无）。

[女科杂方]附益丸

妇人常服却病方：香附一斤（童便浸透），水洗净，露一宿，晒干，再如此三次，用益母草十二两烘干，共为细末。再用香附四两，艾叶一两煮汁，加醋大半，糊丸梧子大，每日服百丸，空心下。

此方能治妇人百病，生育之功如神。胎前产后俱服，神妙无比，而功效倍常，仙方也。

[小儿科]小儿色

以鼻之上，眼之间辨之。色红者，心热也；红筋横、直现于山根者，皆心热也。色紫者，心热之甚，而肺亦热也。色青者，肝有风也；青筋横现、直现者，皆肝热也；直者风上行，横者风下行也。色黑者，风甚而肺中有寒。

色白者，肺中有痰。色黄者，脾胃虚而作泻。现其色，而病可知矣。

[小儿科]小儿脉

大人看脉于寸、关、尺，小儿不然，但看其数不数而已。数甚则热，不甚则寒也。数之中浮者，风也。沉者，寒也。缓者，湿也。涩者，邪也。滑者，痰也。有止歇者，痛也。如此而已，余不必谈。

[小儿科]三关

小儿虎口风、气、命三关，紫属热，红属寒，青属惊风，白属疳。风关为轻，气关为重，若至命门，则难治矣。

[小儿科]小儿气色

山根之上，有青筋直现者，乃肝热也。方用：柴胡（三分）白芍（一钱）当归（五分）半夏（三分）白术（五分）茯苓（一钱）山楂（三粒）甘草（一分）水煎服。

有青筋横现者，亦肝热也。但直者风上行，横者风下行，亦用前方，加柴胡五分，麦芽一钱，干姜一分，水煎服。

有红筋直现者，心热也，亦用前方，加黄连一分，麦芽五分，去半夏加桑白皮、天花粉各二分，水煎服。

有红筋斜现者，心热也，亦用前方，加黄连二分。热积于胸中者，不可用半夏，用桑白皮、花粉可也。

又有黄筋现于山根者，不论横直，总是脾胃之症，或吐泻，或腹痛，或不思食，方用：白术（五分）茯苓（五分）陈皮（三分）人参（二分）神曲（一分）甘草（一分）麦芽（二分）淡竹叶（七片）水煎服。

有痰者，加半夏一分、白芥子三分。如口渴有热者，加麦冬三分、黄芩一分。有寒者，加干姜一分。吐者，加白豆蔻一粒。泻者，加猪苓五分。腹痛而按之大叫者，食也，加大黄三分、枳实一分。按之不号叫者，寒也，加干姜三分。如身发热者，不可用此方。

[小儿科]发热

不拘早晚发热，俱用万全汤，神效：柴胡（三分）白芍（一钱）当归（五分）白术（三分）茯苓（二分）甘草（一分）山楂（三粒）黄芩（三分）苏叶（一分）麦冬（一钱）神曲（三分）水煎服。

冬加麻黄一分，夏加石膏三分，春加青蒿三分，秋加桔梗三分。有食加枳壳三分，有痰加白芥子三分，吐者加白豆蔻一粒，泻者加猪苓一钱。小儿诸症，不过如此，不可作惊风治之。如其有惊风，加人参五分，其效如神。

又方：

凡潮热。积热、疟热、乃脾积寒热，俱当用姜梨引。

柴胡人参黄芩前胡秦艽甘草各一分青蒿（童便浸，晒干，一分）生地（一寸）薄荷（二叶）生梨、或生藕一片水煎热，甚效。

[小儿科]感冒风寒

柴胡（五分）白术（一钱）茯苓（三分）陈皮（二分）当归（八分）白芍（一钱）半夏（三分）炙草（三分）水煎热服。

[小儿科]痢疾

方用：当归（一钱）黄连（二分）白芍（一钱）枳壳（五分）槟榔（五分）甘草（三分）水煎热服。

红痢倍黄连，白痢加泽泻三分，腹痛倍甘草、白芍，小便赤加木通三分，下如豆汁加白术一钱，伤食加山楂、麦芽各三分，气虚加人参三分。

[小儿科]疟疾

方用：柴胡（六分）白术（一钱）茯苓（一钱）当归（一钱）白芍（钱半）半夏（五分）青皮（五分）浓朴（五分）水煎露一宿，再温与服。

热多者，加人参、黄各五分；寒多者，加干姜三分；痰多者，加白芥子一钱；夜发烧者，加何首乌、熟地各二钱；日发热者，不用加；腹痛者，加槟榔三分。

[小儿科]咳嗽

方用：苏叶（五分）桔梗（一钱）甘草（一钱）水煎热服，有痰加白芥子八分。

[小儿科]惊风

世人动曰惊风，谁知小儿惊则有之，而风则无。小儿纯阳之体，不当有风，而状若有风者，盖小儿阳旺则内热，内热则生风，是非外来之风，乃内出之风也。内风作外风治，是速之死也。方用清火散风汤：白术（三分）茯苓（二钱）陈皮（一分）梔子（三分）甘草（一分）白芍（一钱）半夏（一分）柴胡（五分）水煎服。

此方健脾、平肝之圣药，肝平则火散，健脾则风止，断不可以风药表散之也。

又方：惊风皆由于气虚，宜用压风汤：人参（五分）白术（五分）甘草（三分）茯神（一钱）半夏（三分）陈皮（一分）神曲（五分）砂仁（一粒）丹砂（三分）水煎服。治慢惊风加黄。

又方：治惊风抽掣经验方。

全蝎（一个）黄连（一钱）朱砂（一钱）生姜（少许）共研细末，调匀，喂小儿口内，任其自咽，其效如神。

[小儿科]急惊风

急惊风：三、六、九日一切风俱治方：胆南星、雄黄、朱砂、人参、茯苓、天竺黄

、钩藤、牛黄、麝香、郁金、柴胡、青皮、甘草。

为细末，炼蜜丸，如绿豆大，真金一张为衣，阴干，旬泄气，薄荷汤磨服。

[小儿科]疳症

此症脾热而因乎心热也，遂至（同致）口中流涎。若不平其心火，则脾更旺，湿热上蒸，而口涎不能止也。方用：芦荟（一钱）黄连（三分）薄荷（三分）茯苓（二钱）桑白皮（一钱）半夏（五分）甘草（一分）水煎服。

此心脾两清之圣药也。引热下行，而疳自去矣。

又方：

女人尿桶中白（火研末，一钱），铜绿（二分），麝香（一分），共研为细末，搽齿龈上，最奇效。

[小儿科]疳症流水口烂

小儿口疳，流水口烂方：黄柏（二钱）人参（一钱），共为细末，敷口内，一日三次，三次即愈。

此方用黄柏去火，人参健脾，大人用之，亦最效。

[小儿科]疳症泻痢眼障神效方

石决明（醋，一两）芦荟（五钱）甘草（三钱）川芎（五钱）白蒺藜（五钱）菊花（四钱）胡黄连（五钱）五灵脂（五钱）细辛（五钱）谷精草（五钱）共研细末，猪苓去筋，捣烂为丸，如米大，每服二十丸，不拘时，米汤送下。

[小儿科]吐

此症虽胃之弱，亦脾气之虚。小儿恣意饱食，不能消化，久之上冲于胃口而吐也。方用止吐速效方：人参（一钱）砂仁（一粒）白术（五分）茯苓（二钱）陈皮（二分）半夏（一分）干姜（一分）麦芽（五分）山楂（三粒）水煎服。夏加黄连、冬加干姜各三分，无不愈。此六君子变方。

[小儿科]泄泻

热泄方：

小儿身如火热，口渴舌燥，喜冷冻饮料而不喜热汤，方用泻火止泄汤：车前子（二钱）茯苓（一钱）白芍（一钱）黄连（三分）泽泻（五分）猪苓（三分）麦芽（一钱）枳壳（二分）水煎服。

寒泻方：

此症必腹而喜手按摩，口不渴而舌滑，喜热饮而不喜冷，方用散寒止泻方：人参（一钱）白术（一钱）茯苓（二钱）肉桂（二分）甘草（一分）干姜（二分）砂仁（一粒）神曲（五分）水煎服。

[小儿科]小儿吐乳方

白豆蔻（七粒）砂仁（七粒）生、炙甘草（各二钱）共研细末，频擦口中，任其咽下，奇效。

[小儿科]不食乳

不食乳，心热也，葱煎乳汁，令小儿服之亦妙，不若用黄连三分，煎汤一分，灌小儿数匙，即食乳矣，神效。

[小儿科]脐汁不干

治脐汁不干方：用车前子炒焦，研为细末，敷之即干。

[小儿科]肚脐突出

小儿肚脐突出半寸许，此气旺不收也。若不急按之，往往变为弓角反张。方用：茯苓（一钱）车前子（一钱）甘草（三分）陈皮（三分）通草（三分，无通草用灯心一撮）煎汤饮之，一剂即愈。

[小儿科]便虫

小儿便虫方：

榧子（五个，去壳）甘草（三分）为末，米饭为丸，服二次，则虫化为水矣。

又虫积方：

使君子（十个，去壳炒）槟榔甘草（各一钱）榧子（十个，去壳）共为末，米饭为丸，梧桐子大，每服十丸。二日虫出，五日即愈。

[小儿科]治寸白虫方

百部根（五钱）槟榔（五钱）水煎服，一剂虫全下。

又方：

飞罗白面制半夏，生白矾各三钱，共为细末，水滴成丸，分三日服，开水服，虫化为水。大人照方十倍合眼。

[小儿科]火丹

治火丹神方：丝瓜子（一两）柴胡（一钱）元参（一两）升麻（一钱）当归（五钱）水煎服。

又方：

升麻（三钱）元参（一两）干葛（三两）青蒿（三钱）黄（三钱）水煎服。

此症乃胃火与肝经之火，共腾而外越，不为丹毒，即发疹也。方中用青蒿甚炒，肝、脾两经之火俱平；又佐以群药重剂，而火安有不灭者乎？

[小儿科]胎毒

小儿洗胎毒方：荆芥（五钱）蒲公英（五钱）甘草（五钱）槐条（二十寸）葱须（一撮）花椒（三钱）艾叶（一钱）水一砂锅，煎洗。

胎毒肥疮方：

花椒（三钱）白芷（三钱）黄柏（三钱）铅粉（三钱）枯矾（三钱）共为细末，麻油调敷，甚效。

[小儿科]口疮

小儿红白口疮外治方：

蕊仁（五分，去油）朱砂（五分）冰片（一分）共为末，熟枣三枚（去核），和一

处，摊乌青布上，贴脚心对时。去药时若干者，用无根水排药。此方效，愈儿多矣。

又方：

乌子（一钱）冰片（少许）共研细末，吹之，速效。（按：乌子即五倍子）

又方：

人中白（）研细末，吹之，神效。

[小儿科]夜啼

小儿夜啼不止，状如鬼祟方：蝉蜕（后半，四个为末）朱砂（二分，水区）薄荷（四分）水煎，酒数滴调服，立止。

又方：

乌子（五倍子）焙研，唾津和饼，填脐内，立止，甚效。

[小儿科]尿血

周岁小儿尿血方：大甘草（一两二钱）水六碗煎二碗，服完即愈。

[小儿科]寒积食积

治腹痛寒积食积方：生姜（一两）柿蒂（七个）砂仁（五粒）山楂（五钱）干萝卜（一个）红糖（一两）大枣（二枚）水煎服，两次服。

附录 傅青主男科卷上

简介

痰饮学说是中医学独特的理论精华之一。在浩瀚的中医文献中关于痰饮的记载非常丰富,《傅青主男科》就是一部对痰证有独到见解的杰作。从现有文献中看,隋唐以前,对痰与饮尚未作区别,而侧重于饮的论述,这从《内经》、《伤寒论》、《金匱要略》等重要著作中即可以反映出来。到宋代,杨仁斋着《直指方》始将痰与饮明确区分,认为“痰之于饮,其由自别,其状亦殊,痰质稠粘,饮为清水。”之后,痰证学说代有发展。金元时,王隐君创“顽痰怪症”说,史载之有“痰生百病”论,刘、张、李、朱四大家亦各有见地。明张景岳论痰证治疗,强调“善治痰者,惟能使之不生,方是补天之手”〔1〕的治本之策。《傅青主男科》一书对痰证的论述,不但继承了前人的经验,且颇有新见,有所发挥。笔者仅就《傅青主男科》〔2〕所载有关痰证的内容作一分析,探讨其痰证辨治规律。

卷上

1、伤寒门

初病说

凡病初起之时。用药原易奏功,无如世人看不清症,用药错乱,往往致变症蜂起,苟看病清,用药当,何变症之有。

伤风

(按古方书皆曰中风今日伤风)

凡人初伤风,必然头痛身痛,咳嗽痰多,鼻流清水,切其脉必浮,方用

荆芥、防风、柴、胡、黄、芩、半、夏、甘草 [各等分]

水煎服,一剂即止,不必再剂也。

伤寒

凡伤寒初起,鼻塞目痛,项强头痛,切其脉必浮紧,方用

桂枝、干葛、陈皮、甘草各等分

水煎服，一剂即愈。

外感

（外感之发热，卫气外闭也，内伤之发热，营气内损也，外感热在皮毛，内伤热在骨髓，治法不同，内伤发热方见下）

凡人外感，必然发热，方用

柴胡、黄芩、荆芥、半夏、甘草各等分

水煎服。

四时不正之气，来犯人身，必然由皮毛而入荣卫，故用柴胡、荆芥，先散皮毛之邪，邪既先散，安得入内，又有半夏以祛痰，使邪不得挟痰以作祟，黄芩以清火，使邪不得挟火以作殃，甘草调药以和中，是以邪散而无伤于正气也，若内伤之发热，则不可用此方。

伤食

凡伤食必心中饱闷，见食则恶，食之转痛也，方用

白朮 茯苓 枳壳（各壹钱）谷芽 麦芽（各贰钱）山楂（贰拾个）神曲（伍钱）半夏（壹钱）甘草（伍分）砂仁（参粒）

水煎服，一剂快，二剂愈。

疟疾方用遇仙丹（此方丸之大小，未曾定分两，愚酌以壹钱为准，南方之人，以及老弱久疟，尤宜减半）

生军（陆两）槟榔 三棱 莪朮 黑丑 白丑（各参两）木香（贰两）甘草（壹两）

水丸，遇发日清晨，温水化三四丸，寻以温米饮补之，忌生冷鱼腥荞面，孕妇勿服。

伤暑

人感此症，必然头晕口渴恶热，甚则痰多，身热气喘方用

人参（壹钱）白朮（伍钱）茯苓（叁钱）甘草（壹钱）
青蒿（壹两）香薷（三钱）陈皮（壹钱）

水煎服，一剂愈。

大满

此邪在上焦，壅塞而不得散也，方用

瓜蒌（壹个捣碎）枳壳 天花粉（各叁钱）栀子（贰钱）
陈皮（叁钱）厚朴（壹钱伍分）半夏 甘草（各壹钱）

水煎服。

此方之妙，全在用瓜蒌，能去胸膈之食，而消上焦之痰，况又佐以枳壳花粉，同是消中圣药，又有厚朴半夏，以消胃口之痰，尤妙在甘草，使群药留中而不速下，则邪气不能久存而散矣。

发汗

凡人邪居腠理之间，必须用汗药以泄之，方用

荆芥 防风 甘草 桔梗 苏叶（各壹钱）白朮（五钱）云苓（叁钱）陈皮（五分）

水煎服。

此方妙在君白朮，盖人之脾胃健，而后皮毛腠理始得开合自如，白朮健脾去湿，而邪已难存，况有荆防苏梗以表散之乎。

寒热真假辨

真热症，口干极而呼水，舌燥极而开裂，生刺喉痛，日夜不已，大热烙手而无汗也，真寒症手足寒久而不回，色变青紫，身战不已，口噤出声而不可禁也。

假热症，口虽渴而不甚，舌虽干而不燥，即燥而无芒刺纹裂也。假寒症，手足冰冷，而有时温和厥逆身战。亦未太甚，而有时而安，有时而搐是也。

乍寒乍热辨

（玩此可知治疟有用小柴胡汤之法）

病有洒淅恶寒而后发热者，盖阴脉不足，阳往从之，阳脉不足，阴往乘之，何谓阳不足，寸脉微，名曰阳不足，阴气上入阳中，则恶寒也，何谓阴不足，尺脉弱，名曰阴不足，阳气下陷阴中，则发热也，凡治寒热，用柴胡升阳气，使不下陷阴中，则不热也，用黄芩降阴气，使不升入阳中，则不寒也。

真热症方用

麻黄 黄连 黄芩 石膏 知母 半夏（各叁钱）当归（伍钱）枳壳（贰钱）甘草（壹钱）

水煎服，一剂轻二剂愈。

真寒症方用

附子（叁钱）肉桂 干姜（各壹钱）白朮（五钱）人参（壹两）

水煎服急救之。

此乃真中寒邪，肾火避出躯壳之外，而阴邪之气，直犯心宫，心君不守，肝气无依，乃发战发噤，手足现青色，然则用桂附干姜逐其寒邪足矣，何用参朮即用何至多加，盖元阳飞越，只一线之气未绝，纯用桂附干姜一派辛辣之药，邪虽外逐，而正气垂绝，若不多加参朮，何以反正气于若存若亡之际哉。

假热症方用

黄连 当归 白芍 半夏（各叁钱）茯苓
柴胡 栀子（各贰钱）枳壳（壹钱）菖蒲（参分）

水煎服。

此方妙在用黄连入心宫，佐以栀子，提刀直入，无邪不散，柴胡白芍，又塞敌运粮之道，半夏枳壳，斩杀党余，中原既定，四隅不战而归，然火势居中，非用之得法，则贼势弥张，依然复入，又加菖蒲之辛热，乘热饮之，则热喜热，不致相反而更相济也。

假寒症方用

肉桂 附子（各壹钱）人参（叁钱）白朮（五钱）猪胆汁（半个）苦菜汁（拾参匙）

水三杯，煎一杯，冷服将药并器放冷水中，激凉入胆蔡汁调匀，一气服之。

方中全是热药，倘服不如式，必然虚火上冲，将药呕出，必热药凉服，已足顺其性，况下行又有二汁之苦，以骗其假道之防也哉。

真热假寒

此症身外冰冷，身内火炽，发寒发热，战栗不已，乃真热反现假寒之象以欺人也，法当用三黄汤加石膏生姜，乘热饮之，再用井水以扑其心，至二三十次，内热自止，外之战栗亦若失矣，后用元参麦冬白芍各二两煎汤，任其恣饮，后不再甚也。

真寒假热

此症下部冰冷，上部大热，渴欲饮水，下喉即吐，乃真寒反现假热之形以欺人也，法当用八味汤，大剂探冷与服，再令人以手擦其足心，如火之热，不热不已，以大热为度，用吴茱一两，附子一钱，麝香三分，以少许白面入之，打糊作膏，贴足心，少顷必睡，醒来下部热，而上之火息矣。

上热下寒

此症上焦火盛，吐痰如涌泉，面赤喉痛，上身不欲盖衣，而下身冰冷，此上假热而下真寒也，方用

附子（壹个）熟地（半斛）山茱（肆两）麦冬（壹两）
茯苓（三两）五味子（壹两）丹皮（参两）泽泻（参两）肉桂（壹两）

水十碗，煎三碗，探冷与服，其渣再用水三碗，煎一碗，一气服之，立刻安静，此上病下治之法也。

循衣撮空

此症非大实则大虚，当审其因，察其脉，参其症而分黑白矣，实而便秘者，大承气汤，虚而便滑者，独参汤，厥逆者加附子，阴虚双蛾方用

附子（壹钱）盐水炒，每用一片含口中，后以六味地黄汤，大剂饮之，

附外治法

引火下行，用附子一个为末，醋调贴涌泉穴，或吴茱一两，白面五钱水调贴涌泉穴

，急针刺少商穴，则咽喉有一线之路矣。

结胸

此伤寒之变症也，伤寒邪火正炽，不可急于饮食，饮食而成此者，方用

瓜蒌（壹个捶碎）甘草（壹钱）水煎服，勿迟。

瓜蒌乃结胸之圣药，常人服之，必至心如遗若，病人服之，不畏其虚乎，不知结胸之症，是食在胸中，非大黄枳壳槟榔厚朴所能祛逐，必得瓜蒌，始得推荡辟脾，少加甘草以和之，不致十分猛烈也。

扶正散邪汤

人参半夏甘草（各壹钱）白朮茯苓柴胡（各叁钱）

水煎服。

此方专治正气虚而邪气入之者，如头痛发热，右寸脉大于左寸口者，急以此方投之，无不全愈。

2、火证门

泻火汤总方

栀子丹皮（各叁钱）白芍（五钱）元参（贰钱）甘草（壹钱）

水煎服。

心火加黄连一钱，胃火加生石膏三钱，肾火加黄柏知母各一钱，肺火加黄芩一钱，大肠火加地榆一钱，小肠火加天冬麦冬各一钱，膀胱火加泽泻三钱，治火何独治肝经，盖肝属木，最易生火，肝火散，则诸经之火俱散，但散火必须用下泄之药，而使火之有出路也则得矣。

火症

真火症，初起必大渴引饮，身有斑点，或身热如焚，或发狂乱语，方用

石膏知母升麻半夏甘草（各叁钱）元参麦冬（各壹两）竹叶（壹佰片）

水煎服，一剂少止，三剂愈。

[大寒之症亦有发斑者，但看其渴与不渴，若身发斑不渴，小饮即吐饮虽沸汤不觉甚热，此大寒症，不可与此]

火越

此乃胃火与肝火共腾，而外越不为丹毒，即为痧疹，非他火也，方用

元参（壹两）干葛（参两）升麻青蒿黄耆（各叁钱）

水煎服。

此方妙在用青蒿，肝胃之火俱平，又佐以群药重剂，而火安有不灭者乎，（治小儿亦效）

燥症

此症初起，喉干口渴，干燥不吐，痰干咳嗽不已，面色日红，不畏风吹者是也，方用

麦冬元参（各伍钱）桔梗（叁钱）花粉甘草（各壹钱）陈皮（参分）百部（捌分）

水煎服。

治火丹神方

丝瓜子元参（各壹两）柴胡升麻（各壹钱）当归（伍钱）

水煎服小儿服之亦效

消食病

此火盛之症，大渴引饮，呼水自救，朝食即饥，或夜食不止，方用

元参（壹两）麦冬（伍钱）生地（叁钱）竹叶（参拾片）菊花白芥子丹皮（各贰钱）陈皮（伍分）

水煎服。

痿症

不能起床，已成废人者，此乃火盛内炽，肾水熬干，治法宜降胃火而补肾水。方用降补汤。

熟地元参麦冬（各壹两）甘菊花生地沙参地骨皮（各伍钱）车前子（贰钱）人参（叁钱）

水煎服。

痿症

人有两足无力，不能起立，而口又健饭，少饥则头面皆热，咳嗽不已，此亦痿症，方用起痿至神汤。

熟地元参山药菊花（各壹两）当归白芍人参（各伍钱）神曲（贰钱）白芥子（叁钱）

水煎服，三十剂而愈。

3、郁结门

开郁

如人头痛身热，伤风咳嗽，或心不爽，而郁气蕴于中怀，或气不舒，而怒气留于胁下，断不可用补药，方用

当归（叁钱）白芍（伍钱）半夏（贰钱）枳壳薄荷白朮丹皮甘草（各壹钱）

水煎服。

头痛加川芎一钱，目痛加蒺藜一钱，菊花一钱，鼻塞加苏叶一钱，喉痛加桔梗二钱，肩背痛加枳壳羌活，两手痛加姜黄或桂枝一钱，腹痛不可按者，加大黄二钱，按之而不痛者，加肉桂（壹钱），余不必加。

关格

怒气伤肝，而肝气冲于胃口之间，肾气不得上行，肺气不得下行，而成此症，以开郁为主，方用

荆芥柴胡川郁金茯苓苏子白芥子花粉（各壹钱）白芍（叁钱）甘草（伍分）

水煎服，又方用阴阳水各一碗，加盐一撮，打百余下，起泡，饮之即吐而愈，凡上焦有疾，欲吐而不能吐者，饮之立吐。

4、虚劳门

癆症虚损辨

二症外相似而治法不同，虚损者，阴阳两虚也，劳症者，阴虚阳亢也，故虚损可用温补，若劳症则忌温补而用清补也，两症辨法不必凭脉，但看人着复衣，此着单衣者为劳症，人着单衣，此着复衣者为虚损，劳症骨蒸而热，虚损营卫虚而热也。

内伤发热

方用

当归柴胡陈皮栀子甘草（各壹钱）白芍花粉（各贰钱）

水煎服。

凡肝木郁者，此方一剂即快，人病发热，有内伤外感，必先散其邪气，邪退而后补正，则正不为邪所伤也，但外感内伤，不可用一方也，外感发热方见前。

未成劳而将成劳

方用

熟地（壹两）地骨皮人参麦冬（各伍钱）白芥子山药（各叁钱）白朮（壹钱）五味子（参分）

水煎服。

凡人右寸脉大于左寸，即内伤之症，不论左右关尺脉何如，以此方投之效验。

阳虚下陷

凡人饥饱劳役，内伤正气，以致气乃下行，脾胃不能克化，饮食不能运动，往往变为劳瘵，盖疑饮食不进为脾胃之病，肉黍之积，轻则砂仁、枳壳、山楂、麦芽之品

，重则芒硝、大黄、牵牛巴豆之类，纷然杂进，必致臌闷而渐成劳矣，若先以升提之药治之，何至于成劳，方用

人参柴胡陈皮甘草（各壹钱）升麻（三分）黄耆白朮（各叁钱）

水煎服。

阴虚下陷

凡人阴虚脾泄，岁久不止，或食而不化，或化而溏泄，方用

熟地（壹两）山药山萸白朮（各伍钱）茯苓（叁钱）升麻（参分）肉桂五味子车前子（各壹钱）

水煎晚服。

此方纯是补阴之药，且有升麻以提阴中之气，又有温湿之品以暖命门而健脾土，何至溏泄哉。

[此症每至腿脚发踵，稍多饮食即便蛔虫，乃脾阴虚陷已极，方宜加入干姜、乌梅]

阴虚火动夜热昼寒

此肾水虚兼感寒，或肾水亏竭，夜热昼寒，若认作阳症治之，则口渴而热益炽，必致消尽阴水，吐痰如絮，咳嗽不已，声哑声嘶，变成劳瘵，法当峻补其阴，则阴水足而火焰消，骨髓清泰矣，方用

熟地元参（各壹两）山萸地骨皮芡实（各伍钱）五味子麦冬沙参白芥子（各叁钱）桑叶（拾肆片）

水煎服。

此方治阴虚火动者神效。

阴寒无火

方用

肉桂柴胡（各壹钱）熟地（壹两）附子白朮人参（各叁钱）

水煎服。

二方治阴之中，即有以治阳，治阳之中，即藏于补阴。

[此两方似六味八味地黄，而上方之白芥，桑叶，下方之柴胡，其妙用有过于地黄丸之丹，泽者，用者不可以意加减也]

过劳

凡人过劳，脉必浮大不伦，若不安闲作息，必有吐血之症，法当滋补，方用

熟地黄耆白芍白朮（各伍两）山萸肆两人参茯苓五味子麦冬（各参两）神曲（壹两）砂仁陈皮当归（半斛）

蜜丸，早晚滚水送下五钱。

日重夜轻

病重于日间，而发寒发热，较夜尤重，此症必须从天未明而先截之，方用

人参枳壳青皮陈皮半夏
甘草（各壹钱）黄耆白朮（各伍钱）当归（叁钱）柴胡（叁钱）干姜（五分）

水煎服。

又方

熟地（壹两）人参陈皮白芥子甘草（各壹钱）白朮（伍钱）柴胡（贰钱）

水煎服。

夜重日轻

病重于夜间，而发热发寒，或寒少热多，或热少寒多，一到天明，便觉清爽一到黄昏，即觉沉重，此阴气虚甚也，方用

熟地（壹两）山萸（肆钱）当归白芍柴胡生何首乌麦冬白芥子（各叁钱）鳖甲（伍钱）五味子陈皮（各壹钱）

水煎服。

此方妙在用鳖甲，乃至阴之物，逢阴则入，遇阳则转，生何首乌直入阴经，亦攻邪气，白芥子去痰，又不耗真阴之气，有不奏功者乎，必须将黄昏时服，则阴气固，而邪气不敢入矣。

阴邪兼阳邪

此症亦发于夜间，亦发寒发热，无异纯阴邪气之症，但少少烦躁耳，不若阴症之常静也，法当于补阴之中，少加阳药一二味，使阳长阴消，自奏功如响矣，方用

熟地（壹两）山萸（肆钱）鳖甲茯苓（各伍钱）当归白朮白芥子麦冬五味子生何首乌（各叁钱）人参柴胡（各贰钱）陈皮（壹钱）

水煎服。

气血两虚

饮食不进，形容枯槁，补其气血益燥，补其血气益馁，助胃气而盗汗难止，补血脉而胸膈阻滞，法当气血同治，方用

人参白朮川芎谷芽（各壹钱）麦冬（伍钱）甘草（捌分）
当归茯苓（各贰钱）熟地白芍（各叁钱）陈皮神曲（各伍分）

水煎服。

此治气血两补，与八珍汤同功，而胜于八珍汤者，妙在补中有调和之法耳。

气虚胃虚

人有病久而气虚者，必身体羸弱，饮食不进，或大便溏泄，小便艰涩，方用

人参（壹两）白朮（伍钱）茯苓（叁钱）甘草陈皮车前子泽泻（各壹钱）

水煎服。

此方用人参为君者，开其胃气，盖胃为肾之关，关门不开，则上之饮食不能进，下之糟粕不能化，必用人参以养胃土，茯苓车前以分消水气，如服此不效，兼服八味丸，最能实大肠而利膀胱也。

气虚饮食不消

饮食入胃，必须气充足，始能消化而生津液，今饮食不消，气虚也，方用

人参（贰钱）黄耆白朮茯苓甘草（各叁钱）神曲麦芽陈皮（各伍分）山楂（叁个）
水煎服。

伤食加来服子，有痰加半夏白芥子，各一钱，咳嗽加苏子一钱，桔梗二钱，伤风加柴胡二钱，夜卧不安，加炒枣仁二钱，胸中微痛，加枳壳五分，方内纯是开胃之品，又恐饮食难消，后加消导之品，则饮食化而津液生矣。

血虚面色黄瘦

出汗盗汗，夜卧常醒，不能润色以养筋是也，血虚自当补血，舍四物汤又何求耶，今不用四物汤，用

熟地（壹两）麦冬枸杞（各叁钱）当归（伍钱）茜草（壹钱）桑叶（拾片）

水煎服。

此方妙在用桑叶，以补阴而生血，又妙在加茜草，则血得活而益生，况又济之归地麦冬大剂，以共生乎。

肺脾双亏

咳嗽不已，吐泻不已，此肺脾受伤也，人以咳嗽宜治肺，吐泻宜治脾，殊不知咳嗽由于脾气之衰，斡旋之令不行，则上为咳嗽矣，吐泻由于肺气之弱，肃清之令不行，始上吐而下泻矣，方用

人参（壹钱伍分）麦冬茯苓（各贰钱）车前子甘草（各壹钱）柴胡神曲
薏仁（各伍分）

水煎服。

此治脾治肺之药，合而用之，咳嗽吐泻之病各愈，所谓一方而两用之也。

肝肾两虚

肾水亏不能滋肝，则肝木抑郁而不舒，必有两胁饱闷之症，肝木不能生肾中之火，则肾水日寒，必有腰背难以俯仰之症，此症必须肝肾同补，方用

熟地（壹两）山萸当归白芍（各伍钱）柴胡（贰钱）肉桂（壹钱）

水煎服。

熟地、山萸，补肾之药，归、芍、柴、桂，补肝之品，既云平补，似乎用药不宜有重轻，今补肝之药多于补肾者何，盖肾为肝之母，肝又为命门之母，岂有木旺而不生命门之火者哉。

心肾不交

肾，水藏也，心，火藏也，是心肾二经，为仇敌矣，似不可牵连而合治之也，不知心肾相克而实相须，肾无心之火则水寒，心无肾之水则火炽，心必得肾水以滋润，肾必得心火以温暖，如人惊惕不安，梦遗精泄，皆心肾不交之故，人以惊惕为心之病，我以为肾之病，人以梦泄为肾之病，我以为心之病，非颠倒也，实有至理焉，人果细心思之，自然明白，方用

熟地白朮（各伍两）山萸人参茯神枣仁炒麦冬柏子仁（各参两）远志菖蒲五味子（各壹两）山药（叁钱）芡实（伍钱）

蜜丸，每早晚温水送下五钱。

此方之妙，治肾之药，少於治心之味，盖心君谧静，肾气自安，何至心动，此治肾正所以治心，治心即所以治肾也，所谓心肾相依。

精滑梦遗

此症人以为肾虚也，不独肾病也，心病也，宜心肾兼治，方用

熟地（半斛）山药肉桂鹿茸炒枣仁远志杜仲柏子仁破故纸五味子（各壹两）山萸白朮（各肆两）人参茯苓麦冬白芍巴戟肉苁蓉（各参两）紫河车（壹副）砂仁（伍钱）附子（壹钱）

蜜丸，早晚白水送下五钱。

此方用熟地山药山萸之类，补肾也，巴戟、肉苁蓉、附子、鹿茸，补肾中之火也，可以已矣，而又必加人参、茯苓、柏子仁、麦冬、远志、枣仁者何也，盖肾火虚，

由于心火虚也，使补肾火不补心火，则反增上焦枯渴，故欲补肾火，必须补心火，则水火相济也。

夜梦遗精

此症由于肾水耗竭，上不能通于心，中不能润于肝，下不能生于脾，以致玉关不闭，无梦且遗，法当补肾而少佐以益心肝脾之品，方用

熟地（壹两）山萸（肆钱）茯苓白芍生枣仁当归薏仁（各叁钱）白朮（伍钱）茯神（贰钱）五味子白芥子（各壹钱）肉桂黄连（各伍分）

水煎服，一剂止，十剂不犯。

遗精健忘

遗精，下病也，健忘，上病也，何以合治之而咸当乎，盖遗精虽是肾水之虚，而实本于君火之弱，今补其心君，则玉关不必闭而自闭矣，所谓一举而两得也，方用

人参芡实麦冬生枣仁当归山萸（各叁两）莲须（贰两）熟地（伍两）山药（肆两）柏子仁去油远志菖蒲五味子（各壹两）

蜜丸，每日服五钱，白水下。

倒饱中满

气虚不能食，食则倒满，方用

人参来服子甘草（各壹钱）
白朮（贰钱）茯苓山药（各叁钱）芡实薏仁（各五钱）陈皮（参分）

水煎服

下喉虽则微胀，入腹渐觉爽快。

久虚缓补

久虚之人，气息奄奄，无不曰宜急治矣，不知气血大虚，骤加大补之剂，力量难任，必致胃口转膨胀，不如缓缓清补之也，方用

当归茯苓山药（各壹钱）白芍（贰钱）白朮枣仁（各伍分）人参陈皮麦芽炮姜甘草（各参分）

水煎服。

此方妙在以白芍为君，引参苓入肝为佐，小小使令，徐徐奏功，使脾气渐实，胃口渐开，然后再用纯补之剂，先宜缓补之也。

[如久饿之人，骤投以饭则饱死，须以薄粥徐徐饮之，同是一理]

补气

右手脉大，气分之劳也，方用补气丸。

人参黄耆白芍（各三两），茯苓（肆两）白朮（半斛）陈皮五味子白芥子远志（各壹两）麦冬（贰两）炙甘草（捌钱）

蜜丸，早服五钱，白水下。

补血

左手脉大，血分之劳也，方用补血丸。

熟地白芍（各半斛）山萸当归（各肆两）枣仁麦冬白芥子五味子（壹钱）砂仁肉桂（各伍钱）

蜜丸，晚服一两，白水下，如身热，去肉桂加地骨皮五钱。

出汗

人有病不宜汗多，若过出汗，恐其亡阳，不可不用药以敛之，方用

人参黄耆当归（各壹两）桑叶（伍片）麦冬（叁钱）炒枣仁（壹钱）

水煎服。

癆症

癆症既成，最难治者，必有虫生之以食人之气血也，若徒补其气血，而不入杀虫之

药，则饮食入胃，祇荫虫而不生气血，若但杀虫而不补气血，则五藏俱受伤，又何必有生理哉，惟于大补之中，加杀虫之药，则元气既全，真阳未散，虫死而身安矣，方用

熟地地栗粉何首乌（各半斛）鳖甲山药（各壹斛）神曲
麦冬（各伍两）桑叶（半斛）人参白微（各参两）

熟地为丸，每日白水送下五钱，半年虫从大便出矣。

5、痰嗽门

痰嗽

古人所立治痰之法，皆是治痰之标，而不能治其本也，如二陈汤，上中下久暂之痰皆治之，而其实无实效也，今立三方，痰病总不出其范围也。

初病之痰

伤风咳嗽吐痰是也，方用

陈皮半夏花粉茯苓苏子甘草（各壹钱）

水煎服。

二剂而痰可消矣，此去上焦之痰，上焦之痰，原在胃中而不在肺，去其胃中之痰，而肺自然清肃，又何致火之上升哉。

[此症医治不善，极易成劳，缘痰嗽皆责之于肺，伤风痰嗽是风伤肺也，若发散燥痰太过，则肺不敛必嗽愈甚，而上呛血丝，久则肺伤而肾炽，若寒凉滋润太过，则肺不舒必痰愈多，而气喘声痿，久则金冷而水寒，此方无此二弊，愿病者勿以小病而忽之也。]

已病之痰

必观其色之白与黄而辨之，黄者火已退也，白者火正炽也，正炽者用寒凉之品，将退者用祛逐之味，今一方而俱治之，方用

白朮白芥子（各叁钱）茯苓（伍钱）陈皮甘草（各壹钱）枳壳（伍分）

水煎服，有火加梔子，无火不必加。

此方健脾去湿，治痰之在中焦者也，又方

白朮茯苓薏仁至义尽（各五钱）陈皮（壹钱）益智（参分）

水煎服。有火加黄芩一钱，无火加干姜一钱，甘草二分。

此方健脾去湿而不耗气，二剂而痰自消也。

久病之痰

久病痰多，切不可作脾湿生痰论之，盖久病不愈，未有不因肾水亏损者也，非肾水泛上为痰，即肾火沸腾为痰，当补肾以祛逐之，方用

熟地薏仁（各壹两）山药山萸麦冬芡实（各伍钱）五味子茯苓（各叁钱）益智仁（贰钱）车前子（壹钱）

水煎服。

此治水泛为痰之圣药也，若火沸腾为痰，加肉桂一钱，补肾去湿而化痰，水入肾宫，自变为真精而不化痰矣，此治下焦之痰也，又方六味地黄汤，加麦冬五味子，实有奇功，无火加桂附。

滞痰

夫痰之滞，乃气之滞也，苟不补气，而惟去其痰，未见痰去而病消也，方用

人参陈皮花粉白芥子（各壹钱）白朮（贰钱）

茯苓（叁钱）苏子（捌分）白蔻仁（贰粒）

水煎服。

湿痰

治痰之法，不可徒去其湿，必以补气为先，而佐以化痰之品，乃克有效，方用

人参壹两茯苓半夏神曲（各叁钱）薏仁（伍钱）陈皮甘草（各壹钱）

水煎服。

盖此方之中用神曲，人多不识，谓神曲乃消食之味，绝非化痰之品，不知痰之积聚稠粘，甚不易化，惟用此神曲以发之，则积聚稠粘开矣，继之以半夏、陈皮，可以奏功，然虽有陈半消痰，使不多用人参，则痰难消，今有人参以助气，又有薏仁茯苓，健脾去湿，而痰焉有不消者乎。

寒痰

人有气虚而痰寒者，即用前方加肉桂三钱、干姜五分足之矣。

热痰

人有气虚而痰热者，方用

当归叁钱白芍麦冬茯苓（各贰钱）甘草白芥子花粉陈皮（各壹钱）神曲（参分）

水煎服。

老痰

凡痰在胸膈不化者，谓之老痰，方用

柴胡茯苓甘草陈皮丹皮花粉（各壹钱）白芍薏仁（各壹钱）白芥子（伍钱）

水煎服。

此方妙在百芥子为君，薏仁、白芍为臣，柴胡、花粉为佐，使老痰无处可藏，十剂而老痰可化矣。

顽痰

痰成而塞咽喉者，谓之顽痰，方用

贝母半夏茯苓（各叁钱）白朮（伍钱）神曲（贰钱）甘草桔梗白矾炙紫苑（各壹钱）

水煎服。

此方妙在贝母半夏同用，一燥一湿，使痰无处逃避，又有白矾消块，梗菀去邪，甘草调中，有不奏功者乎。

水泛为痰

肾中之水，有火则安，无火则泛，倘人过于入房，则水去而火亦去，久之则水虚而火亦虚，水无可藏之地，必泛上为痰矣，治之法，欲抑水之下降，必先使火之下温，当于补肾之中，加大热之药，使水足以制火，火足以暖水，则水火有既济之道，自不上泛为痰矣，方用

熟地（壹两）山萸（伍钱）肉桂（贰钱）牛膝（叁钱）五味子（壹钱）

水煎服，一剂而痰下行矣，二剂而痰自消矣。

中气又中痰

中气中痰，虽若中之异，而实中于气之虚也，气虚自然多痰，痰多必然耗气，虽分而实合也，方用

人参甘草（各壹两）半夏、南星茯苓（各叁钱）附子（壹钱）

水煎服。

人参原是气分之神剂，而亦消痰之妙药，半夏南星，虽逐痰之神品，而亦扶气之正药，附子甘草，一仁一勇，相济而成。

湿嗽

秋伤于湿，若用乌梅栗壳等味，断乎不效，方用

陈皮当归甘草枳壳桔梗（各壹钱）白朮（贰钱）

水煎服。三剂帖然矣，冬嗽皆秋伤于湿也，岂可拘于受寒乎。

久嗽

方用

人参（伍钱）益智仁（伍分）白芍枣仁（各叁钱）五味子白芥子（各壹钱）

水煎服。二剂后，服六味地黄丸。

方用

瓜蒌仁（去油）乌梅（各伍钱）薄荷甘草（各伍分）人参（童便浸）五味子（酒蒸）寒水石火煨杏仁硼砂（各壹钱）贝母（参两）胡桃仁（贰钱去油）

蜜丸樱桃大，净绵包之，口中噙化，虚劳未曾失血，脉未数者，皆用之，无论老少神曲效，十粒见功，二十粒愈，又方用

人参、当归、细茶各一钱

水煎，连渣嚼尽，一二剂即愈。

肺嗽兼补肾

肺嗽之症，本是肺虚，其补肺也明矣，奈何兼补肾乎，盖肺经之气，夜必归于肾，若肺金为心火所伤，必求救于其子，子若力量不足，将何以救其母哉，方用

熟地麦冬（各壹钱）紫苑（伍分）山萸（肆钱）元参（伍钱）苏子牛膝（各壹钱）沙参天冬（各贰钱）

水煎服。

6、喘证门

气治法

气虚气实，不可不平之也，气实者非气实，乃正气虚而邪气实也，法当用补正之药，而加祛逐之品，则正气足而邪气消矣，方用

人参白朮麻黄半夏甘草（各壹钱）柴胡（贰钱）白芍（叁钱）

水煎服。

推而广之，治气非一条也，

气陷 补中益气汤可用，

气衰 六君子汤可采，
气寒 人参白朮附子汤可施，
气虚则用四君子汤，
气郁则用归脾汤，
气热用生脉散，
气喘用独参汤，
气动用二陈汤加人参，
气壅塞用射干汤，
气逆用逍遥散，
气虚则羸弱，
气实则壮盛，
气虚用前方，实者另一方，

白朮柴胡甘草梔子（各壹錢）茯苓（叁錢）白芍（貳錢）陳皮枳殼（各伍分）山查（拾個）

水煎服。

气喘

凡人气喘而上者，人以为气有余也，殊不知气盛当作气虚看，有余当作不足看，若认作肺气之盛，而用苏叶桔梗百部豆根之类，去生远矣，方用

人参（参两）牛膝（叁钱）熟地麦冬（各伍钱）山萸（肆钱）
胡桃（参个）枸杞五味子（各壹钱）生姜（伍片）

水煎服。

此方不治肺，而正所以治肺也，或疑人参乃健脾土之药，既宜补肾，不宜多用人参，不知肾水大虚，在一时不能遽生，非急补其气，则元阳一线必且断绝，况人参少用则泛上，多用即下行，妙在用人参三两，使下达病原，补气以生肾水，方中熟地、山萸之类，同气相求，直入命门，又何患其多哉，若病重之人，尤宜多加，但喘有初起之喘，有久病之喘，初起之喘多实邪，久病之喘多气虚，实邪喘者必抬肩，气虚喘者微微气息耳，此方治久病之喘，若初起之喘，四磨四七汤，一剂即止喘，不独肺气虚而肾水竭也。

实喘方用

黄芩（貳錢）柴胡甘草（各伍分）麥冬（叁錢）蘇葉烏藥半夏山豆根（各壹錢）

水煎服。

一剂喘定，不必再剂也，凡实喘症，气大急，喉中必作声，肩必抬，似重而实轻也。

虚喘

大抵此等症，气少息，喉无声，肩不抬也，乃肾气大虚，脾气又复将绝，故奔冲而上，欲绝未绝也，方用救绝汤。

人参熟地（各一两）山萸（三钱）牛膝五味子白芥子（各一钱）麦冬（五钱）

水煎服。

气短似喘

此证似喘而非实喘也，若非实喘治之，立死，盖气短乃肾气虚耗，气冲上焦，壅塞于肺经不足之故也，方用

人参（二两）熟地（一两）山萸牛膝补骨脂枸杞（各三钱）
麦冬（五钱）胡桃（三个去皮）五味子（二钱）

水煎服，三剂气平喘定。

此方妙在用人参之多，能下达气原，挽回于无何有之乡，又纯是补肺补肾之品，子母相生，水气自旺，则火气自安于故宅，不上冲于喉门矣。

抬肩大喘

人忽感风邪，寒入于肺，以致喘息肩抬气逆，痰吐不出，身不能卧，方用

柴胡茯苓麦冬桔梗（各二钱） 黄芩当归甘草半夏射干（各一钱）

水煎服。

此方妙在用柴胡、射干、桔梗，以发舒肺金之气，半夏以去痰，黄芩以去火，盖感寒邪，内必变为热证，故用黄芩以清解之，然徒用黄芩，虽曰清火，转足以遏抑其火，而火未必伏也，有射干桔梗柴胡一派辛散之品，则足以消火减邪矣。

肾寒气喘

人有气喘不能卧，吐痰如涌泉者，舌不燥而喘不止，一卧即喘，此非外感之寒邪，乃肾中之寒气也，盖肾中无火，则水无所养，乃泛上而为痰，方用

六味地黄汤，加桂附大剂饮之，盖人之卧，必肾气与肺气相安，而后河车之路，平安而无奔越也。

肾火扶肝上冲

凡人肾火，逆扶肝气而上冲，以致作喘，甚有吐红粉痰者，此又肾火炎，上以烧肺金，肺热不能克肝，而龙雷之火升腾矣，方用

沙参地骨皮（各壹两）麦冬（伍钱）丹皮（叁钱）甘草（参分）桔梗（伍分）白芍（伍钱）白芥子（贰钱）

水煎服。

此方妙在地骨皮清骨中之火，沙参、丹皮以养阴，白芍平肝，麦冬清肺，甘草桔梗引入肺经，则痰消而喘定矣。

假热气喘吐痰

人有假热气喘吐痰者，人以为热而非热也，乃下元寒极，逼其火而上喘也，此最危急之症，苟不急补其肾水与命门之火，则一线之微，必然断绝，方用

熟地（肆两）山药麦冬（各叁两）五味子牛膝（各壹两）附子肉桂（各壹钱）

水煎冷服，一剂而愈。

喘嗽

人有喘而且嗽者，人以为气虚而有风痰也，谁知是气虚不能归源于肾，而肝木挟之作祟乎，法当峻补其肾，少助以引火之品，则气自归源于肾，而喘嗽俱止，方用

人参（壹两）熟地（贰两）麦冬（伍钱）
茯苓（叁钱）牛膝枸杞白朮五味子兔丝子（各壹钱）

水煎服，连服几剂，必有大功，倘以四磨四七汤治之，则不效矣。

贞元饮此方专治喘而脉微濇者

熟地（参两）当归（柒钱）甘草（壹钱）

水煎服，妇人多此症。

7、吐血门

阳症吐血

人有感暑伤气，忽然吐血盈盆，人以为阴虚也，不知阴虚吐血与阳虚不同，阴虚吐血，人安静无躁动，阳虚必大热作渴，欲饮冷水，舌必有刺，阴虚口不渴而舌胎滑也，法当清胃火，不必止血也，方用

人参当归香薷石膏（各叁钱）荆芥（壹钱）青蒿（伍钱）

水煎服。

此方乃阳症吐血之神曲剂也，方中虽有解暑之品，然补正多于解暑，去香薷一味，实可同治，但此方祇可用一二剂，即改六味地黄汤。

大怒吐血

其吐也，或倾盆而出，或冲口而来，一时昏晕，死在顷刻，以止血治之，则气闷不安，以补血治之，则胸满不受，有变症蜂起而死者，不可不治之得法也，

方用解血平气汤。

白芍当归（各贰两）炒荆芥黑梔（各叁钱）红花（贰钱）柴胡（捌分）甘草（壹钱）

水煎服。

一剂而气平舒，二剂而血止息，三剂而病大愈。

此症盖怒伤肝，不能平其气，以致吐血，若不先舒其气，而遽止血，则愈激动肝火之气，必气愈旺而血愈吐矣，方中用白芍平肝又舒气，荆芥、柴胡引血归经，当归、红花，生新去旧，安有不愈者哉。

吐血

此症人非以为火盛，即以为阴亏，用凉药以泻火，乃火愈退而血愈多，用滋阴之味，止血之品，仍不效，谁知是血不归经乎，治法当用补气之药，而佐以引血归经之味，不止血而血自止矣，方用

人参（伍钱）当归（壹两）丹皮炒，黑芥穗（各叁钱）

水煎服，一剂而止。

此方妙在不专补血，而反去补气以补血，尤妙在不去止血，而去行血以止血，盖血逢寒则凝，逢散则归经，救死于呼吸之际，大有神曲功。

[大凡吐血，多系不归经之血，因何腑何藏而发，腑藏之血，吐则立死，此自然之理也，火盛阴亏两层，世间误杀，奚止千百，寒凉滋阴之药，轻则凝结而成病根，重则经阻而成乾血，此论此方，发菩提心，作当头棒喝也。]

吐白血

血未有不红者，何以名白血，不知久病之人，吐痰皆白沫，乃白血也，白沫何以名白血，以其状似蟹涎，无败痰存其中，实血而非痰也，若将所吐白沫，露于星光之下，一夜必变红矣，此沫出于肾，而肾火沸腾于咽喉，不得不吐者也，虽是白沫，而实肾中之精，岂特血而已哉，苟不速治，则白沫变为绿痰，无可如何矣，方用

熟地麦冬（各壹两）山药山萸茯苓（各伍钱）丹皮泽泻（各贰钱）五味子（壹钱）

水煎，日日服之。

血不归经

凡人血不归经，或上或下，或四肢毛窍，各处出血，循行经络，外行于皮毛，中行于脏腑，内行于筋骨，上行于头目两手，下行于二便，一剂周身无非血路，一不归经，斯各处妄行，有孔则钻，有洞则泄，甚则呕吐，或见于皮毛，或出于齿缝，或渗于脐腹，或露于二便，皆宜顺其性以引之归经，方用

熟地生地（各五钱）当归白芍麦冬（各叁钱）荆芥川芎甘草茜草根（各一钱）

水煎服。

此方即四物汤加减，妙在用茜草引血归经。

附：三黑神曲奇散

丹皮（炒黑七分）黑梔（五分）真蒲黄（炒黑一钱二分）川芎（酒洗）贝母（各一钱）生地（酒洗）

水二樽，童便藕汁各半樽，煎服。

此方治吐血神效无比，二剂止。六味地黄汤加麦冬五味子，最能补肾滋肝，木得其养，则血有可藏之经，而不外泄，血证最宜服之。

8、呕吐门

脾胃症辨

人有能食而不能化者，乃胃不病而脾病也，当补脾，补脾尤宜补肾中之火，盖肾火能生脾土也，不能食，食之而安然者，乃脾不病而胃病也，不可补肾中之火，当补心火，盖心火能生胃土也，世人一见不饮食，动曰脾胃虚也，殊不知胃之虚寒，责之心，脾之虚寒，责之肾也，不可不辨也。

反胃大吐

大吐之症，舌有芒刺，双目红肿，人以为热也，谁知是肾水之亏乎，盖脾胃必借肾水而滋润，肾水一亏，则脾胃之火，沸腾而上，以致目红肿而舌芒刺也，但此症时躁时静，时欲饮水，及水到又不欲饮，即强之饮亦不甚快，此乃上假热而下真寒也，宜六味地黄汤加桂附，水煎服。

外治法，先以手擦其足心，使之极热，然后用附子壹个煎汤，用鹅翎扫之，随干随扫，少顷即不吐矣，后以六味地黄汤，大剂饮之，即安然也，或逍遥散加黄连，亦立止也，无如世医以杂药投之，而成噎膈矣，方用

熟地（貳两）山萸元参（各壹两）当归（伍钱）五味子（貳錢）牛膝白芥子（各叁錢）

水煎服，蓋腎水不足，則大腸必乾而細，飲食入胃，難於下行，故反而上吐矣。

寒邪犯肾大吐

寒入肾宫，将脾胃之水，挟之尽出，手足厥逆，小腹痛不可忍，以热物熨之少快，否则寒冷难支，人多以为胃病，其实肾病也，方用

附子（壹个）白朮（肆两）肉桂（壹钱）干姜（叁钱）人参（叁两）

水煎服。此药下喉，便觉吐定，煎渣再服，安然如故。

呕吐

世人皆以呕吐为胃虚，谁知由于肾虚乎，故治吐不效，为窥见病之根也，方用

人参芡实（各叁钱）白朮薏仁（各伍钱）砂仁（伍粒）吴萸（伍分）

水煎服。

火吐

此症若降火，则火由脾而入于大肠，必变为便血之症，法宜清火止吐，方用

茯苓（壹两）人参（貳钱）砂仁（伍粒）黄连（叁钱）

水煎服。

寒吐

此症若降寒，则又引入肾而流于膀胱，必变为遗尿之症，法宜散寒止吐，方用

白朮（貳两）人参（伍钱）附子干姜（各壹钱）丁香（伍分）

水煎服。

此方散寒而用补脾之品，则寒不能上越，而亦不得下行，势不能不从脐出也。

胃吐

此症由于脾虚，脾气不得下行，自必上反而吐，补脾则胃安，方用

人参茯苓（各叁钱）白朮（伍钱）甘草肉桂神曲半夏（各壹钱）砂仁（参粒）

水煎服。

此方治胃病，以补脾者何也，盖胃为脾之关，关门之沸腾，由于关中之溃乱，欲使关外之安静，必先使关中之安宁，况方中砂仁半夏神曲等味，全是止吐之品，有不奏功者乎，此脾胃两补之法也。

反胃

人有食入而即出者，乃肾水虚不能润喉，故喉燥而即出也，方用

熟地（贰两）山萸茯苓麦冬（各伍钱）山药（壹两）泽泻丹皮（各叁钱）五味子（贰钱）

水煎服。

此症又有食久而反出者，乃肾火虚不能温脾，故脾寒而反出也，方用

熟地（贰两）山萸（壹两）山药（陆钱）泽泻（贰钱）茯苓丹皮附子肉桂（各叁钱）

水煎服。

[此即八味地黄，也可用生地桂枝]

胃寒

心肾兼补，治脾胃两虚者固效，若单胃之虚寒，自宜独治心之为妙，方用

人参远志（各壹两）白朮茯苓莲子白芍（各叁两）

菖蒲良姜枣仁（各伍钱）半夏附子白芥子（各叁钱）山药（肆钱）

蜜丸，每日白水送下五钱。

肾寒吐泻心寒胃弱

此症由于心寒胃弱，呕吐不已，食久而出是也，下痢不止，五更时痛泻三五次者是也，人以为脾胃之寒，服脾胃之药而不效者何也，盖胃为肾之关，而脾为肾之海，胃气弱，不补命门之火，则心包寒甚，何以生胃土而消谷食，脾气弱不补命门之火，则下焦虚冷，何以化饮食而生精华，故补脾胃，莫急于补肾也。方用

熟地茯苓人参（各叁两）山萸（贰两）山药（肆两）附子肉桂五味子（各壹两）吴萸（伍钱）

蜜丸，每日空心白水送下五钱。

9、臌证门

水臌

此症满身皆水，按之如泥者，是若不急治，水流四肢，不得从膀胱出，则为死症矣，方用决流汤。

黑丑甘草（各贰钱）肉桂（参分）车前（壹两）

水煎服。

一剂水流斗余，二剂全愈，断勿与三剂也，与三剂反杀之矣，盖二丑甘遂，最善利水，又加肉桂车前子，引火以入膀胱，利水而不走气，不使牛遂之过猛也，二剂之后，须改五苓散，调理二剂，再用六君子汤补脾可也，忌食盐，犯之则不救矣。

[诸臌症最忌宽中市医多用五皮饮描头画角百无一效]

气臌

此症气虚作肿，似水而实非水也，但按之不如泥耳，必先从脚面上肿起，后渐肿至身上，于是头面皆肿者有之，此即谓之气臌，宜于健脾行气之中，加引水之品，若以治水臌治之，是速之死也，方用

白朮茯苓薏仁（各壹两）甘草肉桂（各壹分）枳壳（伍分）人参神曲
车前子萝卜子（各壹钱）山药（伍钱）

水煎服。

初服若觉有碍，久之自有大功，三十剂而愈矣，亦忌食盐秋石。

虫臌

此症小腹痛，四肢浮肿而未甚，面色红而有白点，如虫食之状，是之谓虫臌，方用
消虫神奇丹。

当归鳖甲地栗粉（各壹两）雷丸神曲茯苓白矾（各叁钱）车前子（伍钱）

水煎服。一剂下虫无数，二剂虫尽臌消，不必三剂，但病好必用六君子汤，去甘草
调理。

血臌

此症或因跌闪而瘀血不散，或忧郁而结血不行，或风邪而蓄血不散，留在腹中，致
成血臌，饮食入胃不变精血，反去助邪，久则胀，胀成臌矣，倘以治水法逐之，

而症非水，徒伤元气，以治气法治之，而又非气，徒增饱满，方用逐瘀汤。

水蛭（此物最难死火烧经年，入水犹生，必须炒黄为末方妥）雷丸红花枳壳白芍牛
膝（各叁钱）当归（贰两）桃仁（肆拾两）

水煎服。

一剂血尽而愈，切勿与二剂，当改四物汤调理，于补血内加白朮茯苓人参，补元气
而利水，自然全愈，
否则恐成干枯之症，辨血臌惟腹胀如臌，而四肢手足並無臌意也。

10、水证门

水肿

此症土不能克水也，方用

牵牛甘遂（各叁钱）

水煎服。

此症治法虽多，独此方奇妙，其次鸡屎醴亦效，鸡屎醴治血臌尤效。

呃逆

此症乃水气凌心包也，心包为水气所凌，呃逆不止，号召五脏之气，救水气之犯心也，治法当利湿分水，方用

茯神薏仁（各壹两）

苍朮白朮人参（各叁钱）芡实丁香（各伍钱）法制半夏陈皮（各壹钱）

吴茱（三分）

水煎服，二剂愈。

水结膀胱

此症目突口张，足肿气喘，人以为不治之症，不知膀胱与肾，相为表里，膀胱之开合，肾司其权，特通其肾气而膀胱自通矣，方用通肾消水汤。

熟地山药薏仁（各壹两）

山萸（壹钱伍分）茯神（伍钱）肉桂牛膝（各壹钱）车前子（叁钱）

水煎服。

11、湿证门

黄症

此症外感之湿易治，内伤之湿难疗，外感者利水则愈，若内伤之湿，泻水则气消，发汗则精泄，必健脾行气而后可也，方用

白朮茯苓薏仁（各壹两）茵陈黑栀（各叁钱）陈皮（伍分）

水煎服。

此方治内感之湿，不治外感之湿，若欲多服去栀子。

痺症

此症虽因风寒湿而来，亦因元气之虚，邪治得趁虚而入，倘攻邪而不补正，则难愈矣，今于补正之中，佐以去风寒湿之品，而痺如失矣，方用

白朮（伍钱）人参（叁钱）茯苓（壹两）柴胡附子半夏（各壹钱）陈皮（伍分）

水煎服。

[经云风寒湿三者合而成痺，此条原本痺字，当是痺字之误]

伤湿

此症恶湿，身重足肿，小便短赤，方用

泽泻猪苓（各叁钱）肉桂（伍分）茯苓白朮（各伍钱）柴胡半夏车前子（各壹钱）

水煎服，一剂愈。

脚气

今人以五苓散去湿，亦是正理，然不升其气，而湿未必尽去也，必须提气而水乃散也，方用

黄耆（壹两）人参白朮（各叁钱）

防风肉桂柴胡（各壹钱）薏仁芡实白芍（各伍钱）半夏（贰钱）陈皮（伍分）

水煎服。

此方去湿之圣药，防风用于黄耆之中，已足提气而去湿，又助之柴胡舒气，则气自升腾，气升则水散，白朮茯苓薏仁芡实，俱是去湿之品，有不神效者乎。

附录 傅青主男科卷下

1、泄泻门

泻甚

一日五六十回，倾肠而出，完谷不化，粪门肿痛，如火之热，苟无以救之，必致立亡，方用截泻汤。

薏仁白芍（各贰钱）

山药车前子（各壹两）黄连茯苓（各伍钱）泽泻甘草（各贰钱）

肉桂（参分）人参（叁钱）

水煎服。

水泻

方用

白朮（壹两）车前子（伍钱）

水煎服。

此方补肾健脾，利水去湿，治泻神效。

[泄泻之症，皆由于膀胱不能化气，胃中所纳水谷不得分消，直由大肠而出故以利小便为主，与伤寒下利自利，大相悬殊，须察之。]

火泻

完谷不化，饮食下喉即出，日夜数十次，甚至百次，人皆知为热也，然而热之生也何故，生于肾中之水衰不能制火，使胃土关门，不守于上下，所以直进而直出也，论其势之急迫，似乎宜治其标，然治其标而不能使火之骤降，必须急补肾中之水，使火有可居之地，而后不致上腾也，方用

熟地白芍（各叁两）山萸茯苓甘草车前子（各壹两）肉桂（参分）

水煎服。

此乃补肾之药，非止泻之品，然而止泻之妙，捷如鼓矣，世人安知此也。

水泻

此乃纯是下清水，非言下痢也，痢无止法，岂泻水亦无止法乎，故人患水泻者，急宜止遏，方用

白朮（伍钱）茯苓（叁钱）吴茱（五分）车前子五味子（各壹钱）

水煎服。

泄泻吞酸

泄泻，寒也，吞酸，火也，似乎寒热殊而治法异矣，不知吞酸虽热，由于肝气之郁结，泄泻虽寒，由于肝木之克脾，苟用一方以治水郁，又一方以培脾土，土必大崩，木必大雕矣，不若一方而两治之为愈也，方用

白芍（伍钱）柴胡车前子（各壹钱）茯苓（叁钱）神曲 陈皮甘草（各伍分）

水煎服。

此方妙在白芍以舒肝木之郁，木郁一舒，上不克胃，下不克脾，又有茯苓车前，以分消水湿之气，则水尽从小便出，而何有余水以吞酸，刺汁以泄泻哉。

2、痢疾门

火邪内伤辨

火邪之血，色必鲜红，脉必洪缓，口必渴而饮冷水，小便必涩而赤浊，内伤之血色不鲜而紫暗，或微红淡白，脉必细而迟，或浮濡而空，口不渴，即渴而喜饮热汤，小便不赤不涩，即赤而不热不浊，此诀也。

[痢疾以调达气血为主，痢门以芍药汤为总方，芍药汤偏于凉，用之每不得效此诸方虽归芍木香，却分症而用芩连，不用大黄，可云尽善尽美。]

痢疾

此症感湿热而成，红白相见，如脓如血，至危至急者也，苟用凉药止血，热药攻邪，俱非善治之法，方用

白芍当归（各貳两）
枳壳槟榔（各貳钱）滑石（叁钱）广木香来服子甘草（各壹钱）

水煎服，一二剂收功。

此方妙在用归芍至二两之多，则肝血有余，不去克脾土，自然大肠有传送之功，加之枳壳槟榔，俱逐秽去积之品，尤能于补中用，攻而滑石甘草木香，调达于迟速之间，不疾不徐，使瘀滞尽下也，其余些小痢疾，减半用之，无不奏功，此方不论红白痢疾，痛与不痛，服之皆神效，又方

当归（壹两）黄芩（柒分酒洗）苍朮厚朴大腹皮陈皮（各壹錢）

水二碗，煎一碗，頓服。

血痢

凡血痢腹痛者，火也，方用

归尾白芍（各壹两）黄连（叁钱）枳壳木香来服子（各貳钱）

水煎服。

寒痢

凡痢腹不痛者，寒也，方用

白芍当归（各叁钱）枳壳槟榔甘草来服子（各壹钱）

水煎服。

前方治壮实之人，火邪挟湿者，此方治寒痢，腹不痛者，更有内伤劳倦，与中气虚寒之人，脾不摄血而成血痢者，当用理中汤，加木香肉桂，或用补中益气汤加熟地炒干姜，治之而始愈也。

3、大小便门

大便不通

此症人以为大肠燥也，谁知是肺气燥乎，盖肺燥则清肃之气，不能下行于大肠，而

肾经之水，仅足自顾，又何能旁流以润润哉，方用

熟地元参（各参两）升麻（叁钱）火麻仁（壹钱）牛乳（壹碗）

水二碗，煎六分，将牛乳同调服之，一二剂必大便矣。

此方不在润大肠而在补肾及清肺，夫大肠居于下流，最难独治，必须从肾以润之，从肺以清之，启其上窍，则下窍自然流动通利矣，此下病上治之法也。

实症大便不通

方用

大黄（伍钱）归尾（壹两）升麻（伍分）蜂蜜（半杯）

水煎服。

此方大黄泄利，当归以润之，仍以为君，虽泄而不至十分猛烈，不致有亡险之弊，况有升麻以提之，则泄中有留，又何必过虑哉。

[此方之妙在升麻，味能化板为灵，启其上窍则下窍自流，每以笔管汲砚池水比之，指按管则得水，指启则水落砚上，浅而易明，岳诊小便不通，以青龙汤之姜、细、味主之，亦此意也。此方比大承气和平，然阳明燥粪，非大承气不可，此方当归重用，温润而不猛也，此方从八味地黄悟出。]

虚症大便不通

人有病后大便秘者，方用

熟地元参当归（各壹两）川芎（伍钱）桃仁（拾粒）红花大黄（各叁钱）火麻仁（壹钱）蜂蜜（半杯）

水煎服。

小便不通

膀胱之气化不行，即小便不通，似乎治膀胱也，然而治法全不在膀胱，方用

人参茯苓莲子（各叁钱）白果（贰钱）甘草肉桂车前子王不留行（各壹钱）

水煎服。

此方妙在用人参肉桂，盖膀胱必得气化而出，气化者何，心包络之气也，既用参桂而气化行矣，尤妙在用白果，人多不识此意，白果通任督之脉，走膀胱而引群药，况车前子王不留行，尽下泄之品，服之而前阴有不利者乎。

又方

熟地（壹两）山药丹皮泽泻肉桂车前子（各壹钱）山萸（肆钱）

水煎服。

此方不去通小便而专治肾水，肾中有水，而膀胱之氣，自然行矣，蓋膀胱之開合，腎司其權也。

大小便不通

方用

头发烧灰研末，用三指一捻，入热水半碗，饮之立通。

又方

蜜一茶杯，皮硝一两，黄酒一茶杯，大黄一钱，

煎一处，温服神效。

4、厥证门

寒厥

此症手足必青紫，饮水必吐，腹必痛，喜火熨之，方用

人参（叁钱）白朮（壹两）附子肉桂吴萸（各壹钱）

水煎服。

热厥

此症手足虽寒而不青紫，饮水不吐，火熨之腹必痛，一时手足厥逆，痛不可忍，人以为四肢之风症也，谁知是心中热蒸，外不能泄，故四肢手足则寒，而胸腹皮热如火，方用

柴胡（叁钱）当归黄连炒梔（各贰钱）荆芥半夏枳壳（各壹钱）

水煎服，二剂愈。

又方

白芍（壹两）黑梔（叁钱）陈皮柴胡（各壹钱）花粉（贰钱）

水煎服，以白芍为君，取入肝而平木也。

[此症热在于肝前方之柴胡当归后方之白芍皆肝药也]

尸厥

此症一时猝倒，不省人事，乃气虚而痰迷心也，补气化痰而已，方用

人参半夏南星（各叁钱）白朮（伍钱）附子（伍分）白芥子（壹钱）

水煎服。

又方

苍朮（叁钱）

水煎，灌之必吐，吐后即愈，盖苍朮阳药，善能祛风，故有奇效，凡见鬼者用之更效。

厥症

人有忽然发厥，闭目撒手，喉中有声，有一日死者，有二三日死者，此厥多犯神明，然亦素有痰气而发也，治法宜攻其痰而开心窍，方用起迷丹。

人参半夏（各伍钱）菖蒲（贰钱）兔丝子（壹两）茯苓皂荚（各叁钱）生姜（壹钱）甘草（参分）

水煎服。

气虚猝倒

人有猝然昏倒，迷而不悟，喉中有痰，人以为风也，谁知是气虚乎，若作风治，无不死者，此症盖因平日不慎女色，精亏以致气衰，又加不慎起居，而有似乎风者，其实非风也。方用

人参黄耆白朮（各壹两）茯苓（伍钱）
菖蒲附子（各壹钱）半夏（贰钱）白芥子（叁钱）

水煎服。

此方补气而不治风，消痰而不耗气，一剂神定，二剂痰消，三剂全愈。

阴虚猝倒

此症有肾中之水虚，而不上交于心者，又有肝气燥，不能生心之火者，此皆阴虚，而能令人猝倒者也，方用再苏丹。

熟地（贰两）山萸元参麦冬五味子（各壹两）柴胡菖蒲（各壹钱）茯苓（伍钱）白芥子（叁钱）

水煎服。

此方补肾水，滋肺气，安心通窍，泻火消痰，实有神功，十剂全愈。

[此症切实为阴虚者，当此人身本瘦，面部以下青黑，倒时微喘，目不能瞑。]

阳虚猝倒

人有心中火虚，不能下交于肾而猝倒者，阳虚也，方用

人参白朮生枣仁（各壹两）茯神（伍钱）附子甘草（各壹钱）生半夏（叁钱）

水煎服。

药下喉，则痰静而气出矣，连服数剂，则安然如故。

此症又有胃热，不能安心之火而猝倒者，亦阳虚也，方用

人参元参（各壹两）石膏花粉（各伍钱）麦冬（叁钱）菖蒲（壹钱）

水煎服。

一剂心定，二剂火清，三剂全愈。

[此症切实为阳虚者，当此人素有眩晕，面色红明，倒时额鼻有微汗，阴器欲举，胃热必口有秽气，板齿燥。]

肾虚猝倒

人有口渴索引，眼红气喘，心脉洪大，舌不能言，不可作气虚治，此乃肾虚之极，不能上滋于心，心火亢极，自焚闷乱，遂致身倒，有如中风者，法当补肾，而佐以清火之药，方用水火两治汤。

熟地当归元参（各壹钱）

麦冬生地山萸茯苓（各伍钱）黄连白芥子五味子（各叁钱）

水煎服，连服数剂而愈。

大怒猝倒

人大怒跳跃，忽然卧地，两臂抽掬，唇口歪邪，左目紧闭，此乃肝火血虚，内热生风之症，当用八珍汤，加丹皮钩藤山梔，若小便自遗，左关脉弦洪而数，此肝火血燥，当用六味汤，加钩藤、五味子、麦冬、川芎、当归，愈后需改用补中益气汤，加山梔、丹皮、钩藤，多服，如妇人得此症，则逍遥散加钩藤及六味汤，便是治法。

中风不语

人有跌倒昏迷，或自卧而跌下床者，此皆气虚，而痰邪犯之也，方用三生引。

人参（壹两）半夏（生）南星（生各叁钱）附子（生壹个）

水煎灌之。

此症又有因肾虚而得之者，夫肾主藏精，主下焦地道之生身，冲任二脉系焉，二脉

与肾之大络，同出于肾之下，起于胞之中，其冲脉因称胞络，为经脉之海，遂名海焉，其冲脉之上行者，渗诸阳，灌诸精，下行者，渗诸阴，灌诸络，而温肌肉，别络结于跗，因肾虚而肾络与胞内绝，不通于上则瘖，肾脉不上循喉咙挟舌本，则不能言，二络不通于下，则痿厥矣，方用地黄饮子。

熟地巴戟 山萸茯苓麥冬肉蓯蓉（各壹兩）附子菖蒲五味子（各伍錢）石斛（陸錢）肉桂（叁錢）薄荷、薑、棗

水煎服。

口眼歪邪

此症人多治木治金固是，而不知胃土之为尤切，当治胃土，且有经脉之分，经云足阳明之经，急则口目为僻，眦急不能视，此胃土之经为歪邪也，又云足阳明之脉，挟口环唇，口歪唇邪，此胃土之脉为歪邪也，二者治法，皆当用黄耆、当归、人参、白芍、甘草、桂枝、升麻、葛根、秦艽、白芷、防风、黄柏、苏木、红花，水酒各半煎，微热服，如初起有外感者，加葱白三茎同煎，取微汗自愈。

此症又有心中虚极，不能运于口耳之间，轻则邪，重则不语，方用

人参茯苓菖蒲白芍（各叁钱）白朮（伍钱）甘草（壹钱）半夏肉桂（各貳錢）當歸（壹兩）

水煎服，二劑愈。

又治法，令一人抱住身子，又一人抱住歪邪之耳輪，再令一人手摩其歪邪之處，至數百下，使面上火熱而後已，少頃口眼如故矣，最神效。

半身不遂

此症宜于心胃而调理之，盖心为天真，神机开发之本，胃是谷府，充大真气之标，标本相得，则心膈间之膻中气海，所留宗气盈溢，分布五脏三焦，上下中外，无不周偏，若标本相失，不能致其气于气海，而宗气散矣，故分布不周于经脉，则偏枯，不周于五脏，则瘖，即此言之，未有不因真气不周而病者也，法宜黄耆为君，参、归、白芍为臣，防风、桂枝、钩藤、竹沥、姜、韭、葛、梨、乳汁为佐，治之而愈，若杂投乎乌附羌活之类，以涸营而耗卫，如此死者，医杀人也。

半身不遂，口眼歪邪，方用

人参当归白朮（各伍钱）黄耆（壹两）半夏乾葛（各叁錢）甘草（壹錢）紅花（貳錢）桂枝（壹錢伍分）

水二樽，薑三片，棗二枚，煎服。

此症人多用風藥治之，殊不見功，此藥調理氣血，故無不效。

[此症由于血不行又中風，若用驅風之品，偏枯則終不起矣，故當以養血和血為主，治風先治血，血行風自滅，此為的論]

痢症

此症忽然卧地，作牛马猪羊之声，吐痰如涌泉者，痰迷心窍也，盖因寒而成，感寒而发也，方用

人参山药半夏（各叁钱）白朮（壹两）茯神薏仁（各伍钱）肉桂附子（各壹钱）

水煎服。

又方

人参茯苓（各壹两）白朮（伍钱）半夏南星附子柴胡（各壹钱）菖蒲（参分）

水煎服，此本治寒狂之方，治痢亦效。

5、癲狂門

癲狂

此症多生于脾胃之虚寒，饮食入胃，不变精而变痰，痰迷心窍，遂成癲狂，苟徒治痰而不补气，未有不死者也，方用

人参白芥子（各伍钱）白朮（壹两）半夏（叁钱）陈皮干姜肉桂（各壹钱）甘草菖蒲（各伍分）

水煎服。

如女人得此症，去肉桂加白芍、柴胡、黑梔，治之亦最神效。

发狂见鬼

此症气虚而中痰也，宜固其正气，而佐以化痰之品，方用

人参白朮（各壹两）半夏南星（各叁钱）附子（壹钱）

水煎服。

[男子补气，女子补血]

发狂不见鬼

此是内热之症，方用

人参白朮半夏（各叁钱）南星黄连（各贰钱）陈皮甘草白芥子（各壹钱）

水煎服。

狂症

此症有因寒得之者，一时之狂也，可用白虎汤以泻火，更有终年狂而不愈者，或拿刀杀人，或骂亲戚，不认儿女，见水大喜，见食大恶，此乃心气之虚，而热邪乘之，痰气侵之也，方用化狂丹。

人参白朮茯神（各一两）附子（一分）半夏兔丝子（各三钱）菖蒲甘草（各一钱）

水煎服，一剂狂定。

此方妙补心脾胃三经，而化其痰，不去泻火，盖泻火则心气益虚，而痰涎益盛，狂何以止乎，尤妙在微用附子，引补心消痰之品，直入心中，则气易补而痰易消，又何用泻火之多事哉。

[此症因寒得之，何以用白虎汤，血寒邪外逼，裏不熱泄而擾心胃，如冬傷於寒，春必病溫是也。]

寒狂

凡发狂骂人，未渴索饮，与水不饮者，寒证之狂也，此必气郁不舒，怒气未泄，其人必性情过于柔弱，不能自振者耳，宜补气消痰，方用

人参茯神（各一钱）白朮（五钱）菖蒲（三分）半夏南星附子柴胡（各一钱）

水煎服，药下喉，睡熟醒来，病如失也。

6、怔忡惊悸门

怔忡不寐

此症心经血虚也，方用

人参当归茯苓（各叁钱）丹皮麦冬（各贰钱）甘草菖蒲五味子（各壹钱）生枣仁熟枣仁（各伍钱）

水煎服。

此方妙在用生熟枣仁，生使其日间不卧，熟使其日间不醒，又以补心之药为佐，而怔忡安矣。

心惊不安夜卧不睡

此心病而实肾病也，宜心肾兼治，方用

人参茯苓茯神熟地山萸当归（各参两）远志（贰两）菖蒲（叁钱）黄连肉桂砂仁（各伍钱）生枣仁白芥子（各壹两）麦冬（参两）

蜜丸，每日下五钱，汤酒俱可。

此方治心惊不安与不寐耳，用人参、当归、茯神、麦冬足矣，即为起火不寐，亦不过用黄连足矣，何以反用熟地、山萸补肾之药，又加肉桂以助火，不知人之心惊，乃肾气不入于心也，不寐乃心气不归于肾也，今用熟地山萸补肾，则肾气可通于心，肉桂以补命门之火，则肾气既温，相火有权，君火相得，自然上下同心，君臣合德矣，然补肾固是，而亦有肝气不上于心而成此症者，如果有之，宜再加白芍二两，兼补肝木，斯心泰然矣。恐怕人夜卧交睫，则梦争鬥负败，恐怖之状，难以形容，人以为心病，谁知是肝病乎，盖肝藏魂，肝血虚则魂失养，故交睫若魇，此乃肝膽虚怯，故负恐维多，此非大补，不克奏功，而草木之品，不堪任重，当以酒化鹿角胶，空腹服之可愈，盖鹿角胶大补精血，血旺则神自安矣。

[何以知肝气不上于心，此人当面色青，或潮热，或手足烧，或眩晕左?漲。]

神气不宁

人每卧则魂飞扬，觉身在床而魂离体矣，惊悸多魇，通夕不寐，人皆以为心病也，谁知是肝经受邪乎，盖肝气一虚，邪气袭之，肝藏魂，肝受邪，魂无依，是以魂飞扬而若离体也，法用珍珠母为君，龙齿佐之，珍珠母入肝为第一，龙齿与肝同类，龙齿虎睛，今人例以为镇心之药，诎知龙齿安魂，虎睛定魄，东方苍龙木也，属肝而藏魂，西方白虎金也，属肺而藏魄，龙能变化，故魂游而不定，虎能专静，故魄止而有守，是以治魄不宁宜虎睛，治魂飞扬宜龙齿，药各有当也，

[此症岳每用桂枝汤温胆汤参之颇效]

7、腰腿肩背手足疼痛

满身皆痛

手足心腹一身皆痛，将治手乎，治足乎治肝为主，盖肝气一舒，诸痛自愈，不可头痛救头，足痛救足也，方用

柴胡甘草陈皮栀子（各壹钱）白芍薏仁茯苓（各伍钱）当归苍朮（各贰钱）

水煎服，此逍遥散之变化也，舒肝而又去湿去火，治一经而诸经无不愈也。

腰痛

痛而不能俯者，湿气也，方用

柴胡泽泻猪苓白芥子（各壹钱）

防已（贰钱）白朮甘草（各伍钱）肉桂（参分）山药（叁钱）

水煎服。

此方妙在入肾去湿，不是入肾而补水，初痛者，一二剂可以奏功，日久必多服为妙。

痛而不能直者，风寒也，方用逍遥散加防已一钱，一剂可愈，若日久者，当加杜仲一两，改白朮二钱，酒煎服，十剂而愈。

又方

杜仲（壹两盐炒） 破故纸（伍钱盐炒） 熟地白朮（各叁两） 核桃仁（貳钱）

蜜丸，每日空心白水送下五钱，服完可愈，如未全愈，再服一料，必愈。

凡痛而不止者，腎經之病，乃脾溼之故，方用

白朮（肆兩） 薏仁（參兩） 芡實（貳兩）

水六碗，煎一碗，一氣飲之，此方治夢遺之病亦神效。

腰腿筋骨痛

方用养血汤

当归生地肉桂牛膝杜仲破故纸茯苓防风（各壹钱） 川芎（五分） 甘草（叁分） 核桃（貳个） 山萸土茯苓（各貳钱）

水酒煎服。

腰痛足亦痛

方用

黄耆（半斛） 防风茯苓（各伍钱）

薏仁（伍两） 杜仲（壹两） 肉桂（壹钱） 车前子（叁钱）

水十碗，煎二碗入酒，以醉为主，醒即愈。

腰足痛，明系是肾虚而气衰，更加之湿，自必作楚，妙在不补肾而单益气，盖气足则血生，血生则邪退，又助之薏仁、茯苓、车前之类，去湿，湿去而血活矣，况又有杜仲之健肾，肉桂之温肾，防风之荡风乎。

腿痛

身不离床褥，伛偻之状可掬，乃寒湿之气侵也，方用

白朮（伍钱） 芡实（貳钱） 肉桂（壹钱） 茯苓萆薢（各壹两） 杜仲（叁钱） 薏仁（貳两）

水煎，日日服之，不必改方，久之自奏大功。

两臂肩膊痛

此手经之病，肝气之郁也，方用

当归白芍（各参两）柴胡陈皮（各伍钱）羌活秦艽白芥子半夏（各叁钱）附子（壹钱）

水六碗，煎三沸，取汁一碗，入黄酒服之，一醉而愈。

此方妙在用白芍为君，以平肝木不来侮胃，而羌活柴胡又去风，直走手经之上，秦艽亦是风药，而兼附子攻邪，邪自退出，半夏、陈皮、白芥子，祛痰圣药，风邪去而痰不留，更得附子无经不达，而其痛如失也。

手足痛

手足肝之分野，而人乃为脾经之热，不知散肝木之郁结，而手足之痛自去，方用逍遥散，加梔子（叁钱）半夏（贰钱）白芥子（贰钱）

水煎服，二剂，其痛如失，盖肝木作祟，脾不敢当其锋，气散于四肢，结而不伸，所以作楚，今平其肝气，则脾气自舒矣。

胸背手足颈项腰膝痛

筋骨牵引，坐卧不得，时时走易不定，此是涎伏在心膈上下，或令人头痛，夜间喉中如锯声，口流涎唾，手足重，腿冷，治法用控涎丹，不足十剂，其病如失矣。

[控涎丹方药未见此条，仍照原本存之。]

背骨痛

此症乃肾水衰耗，不能上润于脑，则河车之路，干涩而难行，故作痛也，方用

黄耆熟地（各壹两）山萸（肆钱）白朮防风（各伍钱）五味子（壹钱）茯苓（叁钱）附子（壹分）麦冬（贰钱）

水煎服。

此方补气补水，去湿去风，润筋滋骨，何痛之不愈哉。

腰痛兼头痛

上下相殊也，如何治之乎，治腰乎，治头乎，谁知是肾气不通乎，盖肾气上通于脑，而脑气下达于肾，上下虽殊，而气实相通，法当用温补之药，以大益其肾中之阴，则上下之气通矣，方用

熟地（壹两）杜仲麦冬（各伍钱）五味子（贰钱）水煎服，一剂即愈。

方内熟地，杜仲，肾中药也，腰痛是其专功，今并头而亦愈者何也，盖此头痛，是肾气不上达之故，用补肾之味，则肾气旺而上通于脑，故腰不痛而头亦不痛矣。

8、心腹痛门

心痛辨

心痛之症有二，一则寒气侵心而痛，一则火气焚心而痛，寒气侵心者，手足反温，火气焚心者，手足反冷，以此辨之最得。

寒痛方用

良姜白朮草乌贯仲（各叁钱）肉桂甘草（各壹钱）

水煎服。

热痛方用

黑梔（叁钱）白朮（伍钱）甘草半夏柴胡（各壹钱）

水煎服。

心不可使痛，或寒或火，皆冲心包耳。

久病心痛

心乃神明之君，一毫邪气不可干犯，犯则立死，经年累月而痛者，邪气犯心包络也，但邪有寒热之辨，如恶寒见水如仇，火熨之则快，此寒邪也，方用

苍朮（貳钱）白朮（伍钱）当归（壹两）肉桂良姜（各壹钱）

水煎服。

如见水喜悦，手按之而转痛者，热气犯心包络也，方用

白芍（壹两）黑梔当归生地（各叁钱）甘草（壹钱）陈皮（捌分）

水煎服。

寒热二症，皆责之于肝也，肝属木，心属火，木衰不能生火，则包络寒，补肝而邪自退，若包络之热，由于肝经之热，泻肝而火自消也。

[心腹之痛共有九种，其實皆心包絡、胃脘、膈中及腹痛，無真心痛也，蟲痛、注痛、氣痛、血痛、悸痛、食痛、飲痛、冷痛、熱痛、證各有辨，其用藥亦大有不同，如蟲痛則脣上有瘡，痛時作時止，可與烏梅圓，注痛則兼頭痛，或抽慄或妄語，可與蘇合丸，氣痛則或上或下，或前或後，有肝、有胃、有肺，可與左金丸、平胃散之屬，血痛則有痞塊，可與桃仁湯、失笑散，悸痛則按之不拒，可與理中湯、妙香散，食痛則拒按發熱，可與承氣湯、檳榔丸，飲痛則吐清水，?下有水聲，可與二陳湯，甚者十棗湯，冷痛熱痛則此二方可用，先生此書因窮鄉僻壤而設，執此可以應急，且免誤於庸醫，故去煩就簡也。]

腹痛

痛不可忍，按之愈痛，口渴饮以凉水，则痛少止，少顷依然大痛，此火结在大小肠也，若不急治，一时气绝，方用定痛如神汤。

黑梔苍朮（各叁钱）甘草厚朴（各壹钱）茯苓（壹两）白芍（伍钱）

水煎服。

此方舒肝经之气，利膀胱之水，泻水逐瘀，再加大黄壹钱，水煎服勿迟。

腹中有痞块，一时发作，而痛不可手按者，方用

白朮（貳两）枳实（壹两）马粪（炒焦伍钱）

好酒煎服。

冷气心腹痛，方用火龙丹。

硫磺（醋制壹两）胡椒（壹钱）白矾（肆钱）

醋打荞面为丸如桐子大，每服二十五丸，米下汤。

胃气痛

人病不能饮食，或食而不化，作痛作满，或兼吐泻，此肝木克脾土也，方用

白芍当归柴胡茯苓（各贰钱）白朮（叁钱）甘草白芥子（各壹钱）

水煎服。

有火加梔子贰钱，无火加肉桂壹钱，有食加山楂叁钱，伤面食加枳壳壹钱，麦芽壹钱，有痰加半夏壹钱，有火能散，有寒能驱，此右病而左治之也。

9、麻木门

手麻木

此乃气虚而寒湿中之，如其不治，三年后必中大风，方用

白朮黄耆（各伍钱）陈皮桂枝（各伍分）甘草（壹两）

水煎服。

手麻

十指皆麻，面目失色，此亦气虚也，治当补中益气汤，加木香麦冬香附羌活乌药防风，三剂可愈。

手足麻木

[手足麻木为中风之候，左右偏枯皆先由手足大指不用起，盖手太阴肺经行于手大指，肺藏气而右降，气分虚则病偏于右，足厥阴肝经行于足大指，肝藏血而左升，血分虚则病偏于左，故手足麻木必补气血，且验中风之候于未来也]

四物汤加人参、白朮、茯苓、陈皮、半夏、桂枝、柴胡、羌活、防风、秦艽、牛膝

炙草，姜、枣引煎服，四剂愈。

木

凡木是湿痰死血也，用四物汤加陈皮、半夏、茯苓、桃仁、红花、白芥子、甘草、竹沥、姜汁，

水煎服。

腿麻木

方用导气散

黄耆（贰钱）甘草（壹钱伍分）青皮（壹钱）升麻柴胡归尾泽泻（各伍分）五味子（参拾粒）陈皮（捌分）红花（少许）

水煎，温服甚效。

两手麻困倦嗜卧

此乃热伤元气也，方用益气汤。

人参甘草（各壹钱）黄耆（贰钱）炙草（伍分）五味子（参拾粒）柴胡白芍（各柒分）姜（参片）枣（贰枚）

水煎热服。

浑身麻木

凡人身体麻木不仁，两目羞明怕日，眼涩难开，视物昏花，睛痛，方用神效黄耆汤。

黄耆白芍（各壹钱）陈皮（伍分）人参（捌分）炙草（肆分）蔓荆子（贰分）如有热，加黄柏参分，

水煎服。

麻木痛

风寒湿三气，合而成疾，客于皮肤肌肉之间，或痛或麻木，方用

牛膝胶（貳两）南星（伍钱）姜汁（半碗）

共熬膏摊贴，再以热鞋底熨之，加羌活乳香没药，更妙。

足弱

此症不能步履，人以为肾水之虚，谁知由于气虚而不能运动乎，方用

补中益气汤加人参牛膝（各叁钱）金石斛（伍钱）黄耆（壹两）

水煎服。

筋缩

凡人一身筋脉，不可有病，病则筋缩而身痛，脉澹而体重矣，然筋之舒，在于血和，而脉之平，在于气足，故治筋必须先治血，而治脉必须补气，人若筋急拳缩伛偻，而不能直立者，皆筋病也，方用

当归（壹两）白芍薏仁生地元参（各伍钱）柴胡（壹钱）

水煎服。

此方妙在用柴胡一味，入于补药中，盖血亏则筋病，用补药以治筋宜矣，何又用柴胡，夫肝为筋之主，筋乃肝之余，气不顺，筋自缩急，今用柴胡以舒散之，郁气既除，而又济之以大剂补血，则筋得其养矣。

10、胁痛门

两胁有块

左胁有块作痛，是死血也，右胁有块作痛，是食积也，遍身作痛，筋骨尤甚，不能伸屈，口渴目赤头眩，痰壅胸不利，小便短赤，夜间殊甚，又遍身作痒如虫行，人以为风也，谁知是肾气虚而热也，法用六味地黄汤加栀子柴胡，是乃正治也，三剂见效。

左胁痛

左胁痛，肝经受邪也，方用

黄连（吴茱炒貳钱）柴胡当归青皮桃仁（研各壹钱）川芎（捌分）红花（伍分）

水煎食（远服）。

有痰。加陈皮半夏。

右胁痛

此是邪入肺经也。方用

片姜黄 枳壳（各貳钱）桂心（貳分）炙草 陈皮 半夏（各伍分）

水煎服。

左右胁俱痛

方用

柴胡青皮 龙胆草

当归（各一钱）川芎枳壳（各捌分）甘草（参分）砂仁木香（各伍分）

姜水煎服。

两胁走注

两胁走注，痛而有声者，痰也，方用

二陈汤，去甘草加枳壳、砂仁、广木香、川芎、青皮、苍朮、香附、茴香

水煎服。

胁痛身热

此劳也，用补中益气汤，加川芎、白芍、青皮、砂仁、枳壳、茴香，去黄耆，水煎服。

胁痛

此乃肝病也，故治胁痛，必须平肝，平肝必须补肾，肾水足而后肝气有养，不治胁痛，而胁痛自平也，方用肝肾兼资汤。

熟地当归（各壹两）白芍（贰两）黑梔（壹钱）山萸（伍钱）白芥子甘草（各叁钱）

水煎服。

[每咯血之人，胁胀痛而咯，是经血瘀滞胁下也，两方用时加桃仁柒枚，黑荆芥穗捌分尤效。]

胁痛咳嗽

咳嗽气急，脉滑数者，痰结痛也。

瓜蒌仁枳壳青皮茴香白芥子

水煎服。

11、肾病门

阳强不倒

此虚火炎上，而肺气不能下行故耳，若用黄柏知母煎汤饮之，立时消散，然自倒之后，终年不能振起，亦非善治之法也，方用

元参麦冬（各叁两）肉桂（参分）

水煎服。

此方妙在用元参以泻肾中之火，肉桂入其宅，麦冬助肺金之气，清肃下行，以生肾水，水足则火自息矣，不求倒而自倒矣。

阳痿不举

此症乃平日过于削，日泄其肾中之水，而肾中之火，亦因而消亡，盖水去而火亦去，必然之理，有如一家人口，厨下无水，何以为炊，必有水而后取柴炭以煮饭，不则空铛也，方用

熟地（壹两）山茱（肆钱）远志巴戟
肉苁蓉杜仲（各壹钱）肉桂茯神（各贰钱）白朮（伍钱）人参（叁钱）

水煎服。

尿血又便血

便血出于后阴，尿血出于前阴，最难调治，然总之出血于下也，方用

生地（壹两）地榆（叁钱）水煎服，二症俱愈，盖大小便各有经络，而其症皆因膀胱之热也，生地地榆，俱能清膀胱之热，一方而两用之也，盖分之中有合。

疝气

方用去铃丸

大茴香姜汁（各壹斛）

将姜汁入茴香内，侵一宿，入青盐贰两，同炒红为末，酒丸桐子大，每服三十丸，温酒或米汤送下。

肾子痛

方用

泽泻陈皮赤苓（各壹钱）丹皮小茴香枳实（各叁钱）吴茱萸苍朮（各伍分）山楂（肆分）苏梗（肆分）

姜水煎服。

又方

酒炒大茴香、酒炒小茴香、赤石脂（煅）、广木香各等分，乌梅肉捣烂为丸，如桐子大，空心每服十五丸，葱酒送下立效。

偏坠

方用

小茴香、猪苓等分，微炒为末，空心盐水冲服，热盐熨亦甚效。

12、杂方

病在上而求诸下

头痛、目痛、耳红、腮肿，一切上焦等症，除清凉发散正治外，人即束手无策，而不知更有三法，如大便结、脉沉实者，用酒蒸大黄三钱微下之，名釜底抽薪之法，如大便泻，脉沉足冷者，宜六味地黄汤，加牛膝、车前、肉桂，足冷甚者，加熟附子，是冷极于下，而迫其火之上升也，此名导龙入海之法，大便如常，脉无力者，用牛膝车前引下之，此名引火归源之法也。

病在下而求诸上

凡治下焦病用本药不愈者，须从上治之，如足痛足肿，无力虚软，膝疮红肿，用木瓜、薏仁、牛膝、防己、黄柏、苍朮之品，不效者定是中气下陷，湿热下流，用补中益气升提之，如足软不能行而能食，名曰痿症，宜清肺热，如治泄泻，用实脾利水之剂，不效者亦用补中益气，去当归，加炮姜苍朮，脉迟加肉蔻、故纸，如尿血、用凉血利水药不效、宜清心莲子饮，若清心不止，再加升柴，如治便血用止涩之药，不效，或兼泄泻，须察其脉如右关微，或数大无力，是脾虚不摄血，宜六君子加炮姜，若右关沉紧，是饮食伤脾，不能摄血，加沉香贰分，右寸洪数，是实热在肺，宜清肺，麦冬、花粉、元参、枯芩、桔梗、五味子、枳壳等味。

疮毒

方用如神汤

银花当归蒲公英（各壹两）荆芥连翘（各壹钱）甘草（叁钱）

水煎服。

头面上疮

方用

银花（贰两）当归（壹两）川芎甘草（各伍钱）桔梗蒲公英（各叁钱）黄芩（壹钱）

水煎服。二剂全消。

头疮不可用升提之药，最宜用降火之品，切记之。

身上手足之疮疽

方用

银花甘草蒲公英（各叁钱）当归（壹两）牛蒡子（贰钱）花粉（伍钱）芙蓉叶（七片无叶用根）

水煎服。

统治诸疮

方用

花粉甘草银花蒲公英

水煎服，二剂全愈。

此方消毒大有其功，诸痈诸疽，不论部位，皆治之。

黄水疮

方用

雄黄、防风煎汤，洗之即愈。

手汗

方用

黄耆干葛（各壹两）荆芥防风（各叁钱）

水煎壹盆，热熏温洗三次愈。

饮砒毒

用生甘草叁两，加羊血半碗，和匀饮之，立吐而愈，若不吐，速用大黄贰两甘草伍钱，白矾壹两，当归叁两，水煎数碗饮之，立时大泻即生。

补肾

方用

大盐青菽苇七寸，煮核桃。

嚏喷

方用

生半夏为末，水丸绿豆大，入鼻孔，必嚏喷不已，用水饮之立止，通治中风不语，及中恶中鬼俱妙。

破伤风

方用

蝉退去净，头足为末伍钱，用好酒壹碗，煎滚入末，调匀服之，立生。

疯狗咬伤

用：手指甲焙黄为末滚黄酒冲服，发汗即愈，忌房事百日。

13、小儿科

色

小儿鼻之上，眼之中，色红者心热也，红筋横直，现于山根，皆心热也，色紫者，心热之甚而肺亦热也，色青者，肝有风也，青筋横直现者肝热也，直者风上行，横者风下行也，色黑者风甚，而肾中有寒也，色白者肺中有痰，黄者脾胃虚而作泻，一观其色，而疾可知矣。

脉

大人看脉于寸关尺，小儿不然，但看其数不数而已，数甚则热，不数则寒也，数之中浮者风也，沉者寒也，缓者湿也，濡者邪也，滑者痰也，有止歇者痛也，如此而已，余不必过谈也。

三关

小儿虎口，风气命三关，紫属热，红属寒，青属惊风，白属疳，风关轻，气为重，若至命关，则难治矣。

不食乳

小儿不食乳，心热也，葱煎乳汁，令小儿服之亦妙，不若用黄连三分，煎汤一分，灌数次即食矣，神效。

脐不干

用：

车前子炒焦为细末，敷之即干。

山根

山根之上，有青筋直视者，乃肝热也，方用

柴胡半夏（各参分）白芍茯苓（各壹钱）当归白朮（各伍分）山查（参个）甘草（壹分）

水煎服。

有青筋横现者。亦肝热也。直者风上行。横者风下行。用前方加柴胡（伍分）麦芽（壹钱）干姜（壹分）

水煎服。

有红筋直现者，心热也，亦用前方加黄连（壹分）麦冬（伍分）去半夏，加桑白皮、天花粉（各贰分）

水煎服。

有红筋斜现者，亦心热也，亦用前方加黄连（贰分），热积于胸中，不可用半夏，用桑白皮、花粉可也。

有黄筋现于山根者，不论横直，总是脾胃之症，或吐或瀉，腹痛或不思食，方用

白朮茯苓（各伍分）陳皮人參麥芽（各貳分）神麴甘草（各壹分）淡竹葉（柒分）

水煎服。

有痰加半夏壹分，白芥子貳分，如口渴有熱者，加麥冬參分，黃芩壹分，有寒加乾薑壹分，吐加白蔻壹粒，瀉加豬苓伍分，腹痛按之大叫者食也，加大黃參分，枳實壹分，按之不呼號者寒也，加乾薑參分，如身發熱者，不可用此方。

发热

不拘早晚发热，俱用万全汤神效。

柴胡白朮黃芩神曲（各參分）白芍麥冬（各壹錢）當歸（伍分）茯苓（貳分）甘草蘇葉（各壹分）山楂（參個）

水煎服。

冬加麻黃壹分，夏加石膏參分，春加青蒿參分，秋加桔梗參分，有食加枳殼參分，有痰加白芥子參分，吐加白蔻壹粒，瀉加豬苓壹錢，小兒諸症，不過如此，不可作驚風治之，如果有驚風，加人參伍分，其效如神。

凡潮熱、積熱、疳熱，乃脾積寒熱，俱用姜梨引。

柴胡、人參、黃芩、前胡、秦艽、甘草、青蒿各壹分，童便浸曬干，生地一寸，薄荷二葉，或生梨生藕一片，水煎服，甚效。

感冒风寒

方用

柴胡（伍分）白朮白芍（各壹錢）茯苓炙草半夏（各參分）陳皮（貳分）當歸（捌分）

水煎熱服。

惊风

世人動曰驚風，誰知小兒驚則有之，而風則無，小兒純陽之體，不當有風，而狀有風者，蓋小兒陽旺內熱，內熱則生風，是非外來之風，乃內出之風也，內風作外風治，是速之死也，方用清火散風湯。

白朮梔子（各參分）茯苓（貳錢）陳皮甘草半夏（各壹分）白芍（壹錢）柴胡（伍分）

水煎服。

此方健脾平肝之聖藥，肝平則火散，脾健則風止，斷不可以風藥表散之也。

驚風

凡驚風皆由於氣虛，方用壓風湯，

人參白朮神曲（各伍分）甘草半夏丹砂（各參分）茯神（壹錢）砂仁（壹粒）陳皮（壹分）

水煎服，此方治慢驚風，加黃耆。

痢疾

方用

當歸白芍（各壹錢）黃連（貳分）枳殼檳榔（各伍分）甘草（參分）

水煎溫服。

紅痢倍黃連，白痢加澤瀉參分，腹痛倍甘草，加白芍，小便赤加木通參分，下如豆汁，加白朮壹錢，傷食加山楂麥芽各參分，氣虛加人參參分。

泄瀉

身熱如火，口渴舌燥，喜冷饮而不喜热汤，方用泻火止泻汤

車前子（貳錢）茯苓白芍麥芽（各壹錢）黃連豬苓（各參分）澤瀉（伍分）枳殼（貳分）

水煎服。

寒泻

此症必腹痛而喜手按摩，口不渴而舌滑，喜热饮而不喜冷水也，方用散寒止泻汤。

人参白朮（各壹钱）茯苓（貳钱）肉桂干姜（各貳分）甘草（壹分）砂仁（壹粒）神曲（伍分）

水煎服。

吐

此症虽胃气之弱，亦脾气之虚，小儿恣意饱食，不能消化，久之上冲于胃口而吐也，方用止吐速效汤

人参白朮（各壹钱）砂仁（壹粒）茯苓（貳钱）陈皮（貳分）麦芽（伍分）半夏干姜（各壹分）山楂（参个）

水煎服。

咳嗽

方用苏叶（伍分）桔梗甘草（各壹钱）

水煎热服，有痰加白芥子（伍分）便是。

疳症

此脾热而因乎心热也，遂至口中流涎，若不平其心火，则脾火更旺，湿热上蒸，而口涎不能止，方用

芦荟桑白皮（各壹钱）黄连薄荷半夏（各参分）茯苓（貳钱）甘草（壹分）

水煎服。

此心脾两清之圣药也，引火下行，而疳自去矣。

口疳流水口烂神方

黄柏（貳钱）人参（壹钱）共为细末，敷口内，一日三次即愈。

此方用黄柏去火，人参健脾，大人用之亦效。

疳症泻痢眼障神效方

石决明（壹两醋煨）芦荟川芎白蒺藜胡黄连五灵脂细辛谷精草（各伍钱）甘草（叁钱）菊花（肆钱）

猪苓去筋，捣烂为丸如桐子大，每服贰拾伍丸，不拘时，米汤下。

疟疾

方用

柴胡（陆分）白朮茯苓归身（各壹钱）白芍（壹钱伍分）半夏青皮厚朴（各伍分）

水煎成，露一宿，再温与服。

热多者加人参、黄耆各伍分，寒多者加干姜参分，痰多者加白芥子壹钱，夜热加何首乌、熟地各贰钱，日发者不用加，腹痛加槟榔参分。

便虫

方用

榧子（伍个去壳）甘草（参分）米饭为丸，服二次，则虫化为水矣。

积虫

方用

史君子（去壳炒）榧子（各拾个去壳）槟榔甘草（各壹钱）米饭为丸如桐子大，每服十丸，二日虫出，五日全愈。

痘症回毒或疗肿

方用

银花（伍钱）人参（贰钱）甘草元参（贰钱）

水煎服。

痘疮坏症已黑

痘疮坏症已黑者，人将弃之，药下喉即活，方用

人参（叁钱）陈皮荆芥（各壹钱）蝉退（伍分）元参当归（各贰钱）

水煎服。

此乃元气虚而火不能发也，故用人参以补元气，元参去浮游之火，陈皮去痰开胃，则参无碍，而相得益彰，荆芥以发之，又能引火以归经，当归生新去旧，消瘀血，蝉退解毒除风，世人何知此妙法，初起时不可服，必坏症乃可服。

急慢风

三六九日一切风俱治。

陈胆星雄黄朱砂人参茯苓天竺黄钩藤牛黄麝香川郁金柴胡青皮甘草

为细末，煎膏为丸如菉豆大，真金一张为衣，阴干勿泄气，薄荷汤磨服。

治火丹神方

丝瓜子元参（各壹两）柴胡升麻（各壹钱）当归（伍钱）

水煎服。

又方

升麻青蒿黄耆（各叁钱）元参（壹两）干葛（叁两）

水煎服。此二方详火症，小儿用之亦效，

故又出之。

此方妙在用青蒿，肝胃之火俱平，又佐以群药重剂，而火安有不灭者乎。